

Jesucristo Pia Pexeinya Diwesi Jume Tatsi Marcos Petinae Diwesi

*Meje yabara poxona Juan pon Pebautisabin
jiwi cuiduba ira xuepana susato tsurucuae
nacuatha*

(Mt 3.1-12; Lc 3.1-9, 15-17; Jn 1.19-28)

¹ Baraxue tamropata pitaban xua Jesucristo pia pexeinya jume diwesi tatsi. Bapon Jesucristo, Nacom Pexanto tatsi.

² Bayatha Nacom pia peitorobi jume pepaebin, pon pewun Isaías, bapon tina petinae diwesitha. Isaías tina Nacom nexa, Nacom barapo diwesitha jeye Pexantotha:

“Itorobin copiya pon tana najume caitorobin xua catsiwanaya itorobinchi.

Bapon cana exanaena jiwitha xua jiwi yabara aura tsane abe pia peexanae cuiru coyenein tatsi, xua poxona nepatopae wunaeya tsane.

³ Pon itorobin bapon jume tan pon xua wawai ira xuepana susato tsurucuae nacuatha.

Bapon wawaya jeye: ‘Patsinajuntu cui coyene wunaere, pon jiwi pia pepa Pecanamataxeinaeinchi nexa pia pepatopae wunaeya tsane’, jei pon xua wawai”,
jei Isaías petinae diwesitha.

⁴ Nexata Juan pon Isaías peyabara paebixae bapon ira xuepana susato tsurucuae nacuatha patopa. Bapon Juan bautisaba ducuaenaebiya, xua

jiwi bautisabatsi merantha. Matautano bapon tsipaeba jiwitha Nacom pia pexeinya jume diwesi tatsi. Bapon Juan jeye jiwitha: “Icha juntu coyene paxeinare painya neauraxae xua abe paexaname. Bapoxonae Nacom paca yabara jntemainaena abe painya neexanae cuiru coyenein”, jei Juan. ⁵ Daxita Judea nacuamonae, iruru Jerusalén tomarapiwi, daxita barapomonae pona ichaxota beya Juan bautisaba jiwi ira xuepana susato tsurucuae nacuatha. Poxonae barapomonae nayopita Nacomtha xua bepa pinae Nacom tsita auratsi xua abe peexanaexae bapoxonae barapomonae Juan bautisaba Jordán mentha.

⁶ Juan jumaina duwein nabocoto, po duwein pewan camello. Coreinya bocoto maraina. Xane pocotsiwa yapupuna pocotsiwan be sure poxi. Matautano bana daeba. ⁷ Barapon pomonaetha pebautisabixae tsipaeba, jeye: “Pon nepuna patopaena, apara bapon Mesías. Bapon bichocono peayapusu itorobi coyenewa xeina beyacaincha xan. Bapon pon jiwi pia Pecanamataxeinaeinchi. Xan bichocono tapawin daxota bapon bichocono tsita pin ura xeinan xua tataxu mu isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponae wi poxonae baru cui itura jina pia pentacaponae wichi. ⁸ Paca bautisabatsi meratha, ichitha nama barapon Mesías paca bautisabina Nacom pia Pejumope tanaxutha tatsi poxonae Nacom paca najumope catsibina”, jei Juan jiwitha xua Jesús yabara.

*Meje yabara poxonaē Jesús bautisabatsi
(Mt 3.13-17; Lc 3.21-22)*

⁹ Barapo dapaetha Jesús Nazaret tomara weya pona, po tomara eca Galilea nacuaṯa. Bapon Jordán mentha patopa, ichaxota Juan bautisaba. Baraxota Jesús bautisabatsi. ¹⁰ Poxonaē mene wejuina barapoxonaē caena nainya Jesús itaboco necoicha xua peitaboco nayausanaxuba. Jesús tane xua Nacom pia Pejumope t̃nax̃ tatsi patopa bapontha xua be topiboto yaruneca. ¹¹ Barapoxonaē Jesús jume tane pocotsiwa peitaboco wetsipaebicatsi, jeichichi: “Xam apara Taxantom, pom bichocono caantobetsi, pom caitapetatsi. Nej̃nt̃ coyene weiweina exaname”, jei Nacom.

*Meje yabara poxonaē Jesús j̃nt̃ coyene j̃j̃tatsi
caurimonaē pia pentacaponaein tatsi xua Jesús abe
coyeneya petaexanaenexa tsane
(Mt 4.1-11; Lc 4.1-13)*

¹² Poxonaē Jesús nanacui wetatsi xua bautisabatsi bapoxonaē Nacom pia Pejumope t̃nax̃ tatsi Jesús nainya itorobatsi ira xuepana susato tsurucuae nacua beya. ¹³ Jesús ira xuepana susato tsurucuae nacuaṯa popona cuarenta po mat-acabibe. Baraxota pichiwan xua camatsawan jinompa ichaxota Jesús popona pocotsiwan bichocono atsaca. Caurimonaē pia pentacaponaein tatsi pon Satanás Jesús piraichi j̃nt̃ coyene j̃j̃tatsi xua Jesús abe coyeneya petaexanaenexa tsane. Pirapae matatsunpiwimonaē po matatsunpiwimonaē Nacom itoroba, barapomonaē pata

Jesustha xua Jesús pecui matateicaenexa tsainchi, matautano xua peapatsinexatsi tsainchi.

Meje yabara poxonae Jesús tamropata pitaba pia penacuichiwa xua Galilea nacuatha

(Mt 4.12-17; Lc 4.14-15)

¹⁴ Nexata poxonae ichamonae Juan maxu waetabatsi xua peetsinexatsi jiwi pecubi botha, bapoxonae Jesús Galilea nacuatha patopa. Jesús paeba ducuaanaeta jiwitha Nacom pia pexeinya jume diwesi tatsi. ¹⁵ Jesús namchi jeye: “Nacom bayatha yabara necana cui weta exana po coyeneya xua poxonae tapatopaewa. Daxota jiwi itacupatsi xua naexana Nacom piamonae, pomonae Nacom itorobiya peewatsixae. Daxota icha juntu coyene paxeinare Nacomtha xua painya neauraxae xua abe paexaname, Nacom piamonae painya nenaexanaenexa tsane. Pajume cowunde Nacom pia pexeinya jume diwesi tatsi”, jei Jesús.

Meje yabara poxonae Jesús waba cuatro poyobe pebiwi, pomonae duwei peyamonae

(Mt 4.18-22; Lc 5.1-11)

¹⁶ Poxonae Jesús pona Galilea pucua itapatha, bapoxonae tane ponbe peyaxunubinbe duwei. Ichun pewun Simón, ichun pewun Andrés. Baponbe bara cae peweichobe. Baponbe peweichobe duwei yamonauyabe pucuatha.

¹⁷ Jesús waba, baraponbe wabatsibe. Jesús jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowuntsiwa tsane

Nacom icha bayatha paichimbe poxonaе payamonamebe duwei nawita, jei Jesús.

¹⁸ Bara caena baraponbe botabe barapo peyamonae. Bapoxonaе napuna ponabe Jesustha.

¹⁹ Jesús equeicha pona. Bapoxonaе equeicha ichunbe tainchibe. Baraponbe ichun pewun Santiago, irun ichun pewun Juan. Baponbe Zebedeo pexantobe tatsi. Jeratha mataquerabauyabe peyamonae xua ucupouna. ²⁰ Jesús nainya waba, baponbe wabatsibe: Jesús baraibe: “Anetha, pana nepuna pondebe”, jei Jesús. Baponbe paxa cuenta ponabe jera weya, pon pewun Zebedeo. Matautano cuenta ponabe pomonaе Zebedeo pia peyawenaе jiwichi tatsi xua yamona duwei. Baponbe Jesustha napuna ponabe.

*Meje yabara poxonaе pebin pon cauri xeina
(Lc 4.31-37)*

²¹ Bapoxonaе Jesús pijimonaе barun pona Capernaum tomara beya. Bapoxonaerun judiomonaе barompaya pia pentaquei seicaе matabi tatsi tsuxubi. Barapo matabitha Jesús pijimonaе barun joniya judiomonaе pia penacaetutsi botha tatsi. ²² Barapo jiwi yabara najuntu coyene cabenaeca, tsipei pocotsiwa Jesús barapomonaе cuidubatsi be pon peyaputaein pia peayapusun itorobi jume coyeneya tatsi paeba. Jesús jopa cuidubiyo be judiomonaе pia pecuidubiwi pia coyeneya tatsi. ²³ Pebin pon cauri xeina barapon eca barapo judiomonaе pia penacaetutsi botha tatsi.

²⁴ Bapon wawaya jeye:

—¡Jesús Nazaret tomarapim, pana wepu warapare! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebichim? Paca yaputainchi yawa paca yaitainchi xam apara pon Nacom caitoroba, pon pepa Nentacuiruyapuxanepanaem, jei pebin pon cauri xeina.

²⁵ Jesús taitaweta, pebin taitawetatsi cauri. Jesús cauritha jeye:

—¡Moyande! ¡Barapon wepu ponde! jei Jesús cauritha.

²⁶ Barapoxonae cauri pebin naichababa exanatsi. Poxonae cauri barapo pebin bichocono wawai exanatsi, bapoxonae barapo cauri pebin wepu poinchi. ²⁷ Daxita barapomonae yabara najuntá coyene cabenaeca. Daxota nayainyaba, jeye:

—¿Eta pocotsiwa jane? ¿Jamaisa baxua mexeya pena pecuidubi coyenewa? Maisa barapo pebin Jesús bichocono peayapusá itorobi coyenewa pexinaein. Matautano caurimonae jume cowanta poxonae pocotsiwa bapon itoroba, najei barapomonae.

²⁸ Bapoxonae caena nainya daxita pomonae jionmpa Galilea nacuatha jume taerucupa pocotsiwa juinya Jesús exana.

Meje yabara poxonae Jesús axaibi exana Simón Pedro pamiyo tatsi

(Mt 8.14-15; Lc 4.38-39)

²⁹ Jesús caena nainya pona judiomonae pia penacaetutsi bo tatsi weya. Bapoxonae Jesús joniya Simón pia botha tatsi po bo xua irá Andrés pia bo tatsi. Barapo botha Santiago irá Juan

Jesús bar_u joniya. ³⁰ Simón pamiyo tatsi domae xainchi. Barapowa camatha boca. Poxonae Jesús patopa barapomonae caena nainya Jesús tsipaebatsi, jeye: “Simón pamiyo tatsi domae xainchi”, jei. ³¹ Jesús caquita pona Simón pamiyo tatsi. Bapoxonae bapowa cobe pitatsi. Barapowa asiya cuaranotatsi. Bapoxonae barapowa caena nainya taaichurucuaetsi domae. Nexata barapowa pexaewa apata barapomonaetha.

Meje yabara poxonae Jesús axaibi exana pin bicheitomona

(Mt 8.16-17; Lc 4.40-41)

³² Poxonae tabopiya tsanaicha xua quirei tsanaicha, bapoxonae jiwi Jesús tacapoinchi pomonae peatenemonaewi, ir_u pomonae caurimonae xeina. ³³ Daxita barapo tomarapiwi nacaetuta bom_ux_u boupatha. ³⁴ Jesús axaibi exana pinmonae pomonae xeina daxita coyenexi xua xoxi peatenewa. Matautano Jesús taitaweta pomonae cauri xeina. Jesús jopa copatsiyo xua pecueicueijejwa caurimonae, tsipei caurimonae Jesús cui yaputainchi.

Meje yabara poxonae Jesús cueicueijej Nacom Pejume Diwesi judiomona pia penacaetutsi bontha tatsi

(Lc 4.42-44)

³⁵ Baya poxonae caem_umbotha poxonae cataunxuae quiriquirica Jesús nacosataxuba. Bapoxonae tomara weya pona xua ichaxota jiwaibi bara beya pona. Baraxotiya Jesús tsipaebauya, Nacom tsipaebatsi. ³⁶ Nexata Simón ir_u pomonae Jesús pepuna jinompae jiwichi,

barapomonae Jesús pu barainatsi. ³⁷ Poxonae barapomonae Jesús caxibatsi, bapoxonae Jesús tsipaebatsi, jeye:

—Daxita jiwi cawenawenei, jei.

³⁸ Jesús jume nota jeye:

—Barab_u ponaeinchi icha tomaran beya, barapo tomarantha ir_u tacueicueijeinexa tsane Nacom pia pexeinya jume diwesi tatsi. Daxota apara baxua tsipatopeican, jei Jesús.

³⁹ Bapoxonae Jesús siwa pona ducuaanaeta daxita tomaran Galilea nacuatha. Judiomonae pia penacaetutsi bontha tatsi Nacom pia pexeinya jume diwesi Jesús tsipaeba barapo judiomonaetha. Matautano Jesús taitaweta caurimonae.

Meje yabara poxonae Jesús axaibi exana pon peper_u sawinchi

(Mt 8.1-4; Lc 5.12-16)

⁴⁰ Bapoxonaer_u pebin, pon peper_u sawinchi, Jesús caquita poinchi. Bapoxonae bapon pentabocototha uncua Jesús peitabaratha tatsi xua Jesús pebar_u cui itura jinaexaetsi. Bapon matowa Jesús w_ucatsi, jeye:

—Icha bara ichichipame bara caitac_upa xua axaibi tana neexanaewam, tsipei jinya neayapus_u itorobi coyenewa nexainaem, jei bapon.

⁴¹ Jesús yabara naj_unt_u coyene xeina bapon, xua peyawenaenexa. Jesús nacobe yota, bapoxonae bapon mata jayabatsi, jeye:

—Bara ichichipan. ¡Bara axaibinde! ¡Bara caaper_uxaibi exanatsi! jei Jesús.

⁴² Bapoxonae bapon nainya taaichurucuaetsi xua peperu sawiwatsi. Matautano axaibi tsanayano. ⁴³⁻⁴⁴ Bapoxonae Jesús jume daunweya itorobiya jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotepintha xua nenaitatsinexa xua bapon necataenexa xua bayatha nejumewa. Care bapontha pocotsiwa xua pecatsiwa Nacomtha, pocotsiwa bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua peru wanaem, jei Jesús.

⁴⁵ Daichitha poxonae bapon pona jopa moya yawu xainaeyo. Bapon yabara tsipaebapona ichamonaetha pocotsiwa xua bayatha peaxaibiwa. Daxota Jesús jopa itacupaetsi xua naitatsiya pata ducuanabiyi tomarantha. Daxota Jesús tomaran cuariya popona xua aisowantha. Jiwi pomonae daxita ichawan werena pona, barapomonae Jesús pia xantha tatsi tapatatsi.

2

Meje yabara poxonae Jesús axaibi exana pon pecuenobinchi

(Mt 9.1-8; Lc 5.17-26)

¹ Poxonae be caentacabiyobe yapucaewa, bapoxonae Jesús equeicha caibeya pona Capernaum tomara beya. Jiwi yopita xua pinae Jesús botha eca. ² Pin bicheito nacaetuta ichaxota po botha Jesús patopa, beya poxonae matauta

bo coibo quecona. Barapomonaetha Jesús tsipaeba Nacom pia pexeinya jume diwesi tatsi. ³ Bapoxonae pebiwi pata cuatro poyobe. Barapo pebiwi yapaparuwa capata pon pecuenobinchi. ⁴ Tsipei pin bicheito, daxota barapo pebiwi jopa itacapaetsi xua Jesús imoxoyo pecaquita ponaewatsi. Daxota barapo pebiwi bomaxutha pentatupa wereca atsa caxinaxoreca ichaxoya Jesús uncuareca. Barapo mutha deca pon pecuenobinchi yapaparuwa yorecatsi. ⁵ Poxonae Jesús yaputane xua barapomona yabara cui jume cowanta xua bara Jesús peitacapaewatsi xua axaibi peexanaewatsi pon pecuenobinchi, bapoxonae pecuenobinchitha Jesús tsipaebiya jeye:

—Tajitom cacui yabara jantemainaya juntu puxana exanatsiba abe jinya neexanae cuiru coyenein, jei Jesús.

⁶ Ichitha baraxota iru naena pomonae jiwi pecuidubiwi Moisés pia peitorobi coyene tatsi. Barapomona nanta xeinaeya najei: ⁷ “Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jiwi cacui yabara jantemainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara jantemainaya juntu puxana exanatsi abe pia peexanae cuiru coyenein tatsi”, najei. ⁸ Barapoxonae caena nainya Jesús yaputane pejuntu coyenewatha pocotsiwa barapomona pia coutha nayainyaba. Jesús jeye barapomonaetha:

—¿Eta pocotsiwa metha baraxua pana nat-sipaebame? ⁹ ¿Eta po jumetha baran tsane pecuenobinchi? ¿Metha jan tsane: ‘Jinya abe nexanae cuiru coyenein cata jantemainatsi’, jan tsane? Ichacuitha ¿metha jan tsane: ‘Nontaponde, bara pire jinya nemaituncuaewa, yawa bara ponare’, jan tsane? ¹⁰ Daxota anoxuae paca tsita itapeinya xeinaeinchi, xua xan ponxaein Nacom Tananeitapetsin, xua xeinan taayapusu itorobi coyenewa xua bara tana neitacupaewa xua jiwi tayabara cacui jantemainaya juntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bapoxonae Jesús tsipaeba pontha pon pecuenobinchi. Jesús jeye:

¹¹ —Catsipaebatsi, nontaponde. Jinya nemaituncuaewa pire. Jinya bo be-iyandeno, jei Jesús.

¹² Bapoxonae bapon caena nainya nontapona barapomonae peitatha tatsi, yawa pita xua pe-maituncuaewa. Bapoxonae bapon bo tutu weya pona barapo pin bicheito peitatha tatsi. Daxita barapomonae yabara najuntu coyene cabenaeca, yawa Nacom wuna jaintatsi, jeye:

—Maisa waxainchi bapana bayatha jopa taetsi pocotsiwa wuna pocotsiwe icha be iche, jei barapomonae.

Meje yabara poxonae Leví wabatsi, Jesús waba (Mt 9.9-13; Lc 5.27-32)

¹³ Barapoxonae Jesús pona Galilea pucua itapatha. Bapoxonae baxotiya pin bicheito pata Jesús

pia xantha tatsi. Barapomonaetha Jesús cuiduba.
¹⁴ Poxonae Jesús cataunxuae ecapona Galilea pu-
cua itapatha, bapoxonae Leví tainchi. Bapon Leví
Alfeo pexanto tatsi. Bapon Leví eca ichaxota
bapon paratixi matoma noteibeca po paratixi jiwi
bewa catsibina pon romanomonae itorobiya pia
pepa peewatsinchi. Jesús Leví tsipaebatsi, Jesús
jeye:

—Nepuna ponde, jei Jesús.

Bapoxonae Leví nontapona, yawa Jesús puna
poinchino.

¹⁵ Pirapaeyo Jesús Leví barꝯ eca pexaethopeibi-
watha, xua Leví pia botha tatsi xua Jesús
pebarꝯ xaenexatsi. Barichi Jesús barꝯ eca
pinmonae barapo pexaethopeibiwatha pomonae
paratixi pentoma noteibiwi po paratixi jiwi
bewa catsibina pon romanomonae itorobiya
pia pepa peewatsinchi nexa. Irurꝯ Jesús barꝯ
eca ichamonae pomonae abe peexanae cuiru
coyenein peexanae jiwi. Matautano Jesús
pijimonae barꝯ eca barapo pexaethopaewatha.
Pinmonae Jesús barꝯ eca tsipei pinmonae
Jesús puna poinchi. ¹⁶ Ichitha pomonae jiwi
pecuidubiwi Moisés pia peitorobi coyenewa tatsi
irurꝯ fariseomonae, daxita barapomonae Jesús
tainchi poxonae Jesús barꝯ xayeca pomonae
paratixi pentoma noteibiwi, irꝯ pomonae
abe peexanae cuiru coyenein peexanae jiwi.
Pomonae Jesús tainchi daxita barapomonae Jesús
pijimonae tatsi jeichichi:

—Maisa Jesús pon painya nepaca cacuidubin
abe exana poxoru barꝯ xayeca pomonae paratixi

penoteibiwi, matautano, baru xayeca pomonae peajantucoyenebe jiwi, jei barapomonae.

¹⁷ Poxonae Jesús jume tane baraxua, bapoxonae Jesús jume nota, jeye:

—Pomonae ba xua xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene barapomonae jame canantawenona pon jiwi peyawubin. Barichi xan patopan apara tha jopa tawabinexa tsane pomonae pejantucoyene xanepanae jiwi. Saya apara tawabinexa pomonae abe peexanae cuiru coyene peexanaewi tayawenaenexa tsane barapomonae, jei Jesús.

Meje yabara poxonae Jesús yabara yainyabatsi po coyene xua Nacom peyabara nainbotsiwatsi (Mt 9.14-17; Lc 5.33-39)

¹⁸ Caentaqueitha Juan pia pepuna jinompaewichi, iruru fariseomonae, nainbota Nacomtha xua saya pewucaenexa Nacomtha. Poxonae barapomonae nainbota, bapoxonae ichamonae Jesús siwa poinchi. Barapomonae Jesús yabara yainyabatsi barapo penainbotsi coyene. Barapomonae jeye Jestutha:

—Juan pia pepuna jinompaewichi, iru fariseomonae jopa juniya Nacom peyabara nainbotsiwatsi poxonae Nacom waqueibatsi. Ichitha jinyamonae jopa daichiyo, jopa nainbotsiyo Nacomtha xua saya pewucaenexa Nacomtha, jei barapomonae Jestutha.

¹⁹ Jesús jume nota barapomonae, jeye:

—Jiwi ba jopa bewa wecoyeya yabara nainbotsi poxonaе ichamonaе pexaewa tsinacaetuta penabanaenexa xua poxonaе pebin pecotsiwa pita. Poxonaе cataunxuae awiya bapon eca pexaewa penabanaewatha bapoxonaе jiwi ba peburaya nabane. Jopa bewa yabara nainbotsi tsane.
²⁰ Ichitha icha pon aena piowa pita, caena nainya waetabatsi, ichamonaе waetaba xua taju bapon pecaponaenexatsi, bapoxonaе jame jiwi ba bewa wecoyeya yabara nainbotsi, xua equeicha bapon caewa pepatopaewa tsane.

²¹ “Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru doroutotha, bapoxonaе barapo dorouto abe tsanaya tsipae. Tsipei poxonaе barapo dorouto matanaxuba barapo pena paparuwa natsaquetabiya. Poxonaе barapo pena paparuwa natsaquetabiya equeicha wan tsitsipanarena barapo dorouto. Bapoxonaе equeicha nama bichocono pin wan tsanaya beyacaincha xua poxonaе copiya. ²² Matautano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonaе barapo vino mera atsaxa. Barapo pena vino mera naxuba xuano barapo bocoto naxuba poxonaе barapo bocoto tsitsica. Daxota bewa jame pena vino mera eparecae pena bocototha. Bapoxonaе pena vino mera jopa naxubiyo. Yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

Meje yabara poxonaē Jesús pijimonaē tatsi yaboto nota trigo xu judiomonaē barompaya pia pentaquei seicaē mataqueitha tatsi

(Mt 12.1-8; Lc 6.1-5)

²³ Caentacabi poxonaē judiomonaē barompaya pia pentaquei seicaē matacabi tatsi, barapo mat-acabitha Jesús, iru pijimonaē tatsino pabi iyiya. Jesús pijimonaē tatsi jainpa. Barapomonaē tam-ropata notarucu pa xua yaboto xunumenapona trigo xu. Bapoxonaē pecobetha xu mata pepeta.

²⁴ Poxonaē fariseomonaē cui tane xua Jesús pijimonaē tatsi exana, bapoxonaē fariseomonaē Jesús tsipaebatsi, jeye:

—Jamaisa jinya jiwimonaē nacuita barapo mat-acabithe, poxonaē yaboto nota trigo xu. Apra jiji jopa yabara cui copatsiyo xua ichamonaē penacuichiwa barapo matacabithe xua judiomonaē barompaya pia pentaquei seicaē matacabi tatsi, jei fariseomonaē.

²⁵ Jesús jume nota, jeye:

—Barapomonaē tajiwiwimonaē jopa apra abe exanaeyo. ¿Jopa payabara yorobim pocotsiwa bayatha David exana poxonaē jainpa, poxonaē iru pijimonaē tajainpatsiru? Bapon David, pon caena bayatha israelmonaē itorobiya pia pepa peewatsinchi. ²⁶ Bapon David, iru pijimonaē tatsi, barapomonaē jojoniya Nacom pin pia botha tatsi poxonaē pon pewun Abiatar tanacuita Nacom. Bapon Abiatar sacerdotemonaē pia pepa pentacaponaein tatsi. David xane pan, po pan ichamonaē cana exana xua Nacom pecatsiwatsi. Iru barapo pan David pijimonaē cata xua pex-aenexaru. Barapomonaē xane bequein bara Na-

com pia peitorobi coyenewatha copata xua saya meisa sacerdotemonae itacupatsi xua pexaewa tsane barapo pan, jei Jesús.

²⁷ Equeicha Jesús namchi, jeye:

—Nacom, jiwi pew_hnaeya taexanatsi pentaquei seicae matabi. Barapo pentaquei seicae matabi Nacom tsiexana jiwi, xua barapo matabitha jiwi penafinacaewatsinexa. Nacom jopa ainya cui cana exanaeyo pentaquei seicae matabi xua beyacaincha jiwi. ²⁸ Daxota xan ponxaein Nacom tana neitapetsixae xeinan taitorobi coyenewa xua jiwi tacoya taitorobiwa pentaquei seicae matabitha, jei Jesús fariseomonaetha.

3

Meje yabara poxonaes Jesús cobe w_hnae exana pon pecobe m_hbinchi

(Mt 12.9-14; Lc 6.6-11)

¹ Jesús equeicha joniya judiomonaes pia penacaetutsi botha tatsi. Baraxota pon pecobe m_hbinchi eca. ² Barichi pomonaes jiwi pecuidubiwi Moisés pia peitorobi coyene tatsi, ir_h fariseomonaes baxota ena. Daxita barapomonaes Jesús necotenatsi pecui taenexatsi icha bara metha Jesús cobe w_hnae exanaena pentaquei seicae mataqueitha pon pecobe m_hbinchi. Icha Jesús pon pecobe m_hbinchi axaibi exanatsi, bapoxonaes barapomonaes xeinaena po coyenewa xua Jesús abe peyabara paebiwatsi tsainchi. ³ Bapoxonaes Jesús barai pontha pon pecobe m_hbinchi, jeye:

—Nontaponare. Uncuare xote, jei Jesús.

4 Pomonae Jesús tainchi Jesús barai barapomonae, jeye:

—Paca yainyabinchi, ¿eta xua copata pentaquei seicae matabitha? ¿Wɛnae jampa? ¿Abe jampa? ¿Eta xua metha tsipae? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

Ichitha barapomonae jopa jume notsiyo, saya moya umena. 5 Nexata Jesús necota barapomonae. Anaya Jesús caseba barapomonae. Matautano jɛntɛ coyene wecoyei, tsipei barapomonae jopa beyaputaeyo pocotsiwa bapon exana. Jesús barai pon pecobe mɛbinchi:

—Nacobe doire, jei Jesús.

Bapon nacobe doita. Bapoxonae bapon nainya cobe wɛnae tsanaya. 6 Bapoxonae fariseomonae Jesús weya ponarɛcɛpa. Bapoxonae barapomonae nacaetuta Herodes pijimonaetha tatsi xua pecui yabara paebinexatsi xua po cui coyenewatha Jesús pebexubiwa tsainchi.

Meje yabara poxonae pin bicheito nacaetuta Galilea pucua itapatha

7 Jesús pijimonae barɛ pona Galilea pucua itapa beya. Irɛrɛ pin bicheitomonae Jesús puna poinchi pomonae Galilea nacua weya pona. 8 Irɛrɛ pomonae Judea nacua werena pona irɛrɛ pomonae Jerusalén tomara werena pona, daxita barapomonae Jesús puna poinchi. Irɛrɛ Idumea nacuapiwi Jesús puna poinchi. Irɛrɛ ichamonae Jesús puna poinchi pomonae icha muxunenetha jinompa xua Jordán mentha.

Irurũ Tiro tomarapiwi Jesús puna poinchi. Irurũ Sidón tomarapiwi Jesús puna poinchi. Daxita barapo bicheito Jesús itata patatsi poxonaexana. ⁹ Tsipei pin bicheito, daxota Jesús pijimonae itoroba xua jera petaxawenaewa tsainchi xua petsaquibabiyainwatsi barapo pin bicheito. ¹⁰ Yaitama Jesús axaibi exaneiba pin bicheito pomonae atenemonae, daxota irũ ichamonae Jesús imoxoyo caquita poinchi. Barapomonae ichichipa xua Jesús pejayabiwatsi xua barapomonae irũ axaibi peexanaenexatsirũ.

¹¹ Pomonae caurimonae pexeinaewi, poxonaexana barapomonae Jesús tainchi, barapomonae pentabocototha umena Jesús peitabaratha tatsi. Barapomonae wawaya jeye xua caurimonae wawai peexanaexaetsi:

—¡Maisa bara xam Nacom Pexantom! jei barapomonae xua wawaya exanatsi caurimonae.

¹² Jesús jume daunweya itoroba barapomonae, jeye:

—Jopa pana neyabara paebinde ichamonaetha xua xan Nacom Pexanton, jei Jesús.

Meje yabara poxonaexana Jesús itapetsiya waba pia peitorobi jiwi tatsi pomonae xua doce poyobe (Mt 10.1-4; Lc 6.12-16)

¹³ Bapoxonaexana Jesús demxuwatha pona. Barapo demxuwatha Jesús waba pomonaetha xua peichichipaexae xua itapetsiya waba. Barapoxonaexana barapomonae Jesús pia xantha tatsi tapatatsi. ¹⁴ Jesús itapetsiya waba doce poyobe xua pomonae pebarũ jinompaenexatsi.

Matautano barapomonaē Jesús itoroba xua daxita jiwitha petacueicueijeinexatsi Nacom Pejume Diwesi. ¹⁵ Barapomonaetha Jesús cata pia peayapus̃ itorobi coyenewa tatsi, xua cauri ichamonaē petaitawetsinexatsi pomonaē xua cauri pepuna jinompaewichi. ¹⁶ Meje barapomonaē pew̃nxi tatsi pomonaē Jesús waba: Simón pon icha w̃n w̃n dutatsi “Pedro”, baraichi. ¹⁷ Ich̃n pew̃n Santiago. Ich̃n pew̃n Juan pon Santiago peweicho tatsi. Baraponbe Zebedeo pexantobe tatsi. Baraponbetha Jesús icha w̃n w̃n dutabe “Boanerges” jei (xua po w̃ntha xua jei: “Yam̃x̃m pexantobe tatsi”, jei). Barapo w̃n w̃n duta tsipei peaj̃nt̃mcoyenes̃nbe. ¹⁸ Ich̃n pew̃n Andrés. Ir̃a ich̃n pew̃n Felipe. Ir̃a ich̃n pew̃n Bartolomé. Ir̃a ich̃n pew̃n Mateo. Ir̃a ich̃n pew̃n Tomás. Ir̃a ich̃n pew̃n Santiago pon Alfeo pexanto tatsi. Ir̃a ich̃n pew̃n Tadeo. Ir̃a ich̃n pew̃n Simón pon celotemonaepin. ¹⁹ Ir̃a ich̃n pew̃n Judas Iscariote. Barapon Judas pon Jesús caenaetaxubatsi ichamonaetha pebexubinexatsi.

Meje yabara poxonaē Jesús baraichi xua pinae xeina Beelzebú pia peayapus̃ itorobi coyenewa tatsi

(Mt 12.22-32; Lc 11.14-23; 12.10)

²⁰ Bapoxonaē Jesús, ir̃a pomonaē pia peitapet-siwi tatsi botha jojoniya. Bapoxonaē equeicha pin bicheito nacaetuta Jesús pia xantha tatsi. Daxota Jesús ir̃a pijimonaē tatsi jopa itac̃upaetsi xua pen-abanaewa tsane. ²¹ Jesús piamonaē matab̃x̃yo tatsi jume tane xua jiwi paeba xua pinae juinya

Jesús matayaibatsi. Daxota barapomonae pata, xua Jesús pewaetabinexatsi, xua pia bo beya pecaponaenexatsi.

²² Matautano pomonae jiwi pecuidubiwi Moisés pia peitorobi coyene tatsi, pomonae Jerusalén werena pona, barapomonae jiwitha jeye Jesús yabara: “Bapon caurimonae itawetatsi, apara pexeinaexae Beelzebú pia peayapusu itorobi coyene tatsi, pon caurimonae pia pentacaponaein tatsi”, jei barapomonae pomonae jiwi pecuidubiwi Moisés pia peitorobi coyenewa tatsi.

²³ Bapoxonae Jesús waba barapomonae pia xainya berena. Yawano Jesús pecayabara juta pepaebi diwesiyo tsipaeba, jeye: “Caurimonae pia pentacaponaein tatsi jopa itacupaetsi xua peitawetsiwa icha caurimonaetha, xua pecae caurimonaexae. ²⁴ Icha cae nacuapiwi nawepu tsatabe xua matauta nababe, bapoxonae jopa xaexaenaecaeyo. ²⁵ Matauta iruru icha cae bo matabuxuyomonaebe nababe yawa nawepu tsatajopabe, bapoxonae jopa xaexaenaecaeyo. ²⁶ Barichi icha Satanás, pijimonae tatsi nawepu tsatajopabe matautano xua nababe, bapoxonae jopa xaexaenaecaeyo. Satanás jopa itacupaetsi xua itoroba pijimonae, tsipei amsiya exana.

²⁷ “Dapon ajibi, pon itacupaetsi xua botha joniya po botha pon bichocono maxu daunwei pia bo tatsi xua daxita notsina pocotsiwa bapon xaina pon maxu daunwei icha jopa copiya matha maxu cutanotsiyo.

²⁸ “Bara xaniyeya paca tsipaebatsi. Pocotsiwa

jiwi abe peexanae cuiru coyenein exana, matautano pocotsiwa xua jiwi abe paeba, barapo coyenein Nacom itacupatsi xua yabara jumentainaena xua barapo jiwi abe exana. ²⁹ Pon abe yabara paeba Nacom pia Pejumope tñax̃ tatsi, Nacom bapana jopa yabara jumentainae tsane xua bapon paeba. Bara bapon ataya atene tsane ichaxota jopa itacounayiyo isoto xua bapon abe peexanaexae”, jei Jesús.

³⁰ Jesús baraxua paeba, tsipei pomonae jiwi pecuidubiwi Moisés pia peitorobi coyene tatsi barapomonae bayatha naerabiya paeba xua pinae Jesús cauri xeina. Ichitha pon Jesús xeina apara Nacom pia Pejumope tñax̃ tatsi. Daxota barapomonae Nacom pia Pejumope tñax̃ tatsi tsita natsicuentatsi, tsipei Nacom pia Pejumope tñax̃ tatsi abe yabara paebatsi.

Meje yabara Jesús pena tatsi, ir̃r̃r̃ peyapin jiwi tatsino

(Mt 12.46-50; Lc 8.19-21)

³¹ Pirapae Jesús pena tatsi, ir̃r̃r̃ peyapin jiwi tatsi pata Jesustha. Ichitha barapomonae pesato beumeinya. Bapoxonae najume caruta ichamonaetha xua petawabinexa tsainchi Jesús.

³² Po bicheito Jesús matawacaicha enatsi, barapomonae Jesús tsipaebatsi, jeye:

—Ena, ir̃r̃r̃ neyapin jiwino, pesato beya umena. Bepara bequein cataei. Bepara bequein catsipaebei, jei.

³³ Ichitha Jesús jume barai barapomonae, jeye:

—¿Jintam powa be taena natsicotanera? ¿Jintam pomonae be tayapin jiwi natsicotanera? jei Jesús.

³⁴ Bapoxonae Jesús necota pomonae pematawacaicha enaewichi. Jesús jeye:

—Barapomonae pomonae xote umene apara be taena tsicotan, matautano be tayapin jiwi tsicotan.

³⁵ Pomonae exana pocotsiwa Nacom itoroba, pon peitabocotha peecaeinxae, barapomonae be tayapin jiwi tsicotan, matautano iru be tayapixi tsicotanno, matautano iru be taena tsicotanno, jei Jesús.

4

Meje yabara poxonae Jesús cuiduba jiwi pecayabara juta pepaebi diwesiyo xua pon peabin yabara

(Mt 13.1-9; Lc 8.4-8)

¹ Equeicha Jesús tamropata pitaba xua cuiduba Galilea pucua itapatha. Bapoxonae pin bicheito nacaetuta ichaxota Jesús cuidubuncua. Tsipei pin bicheito daxota Jesús jeratha nontabiya xua peecaenexa, po nae mentha ducuiya. Barapo pin bicheitomonae taetabo itapatha umena.

² Jesús barapomonaetha cuiduba pecayabara juta pepaebi diwesintha.

Poxonae Jesús cuiduba barapomonae, jeye:

³ “Pana nejume naitaeware barapo diwesiyo: Peabin pon peabin ponataba pia ubichi pabitha.

⁴ Poxonae pon peabin ubauya, icha xu namtotha othopeica. Pepupunaewi yapata. Bapoxonae barapo xu xu xane. ⁵ Icha xu, xu othopeica ibowantha ichaxota xua ira itafafana. Barapoxonae barapo xu caena nainya xu xuwa, tsipei jopa tajru xu xuwarecaeyo. ⁶ Ichitha poxonae

xometo atsa tsina, bapoxonae yaboto tsaquiwa yawa tupa tsipei jopa taj̃ tab̃ opina xuware-caeyo. ⁷ Icha xu, xu othopeica ichaxota pesoiban xuwinaena. Barapo xu yaboto nanta capanaba poxoru yawa muxuna xuwina pesoiban. Daxota barapo xu jopa xu nacoichiyo. ⁸ Icha xu, xu othopeica ichaxota ira w̃nae. Poxonae barapo xu, xu xuwa, xu naw̃naeta. Icha xun, xu nanacoitapona treinta po xu matab̃x̃yobe tsiniya. Icha xun, xu nanacoitapona sesenta po xu matab̃x̃yobe tsiniya. Icha xun, xu nanacoitapona cien po xu matab̃x̃yobe tsiniya”, jei Jesús barapo pin bicheitomonaetha.

⁹ Equeicha Jesús jeye: “Icha pamuxu dubename, moya pana nejume naitaeware pocotsiwa tapaca tsipaebi watsi”, jei Jesús poxonae pijimonae muxuconaquiya tsipaeba.

*Meje yabara poxonae Jesús namchi xua exua metha pecayabara j̃ta pepaebi diwesin
(Mt 13.10-17; Lc 8.9-10)*

¹⁰ Nexata poxonae Jesús pipatotha eca, bapoxonae bar̃ eca pomonae pia pepuna ponaewichi, ir̃no pijimonae tatsi pomonae doce poyobe. Barapomonae Jesús yainyabatsi jeye: “¿Eta pocotsiwa yabara caunutame poxonae barapo pecayabara j̃ta pepaebi diwesiyo cuidubame?” jei barapomonae. ¹¹ Jesús jume nota barapomonae, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyaw̃n xeinaewa. Barapo moya peyaw̃n xeinaewa apara xua Nacom paca cana exana xua painya nepaca

itacupaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha meisa jame ichamonae pomonae jopa nejume cowantsiyo jopa daichichi. Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara juta pepaebi diwesintha, xua Nacom peyabara yaputaenexatsi. ¹² Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. Poxoru bapomonae jopa icha juntu coyene xeinaeyo Nacomtha, daxota barapomonae Nacom tsita natsicuentatsi abe petsita exanaexaetsi xuano Nacom jopa yabara junteinaeyo abe pia peexanae coyenein tatsi”, jei Jesús.

Meje yabara poxonae Jesús pijimonae muxu yaputane exana po diwesi xua pecayabara juta pepaebi diwesiyo, pon peabin yabara (Mt 13.18-23; Lc 8.11-15)

¹³ Equeicha Jesús barapomonaetha muxu tsipaeba, jeye: “Tsipei jopa payaputaem po pecayabara juta pepaebi diwesiyo xua peabin yabara paeban daxota jopa payaputaemtsipae bequein ainya pecayabara juta pepaebi diwesin paca tsipaebichipatsi. ¹⁴ Paca tsipaebatsi pecayabara juta pepaebi diwesiyo xua iche: Pon peabin jupa, icha be ichi pon Nacom Pejume Diwesi pepaebi ducunaebiyaein. ¹⁵ Po xuton xua

namto beothopiya, aichurubenaē. Barapo xuton yabara caunuta xua jiwi bara j̃nt̃ weichichi caurimonae pia pentacaponaein tatsi, pon Satanás. Jiwi j̃nt̃ coyene weajumetsurubenaē exanatsi Nacom Pejume Diwesi xua bayatha po jume jume tane, xua bapoxonae jopa petajume cow̃ntsinexa tsainchi Nacom, yawa xua jopa petanacapanenebiyaenexa tsainchi Nacom beya, xua Nacom exanaena. 16-17 Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi, xuano j̃nt̃ coyene weiweinaya Nacom jume cow̃ntatsi. Ichitha bara caeto jume cow̃nta, poxoru barapomonae aj̃nt̃faetabiya jume jeba Nacom Pejume Diwesi pej̃nt̃ coyeneintha. Poxonae yaitama barapomonae bichocono peatenexae, matautano poxonae barapomonae yaitama abe petaexanaexaetsi ichamonae xua pejume cow̃ntsixae Nacom, bapoxonae caurimonae abe exana barapomonaetha, xua barapomonae j̃nt̃ coyene wej̃nt̃emaina exanatsi xua Nacom pecayabara j̃nt̃emainawatsi. 18-19 Po xuton xua xu othopeica pesoiwantha, barapo xuton caunuta xua pomonae Nacom Pejume Diwesi jume tane, ichitha saya barompaya pia j̃nt̃ coyeneyatha jinompa, yawa saya u copei cayabara nanta xeina, yawa saya exana pocotsiwa j̃nt̃ coyene weiweina cana exainchi. Po coyene pebiwi exana baxuan bara j̃tiya ichiya exana xua po xuton be pesoiwantha othopiya. Barapo xuton jopa thei dubenaeyo. Barapocotsi j̃ta coyeneya ichi, barapo jiwi. Jopa xanepanaya

jinompaeyo Nacom nexa. ²⁰ Po xuton xua xu othopeica peira wunaewatha, bara nacoita. Barapo xuton yabara caunuta pomonae jume tane Nacom Pejume Diwesi, matautano jume cowantano poxoru juntu coyene xanepanaya jume tane. Matautano beta exana dubenanaebiya beya matapainya jiwi cui tane xua barapomona juntu coyene xanepana Nacom peitabaratha tatsi. Bapoxonae ichamona barapomona jiwana beta yawena ichamonaetha icha barapo xuto ichi xua treinta po xu matabuxuyobe tsiniya tsoponae. Matautano ichamona barapomona jiwana beta yawena ichamonaetha icha barapo xuto ichi xua sesenta po xu matabuxuyobe tsiniya tsoponae. Matautano ichamona barapomona jiwana beta yawena ichamonaetha icha barapo xuto ichi xua cien po xu matabuxuyobe tsiniya tsoponae”, jei Jesús.

Meje yabara poxonae Jesús pijimona tsipaeba pecayabara juta pepaebi diwesiyo xua pecoicha yabara

(Lc 8.16-18)

²¹ Equeicha Jesús barapomonaetha tsipaeba, jeye: “Poxonae jiton pecoicha, coicha exana, bapoxonae jopa coicha matakatsiyo cajatha. Yawa jopa coicha exanaeyo cama peupana deca. Jame asiya coicha exanatsi, xua pecoicha taenexa pomonae jojoneibarena. ²² Daxita pocotsiwa xua moya peyawun xeinaewa bexa tsane jiwi yabara yaputaena. Barichi po diwesi xua pecayabara juta pepaebi diwesi xua paebapona jiwi barapo diwesi jiwi itacupaeinchi xua peyabara

yaputaewa tsane. ²³ Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús poxonaе pijimonae muxuconaquiya tsipaeba.

²⁴ Equeicha Jesús barapomonae barai, jeye: “Pana nejume naitaeware painya neexanaenexa pocotsiwa paca tsipaebatsi. Icha ichamonae daunweya payabara paebiname penatsicuentsiwa xua abe peexanaexae Nacom barichi daunweya paca yabara paebina painya nenatsicuentsiwa xua abe painya neexanaexae. Matautano equeicha ichawano mataropeicha paca catsina. ²⁵ Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonaе bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

Meje yabara poxonaе Jesús pecayabara j̣ta pepaebi diwesiyo paeba xua pẹbi xuto yabara

²⁶ Nexata equeicha Jesús namchi, jeye: “Yabara paca cuidubatsi po coyene xua Nacom itoro-biya ewata piamonae. Barapo coyene bara j̣ta coyeneya ichi, icha pebin ichi poxonaе pẹbi xu xu bebeya. ²⁷ Poxonaе nacobe weta xua ̣ba, bapoxonaе pabi weya pona. Bara be-quein bapon jopa yawenaeyo xua barapo xuton xuxuwapona mataqueitha, merawithano poxonaе pebin maitequeiba, daichitha awiya barapo

xu xuxuwapona. ²⁸ Daxota barapo xu xuxuwapona tsipei ira yawena xua barapo xu xuxuwapona. Copiya pepaboto xuwina, bapoxonae pepato naexana. Bapoxonae pepa xu xu dubena xua bichocono ахучу. ²⁹ Poxonae pepa xu xu naweta barapo matabitha pebin pona xua penotsinexa pocotsiwa naweta”, jei Jesús.

Meje yabara poxonae Jesús cuiduba pecayabara j̣ta pepaebi diwesiyo po peɓbi xutiyo pew̃n mostaza xutiyo

(Mt 13.31-32; Lc 13.18-19)

³⁰ Jesús barapomonae tsipaeba, jeye: “Poxonae Nacom waba jiwi xua petanaexanaenexatsi piamonae tatsi pomonae itorobiya peewatsixae, ¿eta po coyene nacoyene j̣pabe? ¿Eta xua paca cuidubinchi xua baxua yabara? ³¹⁻³² Nacom pijimonae tatsi mataropeicha bichocono pinmonae tsoponae xua pomonae jume cow̃ntapona Nacom. Baraxua icha be mostaza xutiyo ichi po xutiyo bichocono tsica xutiyo beyacaincha xua icha pethei xutiyo. Barapo mostaza xutiyo pebin ɓba pia pabitha. Xuwa beya pin nae tsoponae. Pepinnaexae daxota siri cotton exana pe-max̃ranantha. Icha mostaza xutiyo ichi xua beya pin nae tsoponae, bara j̣ta ichi Nacom pejume cow̃ntsiwichi, pomonae bapon itorobiya peewatsixae. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

Meje yabara poxonae Jesús cuiduba jiwi pecayabara j̣ta pepaebi diwesixitha

(Mt 13.34-35)

³³ Jesús jiwitha ainya pecayabara j̃ta pepaebi diwesixi tsipaeba poxonaē cuiduba Nacom Pejume Diwesi, icha barapocotsi diwesixi ichi xuaunxuae po diwesixi paeba. Awiya cuidudubapona beya poxonaē barapomonaē xainwaicha yaputane. ³⁴ Saya meisa barapomonaetha Jesús cuidubeiba pecayabara j̃ta pepaebi diwesixi coyenexitha. Poxonaē Jesús meisa pijimonaē bar̃ eca, bapoxonaē Jesús pijimonaē yabara muxu yaputane exana pecayabara j̃ta pepaebi diwesixi coyenexi.

Meje yabara poxonaē Jesús xainya ducuanaya exana joibo, yawa maratsacano xainya mene ducuanaya exanano

(Mt 8.23-27; Lc 8.22-25)

³⁵ Barapo mataqueitha poxonaē quirei tsanaicha Jesús pijimonaē tsipaeba, jeye:

—Antha poinchi icha muxunene beya, pucua beicha, jei Jesús.

³⁶ Bapoxonaē Jesús pijimonaē bar̃ wepu pona barapo pin bicheito. Bapoxonaē Jesús pijimonaē bar̃ poinchi jeratha, po jeratha Jesús cuidubeca barapo pin bicheito. Barichi icha jeranno napo-nano. ³⁷ Bapoxonaē mentha jemeicha naetaba pin joibo. Maratsacan jeratha mene othopa, muxu jera pebunarecae. ³⁸ Ichitha Jesús jera tafetha maituncua, nantasipa ỹỹutuncua paparuwatha xua xota nacuenacuena. Jesús pijimonaē yãbatsi, jeichichi:

—Pon pata Necuidubin, ¿jopa catsita ainya cuiyo xua waxainchi bunathopaeinchi? jei barapomonaē.

³⁹ Bapoxonae Jesús asiya uncua, yawa joibo itawetaxuba. Jesús jeye maratsacantha:

—¡Barande, bara xainya mene ducuanayama! jei Jesús.

Bapoxonae joibo caewanaya, yawa mene xainya ducuanaya. ⁴⁰ Nexata Jesús barai pijimonae, jeye:

—¿Eta pocotsiwa metha bichocono pajunuwame? ¿Cataunxuae jopa pana nejume cui yabara jume cowantsim xua bara tana neitacupaewa xua tapaca yawenaewatsi? jei Jesús.

⁴¹ Barapomonae bichocono najuntu coyene cabenaeca, yawa caemonae natsipaeba najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dubenanaya! najei barapomonae.

5

*Meje yabara xua pebin pon caurimonae xeina
pon Gerasa nacuapin*

(Mt 8.28-34; Lc 8.26-39)

¹ Jesús, iru pijimonae tatsi pata icha muxunene beya xua barapo pucuathiya. Po iratha Jesusbaru pata barapo ira pewun Gerasa nacua. ² Poxonae Jesús jera wenontouna bapoxonae patopa pebin pon caurimonae xeina. Bapon ibo wou weya patopa Jestutha. ³ Barapo pebin poponeiba ibo wountha. Dapon aibi pon itacupatsi xua bapon pecutsiwatsi, matautano metha bequein penaintotha tsipae. ⁴ Bapon matowa penaintotha taxu cাবেibatsi, yawa maxu cাবেibatsi xua

bapon peyapucaeneibinexa tsainchi. Daichitha bapon barapo nain nain epa xuneiba. Dapon aibi xua bapon pecui amanayabiwatsi. ⁵ Barapon mataqueitha poponeiba, yawa merawitha poponeiba. Matautano atororotha yawa ibo wountha wawai tsopoponeibi. Matautano ibotixitha pia coutha nathabeiba. ⁶ Poxonae barapo pebin Jesús tajꞰ taebatsi, bapoxonae cuinaepona Jesús beya. Bapon pentabocototha uncua Jesús peitabaratha tatsi xua Jesús pebarꞰ cui itura jinaexaetsi peainya cuinxae. ⁷ Bapon wawaya jeye Jesustha:

—Jesús pon Nacom Pexantom, pon peitabocotha eca, ¿eta pocotsiwa metha taxantha patopame? Jume daunweya cabaraichi jopa neperaxa exanaeinde, jei.

⁸ Bapon baxua paeba tsipei Jesús copiya namchi, jeye:

—¡Caurimonae pam, bapon pawepu ponare! jei Jesús.

⁹ Jesús yainyaba bapontha:

—¿Eta po wꞰm? jei.

Bapon jume nota jeye:

—TawꞰn Ayei, tsipei paxan caurimonae pan ayei jiwi pan, jei bapon xua paeba exanatsi caurimonae.

¹⁰ Barapo caurimonae Jesús muxu fayacotatsi xua bepa pinae barapomonae jopa bewa itawetichi icha nacua beya. ¹¹ Ichaxota imoxoyo peitapatororotha baxota jinompa pin marranomona. Barapo marrano duweimonae xayompa peitapa tororotha. ¹² Caurimonae Jesús wꞰcatsi, jeye:

—Icha pana itawetame, moya pana nepu copabare marrano duweimonaetha, jei caurimonae.

¹³ Bapoxonae Jesús copata xua bara caurimonae ponaena marrano duweimonaetha pebin weya. Barapo marranomonaе дѣца. Pin pitapatororo othopareca. Pucuatha bunothopa. Yawa caurimonae cabunathopatsi. Barapo marranomonaе dos mil po duweimonaеbe.

¹⁴ Bapoxonae pomonaе peyapu eenaewi marranomonaе, barapomonaе bichocono junuwiya cuinaepona tomara beya, jiwi petsipaebinxatsi baxua yabara, yawa jiwi petsipaebinxatsi tomara cuariya beya. Bapoxonae jiwi pata petaenexa pocotsiwa Jesús cana exana pebintha. ¹⁵ Poxonae barapomonaе pata Jesustha, bapoxonae barapomonaе tane pebin pon bayatha cauri xeina. Barapo pebin moya eca, paparuwa nama xatatano, matautano jantema eca. Bapoxonae barapomonaе bichocono junuwa. ¹⁶ Pomonaе bayatha tane xua pocotsiwa Jesús bayatha cana exana pebintha, pontha pon cauri xeina, baxua yabara paeba ichamonaetha pomonaе pata. Matautano yabara paeba pocotsiwa Jesús cana exana marrano duweimonaetha. ¹⁷ Bapoxonae barapomonaе tamropata notarѣца xua Jesús itawetatsi, jeye: “Maisa bewa warapaename Gerasa nacua weya, po nacua pata nacua weya”, jei barapomonaе.

¹⁸ Poxonae Jesús jeratha nontabiya, bapo pebin pon bayatha caurimonae xeina, bapon Jesús wѣcatsi xua bepa pinae Jesús puna ponaetsi.

¹⁹ Ichitha Jesús jopa copatsiyo xua pepuna pon-aenexa tsainchi bapon. Saya jame Jesús bapontha jeye:

—Maisa jinya bo beya ponare ichaxota jinya-monae matabuxu^uyo beya. Barapomonaetha tsi-paebare daxita pocotsiwa Nacom cacana exana. Matautano barapomonaetha tsipaebare xua Nacom bara cayabara najuntu^u coyene xeina pia necayawenaenexa, jei Jesús.

²⁰ Bapoxonae barapo pebin ponataba. Matautano tamropata pitaba xua cueicueijei daxita pocotsiwa bayatha Jesús cana exana bapontha. Barapon baxua tsipaeba Decápolis tomarantha, po tomaran xua diez po tomaranbe xua imoxoyo nacacuita ena. Daxita jiwi barapo tomaran najuntu^u coyene cabenaeca poxonae jume tane xua barapon paeba.

Meje yabara xua poxonae Jairo pexantiyo taax-aibi exanatsi; yawa yabara xua bapoxonae iru^u icha yabuxu^uyo axaibi exanatsi poxonae Jesús pia paruwa tajayabatsiru^u

(Mt 9.18-26; Lc 8.40-56)

²¹ Poxonae Jesús caibeya pona jeratha icha muxunene beya pucua iya, bapoxonae pin bicheito Jesús pia xantha tapatatsi pitapatha.

²² Bapoxonae caein patopa pon judiomonae pia penacaetutsi bo tatsi pecanamataxeinaewi jiwanamonaepin. Bapon pewuⁿ Jairo. Poxonae bapon Jesús tainchi, Jesús peitabaratha tatsi pentabocototha tauncuatsi. ²³ Bapon Jairo bichocono Jesús wucatsi. Jairo jeye:

—Taxantiyo muxu imoxoyo petupae. Anetha, inta taxantiyo necobetha mata jayabare, axaibi jinya neexanaenexa tsane. Bapoxonae inta asu pepoponaenexa tsane, jei Jairo.

²⁴ Bapoxonae nexata Jairo Jesús puna pona. Pin bicheito Jesús puna poinchi, yawa barapo bicheito tsaquibabatsi. ²⁵ Barapo pin bicheitha iru napona yabuyo powa atene. Barapowa caena bayatha beya yadoce po weiyobe jopa xua pentabu janatha boca xua be nantawane. ²⁶ Barapowa bichocono atene tsaibi bequein siwa poneiba pomonaetha pomonae peyawabiwi jiwi. Barapomonae bapowa daxita cobe matapaeteibatsi paratixi xua bapowa peyawabixaetsi, daichitha bapowa jopa yawenaetsi baxua. Saya equeicha bichocono abe tsoponae bapowa. ²⁷ Poxonae bapowa jume tane xua pinae juinya Jesús axaibi exana jiwi, bapoxonae bapowa imoxoyo caquita uncuataba Jesús peputha tatsi xua pin bicheitha. Barapowa Jesús pia paparuwa tatsi tajayabatsi xua peopirawa. ²⁸ Barapowa pia coutha natsipaeba, najei: “Icha saya Jesús pia paparuwa tajayabin, bapoxonae axaibin tsane”, najei. ²⁹ Poxonae barapowa tajayaba Jesús pia paparuwa tatsi, bapoxonae caena nainya bapowa ajaneibi tsanareca. Bapowa pia coutha nayaputane xua bayatha axaibi. ³⁰ Jesús pia coutha nayaputane xua ichan axaibi peexanaewatsi, tsipei pia pepon weya taajiwanatsurucuaetsi pia peayapusu itorobi coyenewa tatsi. Bapoxonae Jesús napatomeicha necota jiwitha, jeye:

—¿Jintam inta paparuwa jayabara? jei Jesús.

³¹ Nexata Jesús pijimonae jume notatsi, jeye:

—Apara xam bayatha taneme xua pin bicheito catsaquibaba. ¿Eta xua metha pana yainyabame: ‘¿Jintam metha inta paparuwa jayabara?’ jam? jei pijimonae tatsi.

³² Ichitha Jesús daxita jupaya tane peyaputaenexa pon pejayabiwatsi. ³³ Barapowa bichocono junuwa, tsipei yaputane xua barapowa Jesús jayabatsi poxonaе axaibi exanatsi. Barapowa jijiyeya patopa Jesustha, yawa pentabocototha uncua Jesús peitabaratha tatsi xua Jesús pebaru cui itura jinaexaetsi peainya cuinxae. Barapowa bara xainyeya paeba daxita pocotsiwa xua exana. ³⁴ Jesús jeye barapowatha:

—Yabuyo, caaxaibi exanatsi tana neyabara jume cowantsixaem xua bara tana neitacupaewa xua tacaaxaibi exanaewatsi. Saya junte miya poponde. Bara axaibim tsaibim tsane xua bara nepu tsitecae tsane, jei Jesús.

³⁵ Poxonaе Jesús cataunxuae cueicueijei tsuncuae barapowatha, bapoxonaе pata pomonaе Jairo pia botha petanacuichi jiwichi. Bapon Jairo pecanamataxeinaein judiomonaе pia penacae-tutsi bo tatsi. Barapomonaе jeye Jairotha pon pexantiyo taatenetsi:

—Nexantiyo bayatha cata tupa. ¿Eta xua metha came fayacotame pon jiwi Pecuidubin? jei barapomonaе.

³⁶ Bequein bara baxua Jesús jume tane, ichitha baxua Jesús jopa jume naitaewatsiyo. Jesús jeye Jairotha:

—Jopa junuwinde, saya maisa nejume cowande, jei Jesús.

³⁷ Bapoxonae Jesús jopa copatsiyo xua pepuna ponaewatsi tsainchi ichamonae. Saya meisa Jesús copata, xua pepuna ponaenexa tsainchi Pedro, iru Santiago iru Juan pon Santiago peweicho tatsi. ³⁸ Poxonae Jesusbaru pata Jairo pia botha tatsi, bapoxonae Jesusbaru tane pin bicheito xua ajumeyaexa. Barapomonae bichocono wecoyei, yawa wawai xua Jairo pexantiyo petatupaexaetsi. ³⁹ Bapoxonae Jesús joniya botha, yawa tsipaeba barapomonaetha, jeye:

—¿Eta pocotsiwa metha paajumeyaexam, xua yawa pawecoyam? Barapo pexuyo apara jopa tupaeyo, apara maituncua, jei Jesús.

⁴⁰ Ichitha barapomonae Jesús jume cui caponatsi. Nexata barapo pin bicheito Jesús pesato beitaweya. Meisa saya Jesús baru joniya coxiyan, coxiwano ichaxota Jairo pexantiyo tatsi petupaeyo tabocatsi. Matautano Jesús pijimonae baru joniya poyobe acoibi poyobe. ⁴¹ Barapowayo Jesús cobe pita, yawa jeye:

—Talita, cum, jeichichi (xua apara jeichi: “Yabuyo, asiya uncuare, catsipaebatsi”, jei Jesús.)

⁴² Barapoxonae barapowa caena nainya non-tapona, powa xua doce po weibe xeina powayo Jairo pexantiyoxae tatsi. Barapowa asiya uncua, yawa itacupatsi xua peponaewa. Barapoxonae barapo pin bicheito poxonae baxua Jesús cui tainchi najuntu coyene cabenaeca. ⁴³ Bapoxonae Jesús jume daunweya itoroba jiwitha xua baxua

jopa peyabara paebinxatsi ichamonaetha pocot-siwa Jesús cana exana barapowayotha. Bapox-onae Jesús itoroba xua barapo pexuyo bara peapatsiwa tsainchi pexaewa.

6

Meje yabara poxonae Jesús Nazaret tomaratha popona

(Mt 13.53-58; Lc 4.16-30)

¹ Nexata Jesús Capernaum tomara weya warapa, equeicha caibeya pia tomara beya warapa xua Nazaret tomara beya. Irurú Jesús pijimonae puna poinchi. ² Poxonae judiomonae barompaya pia pentaquei seicae matakabi tatsi tsuxubi, barapo matakabitha Jesús tamropata pitaba xua cuiduba judiomonaetha judiomonae pia penacaetutsi botha tatsi. Pinmonae pomonae Jesús jume tayenatsi, barapomonae najuntú coyene cabenaeca, jeye:

—¿Eta xota metha bapon nacuiduba daxita baxua jane? ¿Jintam metha cata bapontha barapo peyaputae coyene jane, xua daxota bapon pex-einya petsita itatsi coyenewa exana? ³ Apra bapon pon naepan pematabobin. Bapon apra María pexanto tatsi, apra irú Santiago pentapin tatsi, irú José pentapin tatsi, irú apra Judas pentapin tatsi, irú Simón pentapin tatsi. Apra bara irú pamchowaxi tatsi watomaratha jinompa, jei barapomonae.

Daxota barapomonae jopa xapain Jesús yabara jume cowuntsichi. ⁴ Ichitha Jesús jeye barapo jiwitha:

—Daxita jiwi ba baru cui itura jina pontha pon Nacom peayapusu itorobi jume pepaebin. Nama pia tomarapiwi tatsi, iru piamonae tatsi iru pia bomonae matabuxu yomonaepiwi tatsi, barapomonae ba jopa bapon baru cui itura jinaetsi, jei Jesús.

⁵ Daxota Jesús jopa itacupaetsi xua pexeinya petsita itutsi coyenewan peexanaewa barapo Nazaret tomaratha po tomara pia tomaraxae tatsi. Saya meisa Jesús axaibi exana tsicamonaeyo pomonae peatenewi. ⁶ Jesús najuntu coyene cabenaeca, tsipei barapomonae jopa yatsicaewa jume cowuntsichi.

*Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwi xua petanaexanaenexatsi pijimonae tatsi
(Mt 10.5-15; Lc 9.1-6)*

Daxota Jesús cuidubapona tsiqui tomaraxitha po tomaraxi ena Nazaret tomara pecuariya. ⁷ Jesús waba pijimonae pomonae doce poyobe tatsi. Jesús tamropata pitaba xua tsana itoroba tsiniya tomarantha be dos poyobe tsiniya. Jesús pijimonae cata pia peayapusu itorobi coyenewa, xua pijimonae tatsi peitawetsinexa caurimonae. ⁸ Jesús pijimonae itoroba, xua pijimonae tatsi jopa pecaponaenexa pocotsiwan xua poxonae namtontha peponaenexa. Itoroba xua saya meisa pecaponaenexa naeton po naeton penacobena bababi naeton. Jopa bewa barapomonae pecaponaenexa cotein, yawa jopa bewa pecaponaenexa pexaewan, yawa jopa

bewa pecaponaenexa paratixi. ⁹ Yawa Jesús pijimonae itoroba xua bara nataxu xatabina sapaton, po sapaton pebuxumabiwan. Matautano barapomonae bewa nama xatabina saya be cae camisan. Jopa bewa caponae icha camisan. ¹⁰ Jesús pijimonae barai, jeye:

—Poxonae papatame tomaratha moya bara paenare po botha papatame, xua beya abux poxonae pawarapaename barapo tomara weya. ¹¹ Icha, icha tomarapiwi jopa paca matenta weyataeya wabiyo, matautano icha jopa paca jume naitaewatsiyo pocotsiwa papaebame, nexata bapoxonae barapo tomara weya pawarapare. Po tsorobon painya taxutha dubena panataxu wenunbabare barapo tomaratha. Baxua paexande xua barapomonae peyaputaenexa xua apara barapomonae abe exana paxamtha, jei Jesús.

¹² Bapoxonae Jesús pijimonae tatsi ponarucupa Jesús pia xainya weya tatsi. Barapomonae cueicueijei jiwitha xua bewa pinae jiwi icha juntu coyene xeinae Nacomtha xua peauraxae xua abe peexanae cuiru coyene exana Nacomtha.

¹³ Barichino barapomonae taitaweta cauri pomonae cauri xeina. Matautano barapomonae caxueba penasiwatha pomonaetha pomonae peatenewi. Bapoxonae barapomonae axaibi exana pinmonae pomonae peatenewi.

Meje yabara poxonae Juan bexotsi pon Pebauti-sabin jiwi

(Mt 14.1-12; Lc 9.7-9)

¹⁴ Herodes pon Galilea nacuapiwi itorobiya pia pepa peewatsinchi bapon jume tane xua juinya jiwi daxita jume tane pocotsiwa Jesús exana. Daxota bapon jeye:

—Juan pon jiwi Pebautisabin pon bequein bay-atha tupa, equeicha asu juina. Daxota barapon Jesús xeina barapo peayapusu itorobi coyenewa xua exana pexeinya petsita itabi coyenewan, jei Herodes.

¹⁵ Ichamonae Jesús yabara jeichichi:

—Bapon apara Elías xua equeicha asu, pon bay-atha tupa, jei.

Iru ru ichamonae jeye:

—Bapon apara pon Nacom peitorobi jume pepaebin icha pomonae ichi pomonae Nacom peitorobi jume pepaebiwi pomonae caena bay-atha jinompa, jei xua ichamonae paeba.

¹⁶ Poxonae Herodes baxua jume tane, jeye:

—Apara bapon Juan, pon yabara xua bay-atha najume carutan xua bapon pewisi ucuibiwatsi. Anoxuae bapon equeicha asu petupae cuiru coyene weya, jei Herodes.

¹⁷ Herodes baxua paeba, tsipei caena bayatha Herodes cui itoroba xua Juan pewaetabinexatsi, matautano xua pemaxu cubinexatsino matautano xua jiwi pecubi botha peetsinexatsi. Herodes baxua exana tsipei piowa tatsi powa pewan Herodías pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabuyo. ¹⁸ Daxota Juan jiwi pecubi botha etatsi, tsipei Juan Herodes tsipaebatsi, jeichichi: “Nacom pia peitorobi coyenewa jopa copatsiyo xua

xeiname bapowa tsipei bapowa eweicho piowa tatsi”, jei Juan.

¹⁹ Daxota bapowa Herodías Juan bichocono casebatsi. Bequein bapowa ichichipa xua Juan pecaenaetaxubiwatsi xua ichamonae pebexubiwatsi tsainchi, ichitha jopa itacupaetsi bapowa. ²⁰ Herodías jopa itacupaetsi xua peexanaewa baxua, tsipei Herodes Juan cunuwatsi. Bapon yaputane xua Juan bara xaniwaicha peexanaein, xuano matautano bara juntu coyene xanepana Nacomtha. Daxota jopa copatsiyo xua Juan bara abe pecana exanaenexa tsainchi. Bequein Herodes yabara unthuthu deideije pocotsiwa Juan pepaebixae, daichitha awiya ichichipa pocotsiwa Juan pepaebiwa. ²¹ Ichitha matakabi jopa, po matakabitha Herodías itacupatsi xua Juan abe pecana exanaewatsi. Herodes yantacabi jopa, po matakabitha caena bayatha Herodes naexana poxonae pexuyo. Barapo matakabitha Herodes exana pin penabanaewa. Bapon waba pomonae iru pentacaponae, pomonaetha itoroba xua iru tacanamataxeinatsi icha tomarantha. Iruno wabano pomonae soldadomonae pia pepa pentacaponae tatsi. Iruno wabano pomonae ainya cui penaexanae jiwi Galilea nacuatha. ²² Herodías pexantiyo tatsi patopa po tututha ichaxota nabanathopa. Barapowa tsita yaweibuncua xua barapomonae tane. Baxua Herodes ichichi xeica xua bapowa yaweibuncua. Iruru pomonae baxota naxayena, ichichi xeica baxua. Bapoxonae Herodes jeye bapowatha.

—Newcare pocotsiwa xua neichichipaewa,

bapoxonae cacatsinchi jinya beta neyaweibixae, jei Herodes.

²³ Bapon Herodes yabara tsiw_unae muxu dut-siya jeye:

—Bara cacatsinchi pocotsiwa xua new_ucame. Metha bequein new_ucaetsipame xua tanacua epa toyatsipan baraxua bara cacatsinchi, jei.

²⁴ Barapowa pona xua peyainyabinexa pena, jeye:

—Ena, ¿eta pocotsiwa metha w_ucacuaein? jei.

Barapowayo pena jume notatsi, jeye:

—W_ucare Juan pentasipa tatsi, pon jiwi Pe-bautisabin matasipa, jei Herodías.

²⁵ Barapowayo barapoxonae caena nainya pona ichaxota eca Herodes. Jeye bapontha:

—Ichichipan xua nainya anoxuae tanecatsi-wam tsane paratontha Juan pentasipa tatsi, pon jiwi Pebautisabin matasipa, jei.

²⁶ Barapoxonae Herodes bichocono _unth_uth_u wecoyei. Ichitha tsipei bayatha yabara petsiw_unae muxu dutsixae xua bepa pinae catsina pocotsiwa w_ucaeinchi, matautano tsipei pejume taexaetsi pomonae bayatha waba, daxota Herodes jopa bejume totabiyo pocotsiwa w_ucatsi.

²⁷ Bapoxonae caena nainya Herodes itoroba soldadomonaepin xua pecarenaenexa tsane paratontha Juan pentasipa tatsi. Bapon pona jiwi pec_ubi bo beya. Baraxotiya Juan wisi ucuibatsi.

²⁸ Barapo soldadomonaepin matasipa carena paratontha. Bapon cata yab_uyotha. Barapowayo xuya pena cata.

²⁹ Pomonae Juan pia pepuna jinompaewichi jume tane xua pinae Juan bexotsi. Barapoxonae

barapomonae pona jiwi pecabi bo beya xua Juan pepichinexa tsainchi petapaein, yawano xua pe-boyaenexa tsainchi ibo wou mutha iya.

Mejeyabara poxonae Jesús apata pexaewa cinco mil pebiwi

(Mt 14.13-21; Lc 9.10-17; Jn 6.1-14)

³⁰ Barapoxonae pirapae Jesús pia peitorobiwi tatsi, Jesús baru nacaetutatsi. Barapomonae Jesús tsipaebatsi xua daxita pocotsiwan barapomonae peexanaexae, yawano pocotsiwa xua bayatha barapomonae cuiduba. ³¹ Jesús pijimonae tsi-paeba, jeye:

—Anetha poinchi, xua wanafifina ewatsinexa tsainchi saya caeto ichaxota jiwaibi beya, jei Jesús.

Daxota Jesús baxua paeba, tsipei pinmonae Jesús itata pateibatsi, xua poxonae naepanaya poneiba. Daxota Jesús iru pijimonae tatsi jopa itacupaetsi xua pexaewa tsane. ³² Barapoxonae Jesús, iru pijimonae tatsi compa ponarucupa jeratha ichawatha beya xua ichaxota jiwaibi beya. ³³ Ichitha pin bicheitomonae tane poxonae Jesús iru pijimonae tatsi jeratha pona. Barapo pin bicheitomonae Jesusbaru yaitainchi. Barapo pin bicheitomonae daxita tomaran wecuinaeyiya. Bapoxonae pata ichaxota jiwaibi beya. Barapomonae tsiwanaya patatsi Jesús. ³⁴ Poxonae Jesús jera wenontouna bapoxonae Jesús tane pin bicheito. Jesús yabara najuntu coyene xeina xua barapomonae peyawenaenexatsi. Barapomonae jopa xeinaeyo pon peyawenaen barapomonaetha icha be oveja ichi poxonae jopa xeinaeyo pon peyapu eenaein.

Daxota Jesús barapomonaetha cuiduba ainya coyenein. ³⁵ Poxonae tabopiya tsanaichaba Jesús pijimonae itata patatsi, jeye Jesustha:

—Bayatha tabopiya tsanaicha. Xote apara bon ajibi xua ichaxota jiwi jinompa. ³⁶ Barapomonaе itorobare ichaxota po bon pipatotha umena yawa ichaxota xua tomaranxitha xua imoxoyo wacuariya xua barapomonaе pecomocaewa pexaewa. Tsipei xote pexaewa ajibi, jei pijimonae tatsi.

³⁷ Ichitha Jesús pijimonae barai, jeye:

—Paxam jame moya paapare pexaewa, jei.

Barapomonaе jeye:

—¿Xam ichichipame xua pata upain comocaewa tsane barapo bicheitomonaе ainya panmonaein xua pata comocaenexa doscientos po paratiximonaebetha pocotsi paratiximonaеbe xeineiba pomonaе nacuiteiba doscientos matabibetha? jei barapomonaе.

³⁸ Jesús barai pijimonae, jeye:

—Pan ¿eta xoyobe paxeiname? Incane matha pataema, jei.

Poxonae barapomonaе yaputane jeye Jesustha:

—Cinco po panyobe, yawa dos poyobe duweiyobe, jei barapomonaе.

³⁹ Jesús pijimonae najume caruta xua bepa daxita barapo bicheito iratha taenaetsei naepanaewatha xua pepa bicheiton tsana naexana tsiniya. ⁴⁰ Barapo pin bicheito pepa bicheito naexana tsiniya. Icha bicheito cien poyobe tsiniya. Icha bicheito cincuenta poyobe tsiniya. ⁴¹ Barapoxonae Jesús pecobetha pita pan cinco po panyobe. Yawa pita duweiyobe

xua dos poyobe. Bapoxonae Jesús peitaboco benecoicha, Nacomtha tsipaeba jeye: “Axa maisa jũntũ coyene weiweinan, xua pexaewa pata tanecatsiwaxaem”, jei Jesús. Barapoxonae Jesús epa janaxuba pan. Jesús pijimonae cata barapo pan, xua pijimonae tatsi xuya pecatsibaponaenexa barapo pin bicheitotha. Barichi Jesús duweiyobe epa janaxubabe. Bapoxonae apata barapo pin bicheitotha. ⁴² Barapo pin bicheito bara daxita nabane. Bara jain cowũntarũcupatsi. ⁴³ Barapoxonae Jesús pijimonae tatsi doce po cotebe wũmba xua nacopaba xua bayatha barapo jiwi jopa xaeyo petonsanaexae. ⁴⁴ Pomonae xua barapo pan pexaexae barapomonae cinco mil pebiwimonae.

Meje yabara poxonae Jesús mene matatsun jumatha pona

(Mt 14.22-27; Jn 6.16-21)

⁴⁵ Pirapae Jesús pijimonae itoroba xua peponaenexa jeratha, xua icha muxunene beya. Barapomonae Jesús tsiwana payatsi Betsaida tomara beya. Barapoxonae Jesús napeyaba barapo pin bicheito. ⁴⁶ Poxonae Jesús napeyaba barapo pin bicheito, bapoxonae Jesús pona demxuwatheicha xua petsipaebinexa Nacomtha. ⁴⁷ Poxonae bayatha quirei tsanaicha, bapoxonae Jesús pijimonae tatsi irũ jeratha tuwũtha yanapona. Jesús irũ compa pecaetha popona. ⁴⁸ Jesús tane xua barapomonae bichocono daunweya nowaeta tsipei dawerena bichocono joibo daunwei. Poxonae mataqueiwũnaeyo tsopona, Jesús pijimonae imoxoyo caquita pona.

Bapon mene matatsun jumatha pona. Jesús juntucuru xenta iya barapomonae. ⁴⁹ Poxonae Jesús pijimonae tainchi xua mene matatsun jumatha pona, barapomonae itaraerowiya nanta xeina, xua Jesús itara mexeya dowatsiwejei. Yawa barapomonae wawai. ⁵⁰ Daxota barapomonae bichocono wawai, tsipei daxita barapomonae tane, yawa bichocono cuitaya junuwa. Ichitha Jesús barai barapomonae, jeye:

—¡Apara xan! ¡Jopa pajunuwinde! ¡Maisa pajuntũ coyene weiweinare! ¡jei Jesús.

⁵¹ Bapoxonae Jesús jeratha nontabiya barapomonae pia xantha tatsi. Barapoxonae joibo caewanaya exana. Barapomonae bichocono najuntũ coyene cabenaeca. ⁵² Barapomonae baxua exana, tsipei barapomonae cataunxuae jopa yaputaeyo xua apara Jesús pon Nacom itoroba. Bequein bapon pexeinya petsita itatsi coyenewa exana poxonae apata pan pin bicheitomonaetha, barapomonae jopa beyaputaeyo pia juntũ coyenewantha.

Meje yabara poxonae Jesús axaibi exana pomonae peatenewi, pomonae Genesaret nacuapiwi
(Mt 14.34-36)

⁵³ Jesús, irũ pijimonae tatsi bara pitapa berubenathopiya xua pucua weya. Genesaret nacuatha pata. Baxota jera quetanota pitapatha. ⁵⁴ Poxonae Jesús jera wenontouna, bapoxonae caena nainya pinmonae Jesús yaitaerucupatsi. ⁵⁵ Bapoxonae barapo jiwi bara wecuinaeyiya daxita barapo ira

weya. Matautano carendena pocotsiwa pemaichi-watha pomonae atenemonae, Jesús pia xainya betacayiyatsi. ⁵⁶ Daxitantha ichaxota Jesús ponaena, ichaxota bequein tsica tomaraxi, ichaxotano bequein pin tomaran, ichaxotano bequein tomaran cuariya, daxita barapomonae capona peatenewimonae. Barapo peatenewimonae jebatsi nam-tontha. Barapomonae Jesús wuacatsi xua Jesús petajayabinexatsi pia paparuwa peopirato tatsi. Daxita pomonae Jesús pia paparuwa tajayabatsi daxita barapomonae axaibi tsurucupeibi.

7

Meje yabara poxonae Jesús yabara paeba xua pebin abe peexanae cuiru coyene juntu webocatsi (Mt 15.1-20)

¹ Nexata fariseomonae, iru pomonae jiwi pecuidubiwi Moisés pia peitorobi coyene tatsi xua pomonae Jerusalén tomara werendena, daxita barapomonae Jesús imoxoyo caquita poinchi. ² Barapomonae tane xua Jesús pijimonae tatsi jiwana najuntu coyene taxoba xuano xua daxota Nacom tsita natsicuentatsi abe peexanaexae poxoru jopa matha nacobe quiatsiyo poxonae xane. Daxota barapomonae nanta xeina xua Jesús pijimonae tatsi pomonae peantucuiruyapube jiwi. ³ (Barapomonae aichaxaibi xua Jesús pijimonae tatsi jopa matha nacobe quiatsiyo poxonae xane, tsipei fariseomonae iru daxita judiomonae jopa daichiyo. Barapomonae pia cui xeina xua jopa xaibiyo poxonae jopa matha tsiwanaya daunweya nacobe quiateibiyo. Barapomonae barapo cui coyene exana xua po

cui coyene pia pamo susato jiwi tatsi copiya cananta forota. ⁴ Poxonae barapomonae caibe nawibeibarena ichaxota po bon xua pexaewa pecaenaetsiwan weya, bapoxonae copiya tsiwanaya merantha naperu tsicababeiba xua poxonae xane. Barichi barapomonae icha coyeneinno exanapona xua peitorobi coyenewantha itoroba xua poxonae corotixi itapa quiata, yawano corotonno xua caseta itapa quiata yawano paraton po paraton pecaxae paraton itapa quiata yawa caman.) ⁵ Bapoxonae fariseomonae, iru pomonae jiwi pecuidubiwi Moisés pia peitorobi coyene tatsi, jeye Jesustha:

—¿Eta xua metha jinya jiwimonae jopa exanaeyo xua pocotsiwa wamo susato jiwi pia peitorobi cui coyenewantha itoroba xua penajuntu coyene taxobiyainwa? Jinyamonae barapo cui jopa exanaeyo xua jopa matha tsiwanaya nacobe quiateibiyo poxonae beya xaiba. Daxota jinyamonae pomonae peantu cuiruyapube jiwi xua penajuntu coyene taxobixae, jei barapomonae.

⁶ Jesús jume nota barapomonae, jeye:

—Bara Isaías pon Nacom peitorobi jume pepaebin beta xaniwaicha paca yabara paeba xua paxam pomonae itara mexeya xanepanaeya pepaebi jiwi pam, daichitha apara abeya peexanae jiwi pam. Bapon paca yabara tinaeya jeye, xua Nacom paeba:

‘Barapomonae neyabara baru cui itura jina poxonae cueicueijei tsaibi, ichitha pejuntu coyenewantha jopa neantobeyo.

⁷ Pocotsiwa poxonae barapomonae wuna nejainta saya pejume paw.

Po pecuidubiwa xua barapomonaе cuiduba ji-
witha

saya apara jiwi pia peitorobi coyenewa tatsi',
jei Nacom xua Isaías tatina Nacom, jei Jesús.

⁸Equeicha Jesús jeye barapo fariseomonaetha iru
pomonaetha pomonaе pecuidubiwi Moisés pia
peitorobi coyene tatsi:

—Saya paxam panaitematame pocotsiwa Na-
com pia peitorobi coyenewa tatsi painya ex-
anaenexa po peitorobi coyenewa painya amo
susato jiwi copiya canamata forota. Paxam baxua
paexaname poxonaе jiwi paitorobame xua jiwi
matha penacobe quiateibinexa poxonaе xaiba pe-
naintu coyene taxobiyainwa, jei Jesús.

⁹Equeicha Jesús barapomonaetha jeye:

—Itapetsiya painya neexanaenexa pocotsiwa
painya amo susato jiwi pia peitorobi coyenewatha
itoroba, daxota bichoina pajume itawetame
Nacom pia peitorobi coyenewa tatsi. ¹⁰Bayatha
Moisés pia peitorobi coyenewatha itoroba,
jeye: 'Axa baru cui itura jinare, iru ena baru
cui itura jinare', jei. Equeicha bapon Moisés
jeye: 'Pon abe yabara paeba paxa, xua jopa
peyawenaewa paxa ichacuiitha tsipae xua
penatha, bara bapon bewa tupaena', jei Moisés.

¹¹Ichitha paxam papaebame, xua pinae pebin
bara itacupatsi xua paxatha tsipaeba, ichacuiitha
xua penatha xua jeye: 'Jopa neitacupaeyo
xua tapaca cayawenaewatsi, tsipei daxita
pocotsiwa xeinan xua bequein pocotsiwatha
tapaca cayawenaewatsi tsainchi baxuan daxita
Nacomtha catan', xua jei pebin. ¹²Poxonaе
peburaya payabara nanta xeiname xua bapon

baxua paeba, bapoxonae bara pacopatame xua barapo pebin jopa penantawenonaewa xua peyawenaewa paxatha, irꞥꞥ xua penatha. ¹³ Poxonae paexanaponame pocotsiwa painya amo susato jiwi pia peitorobi coyenewatha itoroba, xuano xua ichamonae pacana exaname xua baxua irꞥ exana bapoxonae paxam Nacom pia peitorobi jume pecui pawi jume pacana exaname. Barichi ichawanno xua be jꞥpa xua peabe coyenein paexanameno, jei Jesús.

¹⁴ Equeicha Jesús waba barapo bicheito pia xainya berena, jeye:

—Daxita paxam pana nejume taema yawa pana nejume copi yaputaema pocotsiwa paca tsipaebinchi. ¹⁵ Pocotsiwa ba pebin pecoiboto deca tsi-jain jojonecatsi pexaewan, barapo coyene apara ba jopa bapana pebin antꞥcuiroyapube exanaetsi xua poxonae pocotsiwa peexanaexae. Jame pocotsiwa ba pebin nanta xeina xua pecoibototha caunuta xua peabe jume, barapo jume coyenewatha jame pebin antꞥcuiroyapube exanatsi xua poxonae pecueicueijeixae baxua. ¹⁶ Icha pamuxu dubename, moya pana nejume naitaeware pocotsiwa tapaca tsipaebiwatsi, jei Jesús.

¹⁷ Poxonae Jesús jiwi cuenta pona yawa bo bejoniya, bapoxonae Jesús pijimonae yabara yainyabatsi barapo pecayabara jꞥta pepaebi diwesiyo. ¹⁸⁻¹⁹ Jesús jume nota pijimonae jeye:

—¡Paxam bara paichim icha fariseomonae ichi! Jopa payabara yaputaem barapo pecayabara jꞥta pepaebi diwesiyo xua pexaewa yabara. Bay-atha paxam payaputaneme pocotsiwa pebin tsi-jain jojonecatsi pexaewa pecoiboto deca, barapo

pexaewa jopa abe cana exanaeyo pebin pia jũntũ coyenewa. Barapo pexaewa pebin jopa antũcuiroyapube exanaetsi. Barapo pexaewa jopa ponaeyo pia jũntũ coyenewatha. Jame barapo pexaewa pecotsorotha pona. Bapoxonae pexaewa aichurucuae nawexacaeca, jei Jesús.

Poxonae Jesús baxua paeba jiwi yaputane xua daxita pexaewan bara wũnae pexaenexa. Jopa jiwi antũcuiroyapube exanaetsi. ²⁰Equeicha Jesús namchi, jeye:

—Pocotsiwa pebin pecoibototha caunuta xua peabe jume, barapo jume coyenewatha jame pebin antũcuiroyapube exanatsi. ²¹⁻²²Tsipei pejũntũ coyenewatha pebin nanta xeina, xua meje bapocotsiwanje: Abe penanta xeinae coyenewa, irũ peita coxanae coyenewatsi coyenewa xua poxonae penayaputae jiwi naperũ nacoyaba, irũ ichũn piawa tatsi pecaibi coyenewa, irũ ichũn anaya pebexotsi coyenewa, irũ ichũn piseuri tatsi pepichi coyenewa, irũ ichũn piawa tatsi peichichipae coyenewa, irũ abe peexanae coyenewa, irũ ichũn pemuxuitorobiwatsi coyenewa, irũ peyũyũjei coyenewa, irũ peuwi coyenewa, irũ ichũn peyabara naerabiwatsi coyenewa, irũ ichamonae peaebi coyenewatsi, irũ jopa xainyeya peexanae coyenewa poxonae bequein yaputaetha xua jopa bewa exanae. ²³Daxita barapo coyenein pejũntũ coyene weya jume pichapa. Barapo jume coyeneintha pebin antũcuiroyapube exanatsi, jei Jesús.

*Meje yabara poxonaē yab_wyo powayo penana-
paincha poponaewayo Jesús jume cow_wtatsi
(Mt 15.21-28)*

²⁴ Bapoxonaē Jesús bara weya pona. Tiro tomara beya pona. Sidón tomara beya ponano. Jesús botha joniya. Bequein Jesús aichaxaibi xua jiwi yaputane ichaxota bapon eca, ichitha Jesús jopa itac_wpaetsi xua nameicha eca.

²⁵ Barapoxonaē caena nainya petsiriwa jume tane xua Jesús botha eca. Barapowa pexantiyo tatsi cauri xeina. Daxota barapo petsiriwa patopa Jesustha. Yawa pentabocototha uncua Jesús peitabaratha tatsi xua bapowa petsita ainya cuixaetsi. ²⁶ Barapowa penanapaincha poponaewayo pecueicueijeixae griegojume. Jopa judiomonaē jitowayiyo. Bapowa sirofeniciamonaewayo naexana penaexanaexae Fenicia tomaratha xua Siria nacuatha. Barapowa Jesús w_wcatsi jeye:

—Taxantiyo inta taitawere cauri, jei barapowa.

²⁷ Ichitha Jesús jume nota barapowatha pecayabara j_wta pepaebi diwesiyotha, jeye:

—Jopa bewa ba auri apatsi pexaewa pocotsiwa pexui pia pexaewa tatsi. Baxua caunutsiya apara yabara paeban xua jopa bewa catsin tsane pomonaetha pomonaē penanapaincha jinompaewi pomonaē jopa judiomonaē naexanaeyo xua pocotsiwa barompaya judiomonaē piawa tatsi. Daxota jopa w_wnaeyo xua cayawenatsi, jei Jesús.

²⁸ Barapowa jume nota Jesustha pecayabara j_wta pepaebi diwesiyotha, jeye:

—Aa, bara barichi xuaunxuae netsipaebame ponxaem Tanecanamataxeinaem. Xainyei paebame. Jopa ba bewa auri catsibi pexui pia pexaewa tatsi. Daichitha auri ba xane pocot-siwa pexui sorobaba barapo pepurawixi pocot-siwa pexaethopaewa pebuxupana tsica othope-ica. Bara jutiya ichiya necana ichinde, daichitha neyawende, jei bapowa.

²⁹ Barapoxonae Jesús barai barapowatha, jeye:

—Bara xaniwaicha paebame daxota cayawenatsi. Moya bara bara beya ponare. Bara bayatha nexantiyo wepu poinchi cauri, jei Jesús.

³⁰ Poxonae barapowa patopa pia botha, pexantiyo taebota xua camatha juntea boca. Matautano tane xua bapowayo bayatha wepu poinchi cauri.

Meje yabara poxonae Jesús axaibi exana pon pemuxusipanaein

³¹ Bapoxonae Jesús Tiro tomara weya pona, xua caibeya pona, ichaxota Sidón tomara iya pona. Matautano ichaxota diez po tomaranbe iya pona po tomaran pewun Decápolis. Bapoxonae Galilea pucuatha patopa. ³² Baraxotiya Jesús pia xainya berena tacapoinchi pebin pon muxusipana, matautano xua jopa itacupaetsi xua pecueicueiweiwa. Pomonae pecarendenaexae bapon, barapomonae Jesús wucatsi, xua Jesús penta jayabiwa tsane xua bapon axaibi peexanaenexa tsainchi. ³³ Barapo pebin Jesús aisowa bebaru poinya pin bicheito pia xainya weya tatsi. Jesús pecobesitobetha nantiyabe muxu yauxatata. Poxonae naone sutaba peone

pecobetha bapoxonae barapo cobetha ebato jayaba bapontha. ³⁴ Bapoxonae Jesús peitaboco benecoicha, yawa najumei cajujuina, yawano jeino bapontha: “¡Efata!” jeichichi, (xua jeichichi: “¡Muxu nasabare!” jeichichi.)

³⁵ Bapoxonae caena nainya bapon muxu nasaba nantiyabe. Matautano bara ebato xanepana. Matautano bara itacupatsi xua pecueicueijeiwa beta. ³⁶ Bapoxonae Jesús barai barapomonae, jeye: “Jopa ichamonaetha pana neyabara paebinde pocotsiwa exanan”, jei Jesús. Bequein Jesús matowa tsipaeba baxua, daichitha barapomonae awiya baxua yabara paebeiba ichamonaetha beyacaincha xua Jesús jume matawenta. ³⁷ Barapomonae najuntũ coyene cabenaeca, yawa jeino: “¡Maisa barapon bichocono daxita coyeneya xanepana exana! Pomonae pemuxusipanaewi equeicha beta jume tane, yawa bara cueicueijei”, jei barapomonae.

8

Meje yabara poxonae Jesús pexaewa apata cuatro mil pebiwi

(Mt 15.32-39)

¹ Bapoxonae icha matabitha pinmonae nacaetuta Jesús pia xantha tatsi. Jopa xeinaeyo pocotsiwa xua pexaewa tsane. Bapoxonae Jesús waba pijimonae, yawa jeye:

² —Barapomonae yabara najuntũ coyene xeinan tayawenaenexa, tsipei barapomonae bayatha xote nebaru jinompa acoibi po matabibe. Anoxuae jopa xeinaeyo xua

pocotsiwa pexaewa tsane. ³ Icha barapomonae jainbotha pu itorobichipan pia bon beya, piyain namtotha xuirabathopaetsipa. Metha xuirabathopaetsipa tsipei ichamonae bayatha taju werendena, jei Jesús.

⁴ Jesús pijimonae jume notatsi, jeye:

—Paxan jopa pana itacupaeyo xua barapomonae pexaewa pata apatsiwa, tsipei xote jiwaibi xua pata comocaenexa pexaewa, jei Jesús pijimonae tatsi.

⁵ Jesús yainyaba pijimonae, jeye:

—¿Eta po panyobe paxeiname? jei.

Jesús jume notatsi pijimonae, jeye:

—Siete po panyobe paxeinan, jei.

⁶ Nexata Jesús pijimonae najume caruta xua bepa pinae barapo jiwi iratha taenaetsei. Jesús pecobetha pita barapo siete panyobe. Bapoxonae Nacomtha tsipaeba jeye: “Axa, maisa juntu coyene weiweinan xua pexaewa pata tanecatsiwaxaem”, jei Jesús. Bapoxonae Jesús pan epa janaquiya nacobe weta. Bapoxonae Jesús pijimonae catsibapona, xua pijimonae tatsi xuya pecatsibaponaenexa barapo bicheitha.

⁷ Barichino barapomonae be conotha xeina duweixi poxi tsiquirixi. Jesús Paxa tsipaeba jeye: “Axa, maisa juntu coyene weiweinan xua pata tanecatsiwaxaem duweixi”, jei Jesús. Poxonae Jesús epa janaca, bapoxonae pijimonae cobe itoroba xua pecatsibaponaenexa barapo bicheitha. ⁸ Daxita barapomonae bara xane. Daxita bara jain cowuntarucupatsi. Pirapae awiya equeicha wamba siete po cotebe xua nacopaba pocotsiwa xua barapomonae bayatha

jopa xaeyo petonsanaexae. ⁹⁻¹⁰ Pomonae nabane pexaewa, barapomonae cuatro mil pebiwi. Bapoxonae Jesús pu itoroba barapomonae, xua penawibiyaenexa pia tomaran beya. Bapoxonae caena nainya Jesús, iru pijimonae tatsi, jeratha nonobabiya pewarapaenexa Dalmanuta nacua beya.

Meje yabara poxonae fariseomonae Jesús cui itorobatsi xua peexanaewa tsane pexeinya petsita itutsi coyenewa

(Mt 16.1-4; Lc 12.54-56)

¹¹ Bapoxonae fariseomonae pata Jesustha. Barapomonae tamropata notarupa xua najume matsontsonoba exana Jesustha. Barapomonae Jesús pejantu coyene jujatsinexatsi, daxota Jesús piraichi cui itorobatsi pia petsita itutsi coyenewa pocotsi coyenewa xua cana exana itaboco wetsica. Barapomonae jopa bapon jume cowantsichi icha jopa itacupaetsi xua exana petsita itutsi coyenewa. ¹² Jesús najumeicauna pejantu coyene weya poxoru barapomonae bapon amuxucoyenefaetabi exanatsi. Bapoxonae jeye:

—¿Eta pocotsiwa metha barapomonae tapex-einya tsita itutsi coyenewa necui itoroba jane? Bara xainyeya paca tsipaebatsi jopa bapana beex-anaeinyo baxua, xua barapomonae necui itoroba, jei Jesús.

¹³ Bapoxonae Jesús cuenta pona barapomonae jeratha, peponaenexa icha muxunene beya xua pucua iya.

*Meje yabara poxonaē Jesús pijimonaē yabara
yaputane exana pocotsiwa pan cotowa exana
(Mt 16.5-12)*

¹⁴ Jesús pijimonaē tatsi j̃ntemaina xua capona pan. Meisa cae pan capona jeratha, po nae pin naetha. ¹⁵ Jesús itoroba pijimonaē, jeye:

—Dota pam, jopa pajume naitaewatsinde fariseomonaē pia pecuidubi coyenewa tatsi xua painya nejume cow̃ntsiyainwa. Matautano dota pam, xua Herodes pia pecuidubi coyenewa tatsi xua painya nejume cow̃ntsiyainwa. Barapo pecuidubi coyenewan jiwi ichawa beya aj̃nt̃cuicoyeneyapube cana exanapoinchi icha be pocotsi coyene ichi xua levadura mataw̃n xua pan cocotowa exanapona beya poxonaē pin pan, jei Jesús.

¹⁶ Jesús pijimonaē tatsi tamropata notar̃c̃apa xua caemonaē natsipaeba, najei: “Metha apara poxoru j̃ntemainatsi xua caponatsi po pan xua levadura cotowa exana, daxota metha baxua Jesús j̃nt̃ coniquiya naca muxu tsipaeba”, najei barapomonaē.

¹⁷ Jesús yaputane pocotsiwa pijimonaē tatsi natsipaeba. Ichitha poxoru Jesús yabara paeba xua fariseomonaē ir̃a Herodes pia pecuidubiwan tatsi daxota Jesús yainyaba piamonaē:

—¿Eta xua metha pana natsipaebame xua jopa painya necaponaexae pan? Baxua papaebame apara poxoru jopa pana nejume yabara cow̃ntsim pocotsiwa paca cuidubatsi. Cataunxuae jopa pana necui yabara yaputaem poxoru jopa paichichipaem xua painya neyaputaewa tsane painya j̃nt̃ coyeneintha.

¹⁸ Paxam bequein pana necui taneme, ichitha jopa xaniwaicha pana necui yaputaem. Matautano bequein bara pana nejume taneme ichitha jopa xaniwaicha pana nejume copi yaputaem. Matautano pajuntemainame poxonae pexeinya petsita itutsi coyenewa exanan jiwi nexa poxonae pan catan jiwitha. ¹⁹ Poxonae janacan pan xua cinco po panbe xua cinco mil pebiwi nexa, ¿eta po cotethabe pawunbaponame xua pocotsiwa nacopaba? jei Jesús.

Barapomonae Jesús jume notatsi, jeye:

—Doce po cotebe apara, jei Jesús pijimonae tatsi.

²⁰ —Poxonae janacan pan xua siete po panbe xua cuatro mil jiwi nexa, ¿eta po cotethabe pawunbaponame xua pocotsiwa nacopaba? jei Jesús.

Barapomonae Jesús jume notatsi jeye:

—Siete po cotebe apara, jei Jesús pijimonae tatsi.

²¹ Nexata Jesús pijimonae barai xua muxu jei:

—Metha matapainya payaputaename xua apara jopa yabara paca tsipaebichi pan. Apra jame paca tsipaebatsi xua jopa bewa pajume cowantsim tsane fariseomonae iru Herodes pia pecuidubiwan tatsi, jei Jesús.

Meje yabara poxonae Jesús itacuere wunaeta pon peitata nacutsin Betsaida tomaratha

²² Jesús pijimonae baru botouna jeratha Betsaida tomaratha. Barapo tomarapiwi jiwana carendena pon peitata nacutsin, Jesús pia xantha tatsi. Barapomonae Jesús wucatsi, xua bapon

pemata jayabinexatsi xuano xua axaibi peex-
anaenexatsi. ²³ Jesús cobe pita pon peitata
nacútsin. Bapon cobe capoinchi aisowa beya xua
tomara weya. Bapoxonae Jesús naone sutaba
bapon peitamaiqueitobetha, itacuere jayabano.
Jesús bapon yainyaba jeye:

—¿Bara caitacupa xua netaewa? jei Jesús.

²⁴ Bapon necotaxuba, bapoxonae Jesús jume
notatsi, jeye:

—Pebiwi tan, daichitha itanonojan. Jiwi saya be
naewan jinompa, jei bapon.

²⁵ Equeicha Jesús pecobetha itamaiquei jayaba
nantiyabe. Barapo pebin daunweya naitata ba-
batsiya tane. Bapoxonae itamaiquei xanepana.
Bapon bara beta matapainya wuna tane. ²⁶ Jesús
itorobiya jeye bapon xua penawiyaenexa pia bo
beya:

—Jopa tomaratha ponaeinde xua jopa baxua
taneyabara cueicueijeinexa jiwitha, jei Jesús.

*Meje yabara poxonae Pedro namchi Jesustha
jeye: “Xam apara Mesías pon Nacom caitorobica”,
jei*

(Mt 16.13-20; Lc 9.18-21)

²⁷ Bapoxonae Jesús, iru pijimonae tatsi pata
tsiqui tomaraxitha, po tomaraxi pewan Cesarea
de Filipo. Poxonae namtotha cataunxuae
enapona, bapoxonae Jesús pijimonae yainyaba,
jeye:

—¿Eta jiwi neyabara jei po coyene xua xan
bapon aparan? jei Jesús.

²⁸ Barapomonae Jesús jume notatsi, jeye:

—Ichamonae cayabara jei: ‘Apara bapon Juan, pon jiwi Pebautisabin pon equeicha petɥpaein asɥ juina’, jei. Irɥ ichamonae cayabara jei: ‘Apara bapon Elías, pon equeicha petɥpaein asɥ juina’, jei. Irɥɥ ichamonae cayabara jei: ‘Apara bapon jiwana, pomonae Nacom peitorobi jume pepae-biwi’, jei, jei Jesús pijimonae tatsi.

²⁹ Bapoxonae Jesús pijimonae yainyaba, jeye:

—¿Incane irɥ paxamdu? ¿Eta paneyabara jumichimdu xua xan eta pondun? jei Jesús.

Bapoxonae Pedro, Jesús jume notatsi, jeye:

—Xam apara Mesías, pon Nacom caitorobica, jei Pedro.

³⁰ Jesús pijimonae muxu barai xua pijimonae jopa peyabara paebinexatsi ichamonaetha baxua.

*Meje yabara poxonae Jesús nayabara diwesi
paeba po coyene xua petɥpaewa tsane*

(Mt 16.21-28; Lc 9.22-27)

³¹ Bapoxonae Jesús tamropata pitaba xua pijimonae tsipaeba pocotsi coyene xua Jesús cana exanaeinchi ichamonae, Jesús jeye: “Xan ponxaein Nacom Tananeitapetsin jiwi bichocono neperaxa jubina. Matautano pitiri jiwi, irɥɥ sacerdotemonae pia pentacaponae wi tatsi, irɥɥ pomonae jiwi pecuidubiwi Moisés pia peitorobi coyene tatsi, daxita barapomonae neitawetsina. Matautano barapomonae nebexubina. Ichitha equeicha asɥ poponaein poxonae acoibi po matacabiyobe tsuxubi tsane”, jei Jesús. ³² Baxua Jesús pijimonae wɥnaeya muxu tsipaeba xua barapomonae bara xaniwaicha peyaputaenexa. Bapoxonae Pedro, Jesús compa aisowa bebarɥ

poinyatsi, Pedro Jesús jume daunweya tsipaebatsi xua Jesús jopa pepaebinexa baxua. ³³ Jesús pijimonae napatomeicha necota. Bapoxonae jume daunweya jeye Pedrotha:

—¡Xam be pon caurimonae pia pentacaponaein tatsim! Bara newepu ponare, tsipei xam jopa beta nanta xeinaem icha be jopa Nacom ichim poxonae xua beta nanta xeina. Saya xam nanta xeiname icha jiwi ichi poxonae nanta xeina, jei Jesús.

³⁴ Bapoxonae Jesús waba pin bicheito, matautano wabano pijimonae, yawa jeye daxita barapomonaetha:

—Icha pebin ichichipa xua tajiwiwimonae jiwanapin penaexanaewa tsane, bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae pocotsiwa itoroban, bequein bara bapon bexotsi ichamonae, tajiwiwimonae jitonxae. ³⁵ Pon naantobeya nata exana pocotsiwa bapon ichichipa, bapon jopa xeinaeyo peajuntayaruswa, po peajuntayaruswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae xuano xua pecueicueijeixae Nacom Pejume Diwesi, bapon xeinaena peajuntayaruswa, po peajuntayaruswa ataya tsiteca xua Nacom pia nacua beicha. ³⁶ Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntacoyeneswa po peajuntacoyeneswa ataya tsiteca, bapoxonae bapon jopa itacupaetsi xua penajuntacoyene

capanepaewa xua peweraweracaewa tsane.
³⁷ Tsipei pebin jopa itacupaetsi xua barapo
 copeitha Nacom pematomatsiwatsi, xua bapon
 pecatsinexa tsainchi peajantꞫcoyenesꞫwa xua
 barapoxonae pepatopaewa tsane Nacom pia
 nacua beicha tatsi. ³⁸ Icha ichꞫn neacaura, yawa
 nejume diwesi acaurano jiwi peitabaratha tatsi,
 pomonaetha pomonae jopa tana nejume cowantsi
 jiwi, pomonaethano pomonae bichocono abe
 peexanaewi, xan xuya barichin tsane. Xan
 ponxaein Nacom Tananeitapetsin, bapon xuya
 acauran tsane. Baxua exanaein poxonae
 patopaetsicaein be jiwi pia Pecanamataxeinaein
 tatsi yaitꞫpanae susato patopaetsicaein. Taxa
 pia peitꞫpanaewa tatsi yawa patopeicaein.
 Matautano Taxa pia matatsunpiwi tatsi nebarꞫ
 patsicaena, jei Jesús.

9

¹ Barichino Jesús jeye:

—Bara xaniwaicha paca tsipaebatsi xua
 pomonae xote umene barapomonae jiwana abꞫ
 copiya matha yabara yaputaena xua po coyene
 Nacom waba jiwi xua petanaexanaenexatsi
 piamonae pomonae itorobiya taewatsixae
 taayapusꞫwatha. Bapoxonae barapomonae
 werapaena, jei Jesús.

*Meje yabara poxonae Jesús pijimonae peitꞫtha
 pexeinya itꞫpanae coicha tsanaya naexana
 (Mt 17.1-13; Lc 9.28-36)*

² Poxonae seis po matabibibe jopa, xua Jesús
 paeba baxua bapoxonae pirapae Jesús barꞫ pona
 Pedro, irꞫ Santiago irꞫ Juan. Barapoyobe Jesús

compa baru pona demxuwatheicha po demxuwa bichocono taucha. Baxoteicha barapoyobe peitutha tatsi, Jesús pexeinya itupanae coicha tsanaya. ³ Pocotsiwa Jesús pia penama xatatsiwa bichocono daedaena, yawa bichocono inyapana, beyacaincha poxona jiji bichocono paparuwa matanaca xua inyapana exana. ⁴ Bapoxonae Pedro, iru Santiago iru Juan Elías taerucupatsi, iru Moisés ponbe caena bayatha naxubabe. Baponbe Jesús baru cueicueijeichibe. ⁵ Bapoxonae Pedro namchi, jeve Jesustha:

—Pon jiwí Necuidubim maisa wuna'e xua xote pata umenaewa. Pacata acabinchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

⁶ Pedro baxua paeba, bequein jopa yaputaeyo pocotsiwa yabara cueicueijei, tsipei poxoru saya barapomonae bichocono pijunuwi. ⁷ Bapoxonae daxita barapomonae pia xainya bematawacaicha taruneicatsi tsaquinaebowa. Barapo tsaquinaebowatha pejume jume tane, xua Nacom Jesús yabara cueicueijeichi, jeye: “Bapon apara Taxanto pon bichocono antobein pon itapetan. Bapon beta pajume taema pocotsiwa paca tsipaeba”, jei Nacom. ⁸ Barapoxonae caena nainya poxonae necobarucupa barapomonae, baponbe jopa taetsi, meisa saya Jesús compa uncua. ⁹ Poxonae Jesús pijimonae baru juinca demxuwa wetsica, bapoxonae Jesús tsipaeba barapo acoibi poyobe, jeye: “Ichamonaetha jopa yabara patsipaebinde pocotsiwa xuaunxuae pataneme xua tapaca catsita exanaewatsi. Jopa payabara paebinde beya abu poxonae equeicha

asun poponaein tatupae coyene weya, xan ponxaein Nacom Tananeitapetsin”, jei Jesús.

¹⁰ Daxota barapoyobe jopa yabara paebiyoy ichamonaetha xua tane. Saya barapoyobe pia coutha namicha natsipaebabe najeibe: “¿Eta xua metha baraxuara xua Jesús paeba xua pinae petupae coyene weya asu tsane?” najeibe.

¹¹ Barapoxonae barapo acoibi poyobe Jesús yainyabatsi, jeibe:

—Pomonae jiwi pecuidubiwi Moisés pia peitorobi coyene tatsi, ¿eta xua metha bapomonae paeba xua pinae bewa copiya patopaena Elías, xua pinae beya poxonae patopaena Mesías? jei barapoyobe.

¹² Jesús barapoyobe jume notatsi, jeye:

—Bara xainyei, Nacom Pejume Diwesitha paeba xua pon be Elías copiya netsiwana patopaena. Matautano paeba xua bapon cana nantu coyene weta exanaena jiwi pia juntu coyenewantha xua jiwi pejume cowantsinexa Nacom. Matautano barapo Nacom Pejume Diwesitha paeba xua xan ponxaein Nacom Tananeitapetsin ichamona neperaxa jubina. Matautano bichocono abeya neyabara paebina.

¹³ Ichitha nama xan paca tsipaebatsi xua pon be Elías bayatha apara patopa. Bapontha abeya cana exanatsi ichamona, icha be pocotsiwa barapomonae ichichipa xua bapon pecana exanaewatsi. Bayatha baxua Nacom Pejume Diwesitha peyabara tsiwuna muxu dutsixae, jei Jesús.

*Meje yabara poxonaē Jesús cauri taitaweta xua
pewowin xeina*

(Mt 17.14-21; Lc 9.37-43)

¹⁴ Bapoxonaē pirapaeyo barapo acoibi poy-
obe Jesús bar_u nawiya ichaxota ichamonae pi-
jimonae tatsi tajiñompatsi. Bapoxonaē bara-
pomonaē tane xua Jesús pijimonae tatsi pomonaē
baxota petajinompaewixaetsi bar_u nacaetutatsi
pin bicheito. Ir_u baxota naena pomonaē jiwi
pecuidubiwi Moisés pia peitorobi coyene tatsi.
Barapo pecuidubiwi Jesús pijimonae tatsi jume
matsontsonobatsi. ¹⁵ Barapo pin bicheito najunt_u
coyene nabenaeca poxonaē Jesús taerucupatsi.
Bapoxonaē barapo pin bicheito caena nainya
Jesús pexainya betacuinaeyiyatsi xua Jesús peja-
cobinexatsi. ¹⁶ Bapoxonaē Jesús yainyaba barapo
pin bicheito, jeye:

—¿Eta pocotsiwa metha tajiwiñimonae pajume
matsontsonobame? jei Jesús.

¹⁷ Caein pon uncua baxota, bapon Jesús jume
notatsi, jeye:

—Pon jiwi Pecuidubim, xote nexantha cata
caponatsi taxanto. Bapon taxanto cauri xeina,
xua daxota inta muxusipana exanatsi. ¹⁸ Poxonaē
taxanto taibatsi cauri, inta iratha bebai tsaibichi.
Bapoxonaē inta coibo thamthamei exaneibatsi.
Matautano inta nawano xane exanatsi. Dax-
ota inta cuenecuenona. Bequein w_ucan jinya-
monae, janje: ‘Painta taxanto taitawere cauri’,
jan, daichitha jopa itacupaetsi xua inta taxanto
petaitawetsinexatsi cauri, jei bapon.

¹⁹ Bapoxonaē Jesús anaya barai pijimonae, jeye:

—¡Paxam barapomonaē pam, pomonaē jopa xapain cataunxuae pana nejume cow̃ntsim! ¿Eta po weibe nantawenonan xua bewa tapaca bar̃u ecae-watsi tsainchi xua beya poxonaē tapana nejume cow̃ntsiwam tsane? Matautano ¿eta po weibe equeicha nantawenonan xua tapaca cayawenaē-watsi tsainchi? Pon cauri xeina painta bar̃u awena, jei Jesús.

²⁰ Bapoxonaē Jesús pexantha tacapoinchi barapo pewowin. Poxonaē Jesús tainchi cauri, bapoxonaē pewowin naichababa exanatsi. Barapo pewowin bapoxonaē iratha xotsi. Yawa iratha natorenababa exanatsi. Yawa coibo thamthamei exanatsi. ²¹ Pexuyo paxa tatsi, Jesús yainyaba, jeye:

—¿Eta po weiyobe barapo pewowin xeina baxua xua cauri xeina? jei.

Barapon Jesús jume notatsi, jeye:

—Caena bayatha baxua xeina poxonaē pexuyo tsecae. ²² Matowa cauri inta taxanto isototha bebai tsaibichi. Matautano inta mentha bebai tsaibichi pebexubinexatsi. Icha caitac̃pa xua neexanaewa tsane baxua, pana yabara naj̃nt̃u coyene xeinare jinya tapana neyawenaenexam tsane, jei pexuyo paxa tatsi.

²³ Jesús jume nota bapon, jeye:

—¿Eta pocotsiwa metha barapo jumetha netsi-paebame xua tana neitac̃paewa yabara? Tsipei ponba jume cow̃nta bara Nacom yawena xua peitac̃paewatsi xua daxitantha beta cana exana, jei Jesús.

²⁴ Bapoxonaē pexuyo paxa tatsi jume daunweya wawaya jeye:

—Bara cajume cowantatsi. Neyawende xua equeicha bichocono matowa tacajume cowantsinexa tsainchi, jei pexuyo paxa tatsi.

²⁵ Poxonae Jesús tane xua pin bicheito imoxoyo nacaetutapona, bapoxonae Jesús itaweta cauri, jeye:

—Xam caurim pom muxusipana exaname jiwi, bara caitawetatsi. Bara xubiriware barapo pewowin. Equeicha bapana jopa caewa patopaeinde bapontha, jei Jesús.

²⁶ Bapoxonae cauri pewowin papai exanatsi. Yawano naichababa exanatsi. Barapo cauri pewowin cuenta poinchi, barapoxonae barapo pewowin be petupaeyo boca iratha. Daxota daxita barapo pin bicheito paeba xua pinae barapo pewowin apara tupa. ²⁷ Barapo pewowin Jesús cobe pita, yawano asiya cuaranota. Bapoxonae barapo pewowin nantacotuncuataba.

²⁸ Bapoxonae Jesús joniya botha. Jesús pijimonae compa seicaya tsipaebatsi, jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei barapomonae.

²⁹ Jesús pijimonae jume nota, jeye:

—Barapocotsimonae caurimonae paca itacupa xua painya neitawetsiwa saya meisa poxonae memecabiya matowa pawacame Nacomtha, jei Jesús.

Meje yabara poxonae equeicha Jesús nayabara paeba xua poxonae tupaena

(Mt 17.22-23; Lc 9.43-45)

³⁰ Poxonae Jesús, iru pijimonae tatsi bara weya pona, bapoxonae Galilea nacua iya pona. Bapon

jopa beyaputaetsi xua ichaxota ponaena, xua ichamonaē yaputaena. ³¹ Baxua Jesús exana, tsipei pijimonaē cuiduba. Jesús barai pijimonaē xua nayabara paeba, jeye:

—Xan ponxaein Nacom Tananeitapetsin jiwi necaenaetsina ichamonaetha. Yawano nebexubina. Ichitha poxonaē acoibi po matakabibe yapucaewina, bapoxonaē equeicha asu poponaēin, jei Jesús.

³² Ichitha barapomonaē pomonaē Jesús pijimonaē jopa jume yaputaetsi xua Jesús yabara paeba. Mataatano barapomonaē junuwa xua Jesús peyabara yainyabiwa tsainchi barapo jume.

Meje yabara poxonaē Jesús yabara yainyabatsi pijimonaē xua pon peainya cui peexanaēinchi
(Mt 18.1-5; Lc 9.46-48)

³³ Jesús pijimonaē baru patopa Capernaum tomaratha. Poxonaē Jesús pijimonaē botha baru patopa, bapoxonaē pijimonaē yainyaba, jeye:

—¿Eta xua namtotha pana najume matsontsonobaponame? jei Jesús.

³⁴ Barapomonaē saya moya umena peuraxae, tsipei namtotha najume matsontsonobapona xua po coyene metha jintam ainya cui peexanaewatsi tsainchi pon barapomonaē jiwanaxae. ³⁵ Nexata poxonaē Jesús eca, bapoxonaē pijimonaē waba, pomonaē doce poyobe, yawa jeye:

—Pon ichichipa xua ichamonaē ainya cui petsita naexanaewatsi, bapon bewa pia coutha pecui pawi jiton naexanaē petanacuichinexa ichamonaē, jei Jesús.

³⁶ Bapoxonae Jesús pita pexuyo, yawa pijimonae tatsi peitabarayo deca tatsi tacuaranoreca. Jesús isaeca barapo pexuyo, jeye:

³⁷ —Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo, apara bara iru matenta weyataeya wabatsi pon tana neitorobixae xua pon bara Nacom, jei Jesús.

Meje yabara poxonae Jesús barai pijimonae: “Pon jopa nacata abe exanaeyo, bapon ba apara naca yawena”, jei

(Mt 10.42; Lc 9.49-50)

³⁸ Nexata Juan namchi Jesustha, jeye:

—Ja Tanecuidubim, paxan caein patan pon cawun taiba poxonae itaweta caurimonae, xua caurimonae itawetatsi. Paxan baxua pacui itawetan, tsipei jopa naca puna poponaeyo, jei Juan.

³⁹ Ichitha Jesús Juan jume notatsi, jeye:

—Bapon baxua jopa pacui itawetsinde, tsipei dapon aibi pon pexeinya petsita itatsi coyenewan exana poxonae newun taiba xua bapoxonae cotacaya abeya neyabara paeba. ⁴⁰ Tsipei pon abe jopa nacata exanaeyo, bapon apara naca yawena. ⁴¹ Pon paca yawena xua mera paca cata xua bequein tsica corotiyotha xua iru pejume cowuntsixae, xua xan Criston tajiwimonae pamxaem, baxua peexanaexae, Nacom catsina bapontha pematomatsiwa baxua nexa, jei Jesús.

*Meje yabara poxonaē Jesús paeba xua jiton
jopa bewa cana exanaē ichantha xua iru abe peex-
anaewa tsane
(Mt 18.6-9; Lc 17.1-2)*

⁴² Equeicha Jesús namchi, jeye: “Nacom tsi-
tatsi xua pebin bichocono abe exana poxonaē
natsicuenta ichun cana exanatsi xua abe pe-
exanaē cuiru coyene exana, po barapo ichun
pon cataunxuae aena tana nejume cowantsixae.
Metha jame wunaē tsipae xua barapo pebin pon
abeya cana exanaeya taexana ichantha, bara-
pon pin iboto wisi cutsipatsi yawa xua tuwatha
xua pin mar menetha barapo ibototha cayawa
cabutabachipatsino. ⁴³⁻⁴⁴ Icha painya cobe paca
exana xua abe painya neexanaewa tsane, maisa
panacobe ucubobare. Tsipei baxua xanepana xua
cae cobexi pabebam tsane, xua saya cae cobexi
painya neyawa patsiwa tsane Nacom pia nacua
beicha tatsi. Baxua jame yatsicaya xanepana
beyacaincha xua ainya cobebe painya necayawa
bebaiwa tsane ichaxota po nacuatha isoto jopa
itacounayiyo, xua ataya tsiteca. ⁴⁵⁻⁴⁶ Matautano
icha painya taxu paca exana xua abe painya
neexanaewa tsane, maisa panataxu ucubobare.
Tsipei baxua xanepana xua cae taxuxi pabebam
tsane, xua cae taxuxi painya neyawa patsinexa
Nacom pia nacua beicha tatsi. Baxua jame yat-
sicaewa xanepana beyacaincha xua ainya tax-
ube painya necayawa bebaiwa tsane ichaxota
po nacuatha isoto jopa itacounayiyo xua ataya
tsiteca. ⁴⁷ Matautano icha pocotsiwa pataneme
painya itamaiqueitha xua icha baxua paca ex-
ana xua abe painya neexanaewa tsane, painya

netaexae painya itamaiqueitotha, maisa pana naitacuere jucuare. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia peitorobi nacua beicha tatsi. Baxua jame yatsicaewa xanepana, beyacaincha xua poxona ainya itamaiqueitobe painya necayawa bebaiwa tsane ichaxota isoto jopa itacounayiyo. ⁴⁸ Barapo nacuatha isoto jopa itacounayiyo xua ataya tsiteca yawa oro jopa tupaeyo.

⁴⁹ “Tsipei daxita jiwi pia pejuntũ coyenein tatsi nacui wunaetsina Nacom nexa pocotsi coyenewantha xua jiwi taayapubetsi bichocono xua jiwi atene exanatsi pocotsiwa icha be isoto ichi. Matautano daxita pocotsiwan jiwi tauta xua petuxusi exanaewa Nacomtha, barapocotsiwa copiya yawa muxuna nacui xaxainchina sare beno. ⁵⁰ Sare beno, bara bena wuna. Ichitha icha barapo sare beno jopa abenataeyo bapoxonae jopa peitacupaewatsi xua equeicha peabenataewa. Bara paichinde poxonae icha be sare beno ichi. Paxeinare pocotsi coyene pexeinya juntũ coyene xua jopa po juntũ coyene abeyo. Matautano juntema nantiya pana nabarũ jinompare”, jei Jesús.

10

*Meje yabara poxonae Jesús cuiduba xua jiwi piseurixi pepunapenteibiyainwa
(Mt 19.1-12; Lc 16.18)*

¹ Jesús ponataba Capernaum tomara weya. Bapoxonae Judea nacuatha patopa. Yawa patopa

Jordán mene iya icha muxunenetha, po muxunene xua Judea nacula weya. Baxotiya equeicha jiwi pin bicheitomonae nacaetuta ichaxota Jesús uncua. Equeicha Jesús cuiduba barapomon-aetha, tsipei pia cui xua cuidubeiba. ² Bapoxonae ichamonae fariseomonae, barapomonae piraichi Jesús imoxoyo caquita umenaruchapatsi xua Jesús pejutu cui coyene jujutsinexatsi, daxota jeye:

—¿Metha bara Moisés copata jampa xua pebin
pepunaxubiwa piowa icha saya metha ichichipa
jampa? jei.

³Jesús jume epa pita barapomona, jeye:

—¿Eta xua bapon Moisés paca itoroba? jei.

⁴ Barapomonae Jesús jume notatsi, jeye:

—Moisés copata xua jiton itacupatsi xua pecat-
siwa papera piseuri, po paperatha tina xua pex-
ubiwa tsane piseuri. Bara bapoxonae bapon xu-
bina piseuri, jei barapomonaе.

⁵ Bapoxonae Jesús jume nota barapomonaetha, jeye:

—Moisés paca cata barapo peitorobi coyenewa, tsipei paxam jopa bepajume cowantsim painya juntu coyenewatha. ⁶ Tsipei poxona Nacom aena forota daxita, pejume diwesitha jeye: ‘Nacom exana pebin, matautano exana yabuyo’, jei.

⁷Equeicha Nacom jeye: ‘Daxota pebin paxa wepu natsata, yawa pena wepu natsata xua piowabe imoxoyo penaperu nacoyobinexabe. ⁸Baraponbe be cae jiwimonae naexanabe’, jei. Bapoxonae baponbe xua ainya jiwibe aibi, bara be caein naexanabe. ⁹Daxota pebin bapana jopa bewa punaxubi piowa. Tsipei apara bayatha Nacom

cana exana xua bara be caein naexanabe, jei Jesús.

¹⁰ Poxonae Jesús, iru pijimonae tatsi botha jinompa, bapoxonae Jesús pijimonae yabara yainyabatsi baxua. ¹¹ Bapoxonae Jesús jume epa pita, jeye:

—Pon punaxuba piowa, yawa ichowa pita, bapon abe exana piseuritha yawa Nacom peitutha tatsi, tsipei Nacom tsitatsi xua powa copiya baru popona, apara bara piowa tatsi. ¹² Barichi icha petsiriwa punaxuba pia pebin, yawa pita icha pebin, bapoxonae bapowa abe exana pia pebintha, yawa Nacom peitutha tatsi, tsipei Nacom tsitatsi xua pon copiya xaina, apara bara pia pebin tatsi, jei Jesús.

Meje yabara poxonae Jesús jeye pexuitha: “Barabu Nacom beta paca yawenaena”, jei (Mt 19.13-15; Lc 18.15-17)

¹³ Nexata jiwi Jesús pexui tacaponatsi xua Jesús pejayabinexa pecobetha, yawa xua Nacomtha pewucaenexa barapo pexui nexa xua pejeinexa: “Barabu Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonae cui matawentatsi pomonae pexui carendena tsaibi. ¹⁴ Poxonae Jesús baxua jume tane, jopa ichipaeyo pocotsiwa pijimonae tatsi paeba, daxota anaya jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntu coyene

xanepanaewi icha pexui ichi. Pexui pia cui xua tayapu xanepanatsi xua pia jũntũ coyeneintha jume cowũnta Nacom. ¹⁵ Bara xainyeya paca tsipaebatsi. Pon jopa yabara jume cowũntsiyo xua icha be jopa pexui ichiyo xua ba pexui tayapu xanepanatsi xua jume cowũnta, bapon bapana jopa naexanae tsane Nacom pijimonae tatsi pomonae Nacom itorobiya ewata, jei Jesús.

¹⁶ Bapoxonae Jesús tsana tamropata nonotapona pexui, yawa pecobetha pexui jayabiya tawũcatsi Nacom. Jeye: “Barabũ Nacom beta yawenaena barapo pexui”, jei.

*Meje yabara poxonae pewowin pon copei pex-
einaein Jesús tsipaebatsi*

(Mt 19.16-30; Lc 18.18-30)

¹⁷ Poxonae Jesús aena warapa, bapoxonae pebin Jesús pia xainya betacuinaerenatsi. Bapon pentabocototha uncua Jesús peitabaratha tatsi, xua pebarũ cui itura jinaenexatsi Jesús, tsipei Jesús pon peainya cuin. Bapon jeye Jesustha:

—Ja Tanecuidubim, maisa nejũntũ coyene xanepanaem. ¿Eta xua copiya matha exanocuaein xua ajũntũyapũsũya tapoponaewa tsane xua ataya tsane? jei bapon.

¹⁸ Bapoxonae Jesús jume nota, jeye:

—¿Eta xua nebaram: ‘Nejũntũ coyene xanepanaem’, jam? Apra ichũn dapon aibi pon pejũntũ coyene xanepanaein. Jame meisa apra bapon Nacom compa pejũntũ coyene xanepanaein. ¹⁹ Xam bara yaputaneme po coyene Moisés pia peitorobi coyenewatha itoroba, xua jeye: ‘Jopa ichũn bexubinde. Jopa ichowa

pichinde ichan piowa tatsi. Jopa caibinde ichan piawan tatsi. Jopa naerabiya cayabara paebinde pocotsiwa ichamonae exana. Jopa ichamonae yabara muxujainyabinde xua caibame. Axatha baru jume cui itura jinare. Matautano enatha baru jume cui itura jinare', jei Moisés, jei Jesús.

²⁰ Pewowin Jesús jume baraichi, jeye:

—Pon jiwi Necuidubim, daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon, jei bapon.

²¹ Jesús antobeya necota bapontha, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonae peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajantana botsiwa pocotsiwa bichocono wanae, jei Jesús.

²² Poxonae barapo pewowin baxua jume taeba, bichocono nantanuweya pontaba, tsipei bichocono copei pexeinaein.

²³ Bapoxonae Jesús necota jiwi, yawa jeye pijimonaetha:

—¡Maisa bichocono ayapubecai xua copei pexeinaewi naexana Nacom pijimonae tatsi jiwana pomonae itorobiya canamataxeina! Tsipei barapomonae bichocono antasiwayatane barapo pia copei, beyacaincha xua Nacom antobetsi, jei Jesús.

²⁴ Jesús pijimonae tatsi yabara naj_{unt} coyene cabenaeca pocotsiwa xua Jesús paeba. Ichitha Jesús pijimonae equeicha tsipaeba, jeye:

—Pomonaе tamonaе pamxaem, j_{ma}isa bichocono ayapubecai xua pomonaе copei pexeinaewi jume cow_{ants}ina Nacom! Barapomonaе nanta xeina xua pia copeitha nayawena xua daxota jopa canantawenonaeyo xua Nacom pejume cow_{ants}iwatsi. ²⁵ Bichocono acuiruyapube xua duwein, pon pew_{an} camello xua bapon pejoniyaewa acuicheto peetab_u wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonae tatsi jiwana pomonaе itorobiya canamataxeina beyacaincha xua poxonaе acuiruyapube xua poxonaе camello acuicheto peetab_u wan iya pejoniyaewa, jei Jesús.

²⁶ Poxonaе Jesús pijimonae jume taer_uc_upaetsi xua paeba bapoxonaе naj_{unt} coyene cabenaeca bichocono. Barapomonaе caemonaе nayainyaba, najei:

—Bapoxonaе ¿jintam metha nexata itac_upaetsi xua pecapanepaewa pia coutha? jei barapomonaе.

²⁷ Jesús tane barapomonaе, yawa jeye:

—Pebiwi ba jopa itac_upaetsi xua baxua exana, saya jame meisa Nacom compa itac_upaetsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸ Nexata Pedro Jesús jume notatsi, jeye:

—Paxan daxita pacuenta ponan pocotsiwa pax-einan pata paca puna ponaewatsi tsainchi, jei Pedro.

²⁹ Jesús Pedro jume notatsi, jeye:

—Bara xainyeya paca tsipaebatsi. Nacom beta cana exanaena daxita pomonae pecueicueijeixae Nacom pia pecapanenebiyae diwesi yawa taneantobexae beyacaincha xua ichamonae antobetsi. Nacom beta cana exanaena barapomonae pia bon pecuenta ponaexae inta peexanaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowí pecuenta ponaexae. Matautano beta cana exanaena pomonae paxeíwi pecuenta ponaexae, matautano peníwi pecuenta ponaexae. Matautano beta cana exanaena pomonae pia pexui yawa pia iran pecuenta ponaexae. ³⁰ Nacom barapomonaetha catsina po irathe pentoma xua cien po cuiyobe tsane. Barapomonae xeinaena bon, matautano nantautsina peweichowi, iru pamchowí tatsi, iru peníwi tatsi, iru pia pexui tatsi, yawa iranno. Daxita barapomonaetha tsicotane be barompaya piamonae tatsi. Barapo cae pin nacuathe barapomonae peraxa jubinchi taneantobexae, daichitha barapomonae xeinaena Nacom pia peitorobi nacuatheicha peajuntuyapuswa po peajuntuyapuswa ataya tsiteca. ³¹ Pomonae xua anoxuae, pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawí naexana pomonae jiwi jopa petsita ainya cui jiwichi, po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

*Meje yabara poxonaē Jesús nayabara paeba
acoibi po coyenebetha xua poxonaē t̃paena
(Mt 20.17-19; Lc 18.31-34)*

³² Poxonaē Jesús pijimonaē cataunxuae namtotha bar̃ ecapona xua Jerusalén tomara beya, Jesús pijimonaē tsiwana nantacaponā. Bapoxonaē Jesús pijimonaē tatsi naj̃nt̃ coyene cabenaeca, tsipei Jesús nainya nantacaponā. Ir̃ pomonaē Jesús puna poinchi yabara junuwa, tsipei yaputane xua Jesús abe cana exanaeinchi barapo tomarapiwi. Bapoxonaē Jesús pijimonaē compa waba aisowa beya xua pomonaē doce poyobe tatsi. Jesús tamropata pitaba xua tsipaeba pijimonaē xua pocotsiwa imoxoyo ichamonaē Jesús cana exanaeinchi. ³³ Jesús jeye pijimonaetha: “Anoxuae ponaeinchi Jerusalén tomara beya. Baxotiya xan ponxaein Nacom Tananeitapetsin, necaenaetsina ichamonaē sacerdotemonaē pia pentacaponae witha tatsi, yawa pomonaetha pomonaē jiwi pecuidubiwi Moisés pia peitorobi coyene tatsi. Barapomonaē itorobina xua nebexubina. Matautano necana cobenatsina pomonaetha pomonaē penanapaincha jinompaewi xua pomonaē icha nacua werena peponaewi. ³⁴ Barapomonaē necui caponaena, yawa necueinchinano. Matautano yawa necana one subabina. Bapoxonaē nebexubina. Daichitha poxonaē acoibi po matabibibe weraweracaena equeicha as̃ poponaēin pet̃pae coyene weya”, jei Jesús.

Meje yabara poxonaē Santiago ir̃ Juan Jesús

*yainyabatsibe**(Mt 20.20-28)*

³⁵ Bapoxonae Santiago iru Juan ponbe Zebedeo pexantobe tatsi, baponbe Jesús imoxoyo caquita uncuatabatsibe, jeibe Jesustha:

—Pon jiwi Necuidubim, paichichipan xua painta exanaename pocotsiwa paca wucaeinchi, jei.

³⁶ Nexata Jesús yainyaba baponbetha, jeye:

—¿Eta pocotsiwa paichichipamebe xua pacata exanaeinchibe? jei.

³⁷ Baponbe Jesús jume notatsi, jeye:

—Matacabi jopaena, po mataqueitha itorobiya ewatsiname jiwi poxonae ecaename jinyawa xua pexeinya itupanae ecaethopaewatha. Barapo mataqueitha copare xua paxanbe nantiyabe paecaeinbe patawantha xua pexeinya itupanae ecaethopaewatha. Ichun pocotsiwa necoxa weya ecaena. Ichun pocotsiwa netsocona weya ecaena, jeibe baponbe.

³⁸ Bapoxonae Jesús baraibe baponbetha, jeye:

—Paxambe jopa payaputaembe pocotsiwa pana newacamebe. Poxonae ichamonae abe inta exanaena, xan bara saya copatsin xua barapomonae bara neperaxa jubina. Barichi poxoru paxambe tapana neantobexaembe, ¿bara iru paca itacupabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara tupa neexanaena. Barichi, ¿bara iru paca itacupabe xua pacopatsinamebe xua bara ichamonae tupa paca exanaenabe? jei Jesús.

³⁹ Barapoyobe jume notabe Jesustha, jeye:

—Aa, bara baxua pana neitacupabe, jeibe.

Jesús jume notabe baponbetha, jeye:

—Bara bara xainyei, barapocotsi coyene ichamonae paca cana exanaenabe. Ichamonae paca peraxa jubinabe. Matautano ichamonae bara tupa paca exanaenabe, icha xan necana ichi tsane.
⁴⁰ Nama xua xantha nantiya paecamebe xua ichan pocotsiwa tacoxa weya eca, yawa xua ichan tatsocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonae caena bayatha tsiwanaeta xua peenaenexa tsane, jei Jesús.

⁴¹ Jesús pijimonae tatsi pomonae umena, pomonae diez poyobe, barapomonae jume tane xua Santiago iru Juan Jesús wucatsibe. Bapoxonae barapo diez poyobe, Santiago iru Juan yabara anaepanarucupatsibe. ⁴² Ichitha Jesús pia xainya berena pijimonae waba yawa namchiya jeye barapomonaetha:

—Paxam bayatha pataneme po coyenewa ba exana pomonae jopa judiomonae naexanaeyo. Barapomonae ba nantauta pomonae pia nacua tatsi pia petaewatsiwichi tatsi. Daichitha barapo nacua peewatsiwi aebiya itoroba piamonae xua daxota bichocono jiwi taayapubetsi. ⁴³ Ichitha nama paxam barapocotsi coyeneya jopa bara paichinde. Seicaya nama icha juntu coyeneyatha paca itorobatsi. Icha pon paxam jiwana, icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina. ⁴⁴ Matautano pon xua paxam jiwana, icha bapon ichichipa naexana be

pocotsin bichocono ainya cui penaexanaein xua beyacaincha ichamonae, bapon matha bewa copiya daxita paxam beta amanaya pacata nacuichina icha pon pebusi cui taetaeinchi ichi. ⁴⁵ Icha be pocotsi coyeneya ichin bara paichinde. Xan ponxaein Nacom Tananeitapetsin patopeican xua tanacuichinexa tsane ichamonae nexa. Apra jopa baxua tsipatopaeinyo xua ichamonae inta penacuichiwanexa tsane. Saya patopeican tsipei ichichipan xua daxita carepaya jiwi tayawenaewa tsane. Matautano patopeican xua tatsitupaenexa tsane be pentoma xua daxita jiwi pepanenebiyaenexa abe pia peexanae cuiru coyenein weya tatsi, jei Jesús.

Meje yabara poxonaе Jesús axaibi exana pon peitata nacutsin, pon pewun Bartimeo (Mt 20.29-34; Lc 18.35-43)

⁴⁶ Bapoxonaе Jesús iru pijimonaе tatsi pata Jericó tomaratha. Jesús iru pijimonaе tatsi tomara we-iyiya xua iruru pin bicheitomonaе napona. Iruru bapoxonaе pebin pon pewun Bartimeo, pon Timeo pexanto tatsi, bapon namtotha eca. ⁴⁷ Poxonaе Bartimeo jume tane xua juinya Jesús imoxoyo pona, pon Nazaret tomarapin, bapoxonaе bapon Bartimeo tamropata pitaba xua wawaya jeye:

—¡Jesús, David pia pemomoxi susato jiwanapim, ponxaem Nacom necaitapetsim neyabara najuntu coyene xeinare jinya tana neyawenaenexam! jei.

48 Pinmonae jume matawenta bapontha xua moya peecaenexa. Ichitha bapon equeicha bi-chocono jume daunweya wawai, jeye:

—¡Jesús, David pia pemomoxi susato jiwanapim, ponxaem Nacom Necaitapetsim neyabara najuntũ coyene xeinare jinya tana neyawenaenexam tsane! jei bapon.

49 Bapoxonae Jesús naruntaba yawa namchi pi-jimonaetha, jeye:

—Maisa painta wabare, jei Jesús.

Bapoxonae pon peitata nacũtsin wabatsi, yawa barapomonae jeye bapontha:

—Bara najuntũ tsacatabare, jopa amurande. Nontaponare, aunxuae cawaba, jei barapomonae.

50 Bapoxonae pon peitata nacũtsin pia penauya-patsiwa xubiriwa, yawa jirawũna. Bapoxonae pona Jesustha. 51 Jesús yainyaba bapontha, jeye:

—¿Eta xua jinya tacata exanaetsi? jei.

Bapon Jesús jume notatsi, jeye:

—Pon jiwi Pecuidubim, benecotsin cuinaya, jei.

52 Jesús jume nota bapontha, jeye:

—Bara moya ponde. Bara bayatha caitacuere xanepana exanatsi, tana neyabara jume cowũtsixaemxae xua bara tana neitacũpaewa xua tacayawenaewatsi, jei Jesús.

Bapoxonae caena nainya pon peitata nacũtsin necotaxuba. Bapoxonae bapon Jesús puna poinchi namtotha.

11

Mejeyabara poxonaes Jesús Jerusalén tomaratha patopa

(Mt 21.1-11; Lc 19.28-40; Jn 12.12-19)

¹ Poxonaes Jesús, iru pijimonaes tatsi muxu pepatsi Jerusalén tomaratha copiya pata Betfagé tomaratha yawa Betania tomaratha, po tomara xua nacacuita ecabe. Barapo tomarabe cuariya demxuwa eca, po demxuwa pewun Olivowa, xua baxota olivo naein peumenaexae. Bapoxonaes Jesús nacueyatabe poyobe itoroba ponbe pijimonaes tatsi jiwana. ² Jesús barai baponbetha, jeye:

—Paponarebe, po tomara painya itabaraya equiya. Poxonaes papatopaenamebe barapo tomaratha, bapoxonaes pacaxinaenamebe burro pon penun pon pequetanotsin, po burro ichamonae jopa tsijuma enaeyo. Barapo burro paisanaxorebe. Bapoxonaes payama carenandebe. ³ Icha ichun paca yainyabiya jeye: ‘¿Eta xua payama isanaxubamebe burro?’ paca jei, nexata pajandebe: ‘Pon jiwi Pecanamataxeinaein bepa pata yama cayiyeinjei tsipei pinae nantawenona. Bexa nainya equeicha payama carenaein’, pajandebe, jei Jesús.

⁴ Barapomonaes ponarucupa. Yawa caxinarucupa barapo burro pebto, pon quetanota imoxoyo bo coibototha xua aisowa beya namtotha. Bapoxonaes barapoyobe yama isanaxubabe barapo burro.

5 Pomonae baxota jinompa barapomonae baponbe yainyabatsi jeye:

—¿Eta xua paexanamebe? ¿Eta xua burro paianaxubamebe? jeichichibe baponbe.

6 Bara baraponbe jume notabe barapomon-aetha pocotsiwa bayatha Jesús pejume itorobixae. Bara baraponbe tacopatatsibe xua bara peyama isanaxubinexabe.

7 Bapoxonae baponbe tayama cayabe burro Jesús tayama cayatsibe. Bapoxonae pia paparuwan tsijuma jebicabe, yawa Jesús tsijuma equeica. 8 Bapoxonae jiwi pinmonae namtotha yerababa jejebabapoinya pia paparuwan. Ichamonae peaxu po axu be coichaxu axu ucuboba. Barapo axu namtotha jebapoinya xua Jesús ainya cui exanatsi.

9 Pomonae Jesús tsiwana nanta cajiinjincatsi, iru pomonae Jesús peputha tajiinjincatsi, barapomonae Jesús yabara wawaya jeichichi:

—¡Pai jayana, maisa Jesús pon jiwi itorobiya pia pepa peewatsinchi maisa wuna, bapon patopa Nacom peitorobixae! 10 ¡Bara wuna jaintatsi pon patopeica xua jiwi peitorobinexatsi, icha David ichi pon wamo susatopin poxonae bapon Israel nacua itorobiya ewata! ¡Maisa Nacom bichocono wuna jaintatsi pon athabeicha eca! jei barapomonae.

11 Bara bapoxonae Jesús patopa Jerusalén tomaratha, yawa joniya Nacom pin pia botha tatsi. Jesús naita cui wetaba xua tane daxita pocotsiwa jiwi exana barapo botha. Bapoxonae equeicha Jesús pijimonae baru ponataba Betania tomara beya, poyobe xua doce poyobe, tsipei bayatha tabopiya.

*Meje yabara poxonaē Jesús biatane higuera naē
xua jopā penacoichixae
(Mt 21.18-19)*

¹² Icha matabitha baya, poxonaē Jesús iru pijimonaē tatsi Betania tomara weya pona, Jesús jainpaponā. ¹³ Tajū weya Jesús tane higuera naē xua noxu tsuncuae. Jesús higuera naē beya pona piyain petanexa pethei, ichitha saya noxu tane, tsipei cataunxuae dapō dapae aibi pō dapaetha higuera naē nacoita. ¹⁴ Bapoxonaē Jesús barai higuera naē, jeye:

—Bapana jopā equeicha nacoichim tsane, xua jiwi jopā necathei xaenexa, jei Jesús.

Jesús pijimonaē jume tainchi baxua poxonaē higuera naē barai.

*Meje yabara poxonaē Jesús aisowa benapuna
torobabiya Nacom pin pia botha pomonaē pecaē-
naetsiwi
(Mt 21.12-17; Lc 19.45-48; Jn 2.13-22)*

¹⁵ Bapoxonaē pirapaeyo Jesús pijimonaē baru patopa Jerusalén tomaratha. Jesús joniya Nacom pin pia botha tatsi. Bapoxonaē Jesús aisowa benapuna torobabiya barapo Nacom pin pia bo weya pomonaē pecaenaeta jiwi baxota. Jesús tabū tayebiya bebai iratha pocotsiwa pexaethopaewa pō pexaethopaewantha nantiya nacatsiba paratixi, yawa xua iruru baxota topibo caenaeta. ¹⁶ Jesús jopā copatsiyo xua jiwi piawan capona Nacom pin pia bo tatsi tutiya iya. ¹⁷ Jesús cuiduba barapomonaē, jeye:

—Nacom Pejume Diwesitha jeye: ‘Tabo apara pō botha xua daxita nacuanpiwi

tanetsipaebinxexa tsaibi tsane barapo botha',
 jei Nacom Pejume Diwesitha. Ichitha paxam
 barapo bo be pecaibiwi pia m̃th̃a tutu pacana
 exaname, ichaxota pijunuwi nantiyabeibathopa.
 Tsipei baxota panacaetutame saya Ɂ
 xua painya necaibinxexam tsane paratixi
 pomonaetha pomonae xua pateiba xua Nacom
 petsipaebeibinxexatsi, jei Jesús.

¹⁸ Sacerdotemonae pia pentacaponawewi tatsi,
 ir̃r̃ pomonae jiwi pecuidubiwi Moisés pia
 peitorobi coyene tatsi, daxita barapomonae jume
 tane xua Jesús paeaba. Bapoxonae barapomonae
 tamropata notar̃c̃pa xua jeita po coyenewatha
 Jesús bexubinch̃i. Barapomonae bequein
 ichichipa Jesús bexotsi ichitha baxua jopa
 exanaeyo tsipei barapomonae junuwa xua
 jiwi anaepana xua barapo sacerdotemonae
 pia pentacaponawewi tatsi pecasebiwatsi ir̃no
 xua pecasebiwatsi pomonae jiwi pecuidubiwi
 Moisés pia peitorobi coyene. Tsipei barapomonae
 jiwi cunuwatsi, xua daxita jiwi peichichipaexae
 nawita pocotsiwa Jesús cuiduba. ¹⁹ Poxonae
 xometo iriya ecanaicha bapoxonae Jesús
 pijimonae bar̃ ponataba barapo tomara weya.

Meje yabara poxonae higuera nae ỹnuncua
(Mt 21.20-22)

²⁰ Baya poxonae pentha tsina, Jesús pijimonae
 baxoyo bar̃ ecapona yawa tane xua higuera nae
 ỹnuncua xua daxita petabaca opina wetsina.

²¹ Bapoxonae Pedro yabara nanta xeinataba xua
 mexuae Jesús biatane higuera nae. Bapoxonae
 jeye Jesustha:

—Pon jiwi Necuidubim, taema po higuera nae mexuae biataneme, bayatha yʼnuncua, jei Pedro.

²² Bapoxonae Jesús jeye pijimonaetha:

—Paxam bichocono pajume cowʼnde Nacom.

²³ Bara xainyeya paca tsipaebatsi. Icha xanepanaeya pana neyabara jume cowʼntame xua Nacom painya nepaca cayawenaewa xuano xua jopa ainya ʼnthʼton paxeinaem, bara paca itacʼpaena xua painya nepaebiwa icha ichin xua cana exanan higuera nae. Mataʼtano bara paca itacʼpaena xua painya nejeiwa uruto beya, xua pajam: ‘Uruto, natsixitabare, mar mene beya jopare’, xua painya nejeiwa. Bapoxonae bara baxua jopa bayathiyo tsane. ²⁴ Daxita xua xuan pocotsiwan Nacom beya pawʼcame, icha bara xanepanaeya pajume cowʼntsiya wʼcame, bara Nacom paca catsibina baxuan. ²⁵ Poxonae Nacomtha patsipaebame, icha ichʼn abe pacata exana, copiya payabara jʼntemainare bapon pocotsiwa pacata abe exana, xua xuya beta painya necayabara canantaxeinaenexa. Barichi Nacom pon peitabocotha eca xuya paca yabara jʼntemainena pocotsiwa abe painya neexanae cuiru coyenein paexaname. ²⁶ Ichitha icha jopa payabara jʼntemainae ichʼn pocotsiwa pacata abe exana, barichi Nacom pon itabocotha eca, jopa paca yabara jʼntemainae tsane pocotsiwa abe painya neexanae cuiru coyenein paexaname, jei Jesús.

Meje yabara xua Jesús pia peitorobi coyenewa xeina

(Mt 21.23-27; Lc 20.1-8)

²⁷ Bapoxonae Jesús, iru pijimonae tatsi caibe nawibiya Jerusalén tomara beya. Poxonae Jesús Nacom pin pia botha joniya xua yawa tututha iya ponano, bapoxonae sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi iru pitiri jiwi, barapomonae Jesús imoxoyo caquita ume-narucapatsi. ²⁸ Barapomonae Jesús yainyabatsi, jeichichi:

—¿Eta po peayapusu itorobi coyenewatha cuidubame baxuan? ¿Jintam cacata barapo peayapusu itorobi coyenewa? jei barapomonae.

²⁹ Jesús jume nota barapomonae, jeye:

—Xan iruru tha barichichi paca yainyabinchi. Icha beta pana nejume notsiname, bapoxonae xuya yabara paca tsipaebinchi xua po peayapusu itorobi coyeneyatha exanan baxuan. ³⁰ ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús.

³¹ Nexata daxita barapomonae caemonae najume matsontsonoba, najei: “¿Eta xua metha jei tsainchi? Icha jeichipaetsi: ‘Juan cui itorobatsi Nacom, xua pebautisabiwa jiwi’, metha naca jeichipae: ‘¿Eta xua metha nexata jopa pajume cowantsim Juan?’ metha naca jeichipae Jesús. ³² Jiwi cui cunuwinchi icha jei tsainchi: ‘Juan cui itorobatsi jiwi, xua bautisaba’, icha jei tsainchi. Metha bapoxonae jiwi naca casebichipa anaya”, najei barapomonae. Barapomonae jiwi cunuwatsi tsipei daxita jiwi Juan yabara jume cowantatsi, xua apara bapon Nacom pia peitorobi

jume tatsi pepaebi jiton. ³³ Bapoxonae barapomonae namchi Jesús beya, jeye:

—Canta jopa payaputaeinyo, jei barapomonae.

Nexata Jesús barai barapomonaetha, jeye:

—Nexata barichin tsane jopa yabara paca tsi-paebi tsainchi po peayapusu itorobi coyeneyatha exanan xua daxita taexanaewan, jei Jesús.

12

Meje yabara poxonae Jesús paeba pecayabara juta pepaebi diwesiyo pomonae xua abe exana, pomonae petayapucaenaewi uva pabi

(Mt 21.33-46; Lc 20.9-19)

¹ Bapoxonae Jesús tamropata pitaba xua cuiduba jiwitha pecayabara juta pepaebi diwesiyotha, jeye: “Matha iruru pebin pin uva pabi xeina. Bapon uba po unbo pewun uva cuei unbo. Yawa yapucurarata barapo pia uva pabi ibowantha xua jopa pejojondenaenexa ichamonae barapo pabitha. Yawano baxota ibo fetoto exana, xua barapo ibo fetotha pecubinexa uva cuei. Matautano baxota exananota bo, po bo bichocono tacha xua baxota pebin bara wenecotequeica uva pabi. Bapoxonae bapon itoroba pomonae pia uva pabi pia petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona. ² Barapo matabi tsuxubi, po matabitha uva cuei naweta. Bapoxonae barapo matabeitha pomonae pabi petayapucaenaewi jiwana itapeta nota xua penawetsiwa. Bapoxonae pon uva pabi pexeinaein, bapon pomonae

petanacuichiwichi jiwana itoroba, xua petawucaenexa tsainchi uva cuei pomonae beya pomonae pabi petayapucaenaewichi. ³ Ichitha barapomonae pomonae uva pabi petayapucaenaewi barapomonae waetaba pon copiya patopa, pon uva pabi pexeinaein itoroba. Yawa bapon butsino. Bapoxonae bapon caibe cobesa itorobiyatsi. ⁴ Pon uva pabi pexeinaein equeicha itoroba ichun pon pia petanacuichinchi. Barichiru bapon ibotontha matasipa cuinbabatsi, yawa abe jumetha biatainchi. ⁵ Equeicha pon uva pabi pexeinaein itoroba ichun pon pia petanacuichinchi. Barichiru bapon bexotsiru. Equeicha ichamonae itorobatsi. Ichamonae butsi, iru ichamonae jutebatsi.

⁶ “Cataunxuae awiya bapon pexanto tanacopatatsi, pon pexanto compa tatsi, po pexanto bichocono antobe. Matapainya bapon pexanto cotacaya itoroba bara beya. Bapon nanta xeinaeya jeye: ‘Metha barapomonae taxanto inta yabara baru cui itura jinaeinchi’, jei coxiyun. ⁷ Dapo jumetha pomonae uva pabi petayapucaenaewi poxonae bapon tainchi, barapomonae najei: ‘Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi’, najei barapomonae. ⁸ Bapoxonae barapomonae pon uva pabi pexeinaein pexanto tatsi tawaetabatsi. Poxonae bexotsi bapoxonae petupaein aisowa beya xotsi uva pabi pecuariya beya”, jei Jesús.

⁹ Bapoxonae Jesús yainyaba, jeye: “Pon uva pabi pexeinaein, zeta be cana ichi tsane pomon-aetha pomonae barapo uva pabi pia petayapuca-

naewichi? Apra bapon patopaena xua pejutebinexa tsane pomonae uva pabi pia petayapucaenaewichi. Bapoxonae barapo uva pabi catsina ichamonaetha xua petayapucaenaenexa tsainchi barapo uva pabi”, jei Jesús.

¹⁰⁻¹¹ Equeicha Jesús nayabara paeba barapomonaetha, jeye: “¡Paxam bara bayatha payorobameba Nacom Pejume Diwesi! Barapo diwesitha neyabara caunuta poxonae iboto yabara paeba, jeye:

‘Pebiwi pomonae ibo bon peacabiwi, barapo pebiwi xuba po iboto tabu caboca, po iboto peainya cui iboto.

Ichitha Nacom itapeta barapo iboto xua petabu cabocaenexa peainya cui ibotoxae.

Waxainchi nanta xeinatsi jeichichi: Maisa pocotsiwa Nacom exana naca tsita xanepana, jeichichi’, jei Nacom Pejume Diwesitha”, jei Jesús.

¹² Poxonae bapomonaе jume tane xua Jesús paeba, Jesús muxu pewaetabichi. Tsipei bapomonaе yaputane xua apra barapomonaе yabara paebatsi poxonae Jesús cueicueijei barapo pecayabara juta pepaebi diwesiyo. Daxota Jesús casebatsi. Tsipei barapomonaе jiwi cunuwatsi, daxota Jesús jopa waetabichi. Bapoxonae bara saya ponarucpa.

Meje yabara poxonae Jesús yabara cuiduba paratixi matoma po paratixi jiwi bewa catsibina pontha pon romanomonaе itorobiya pia pepa peewatsinchi

(Mt 22.15-22; Lc 20.20-26)

13 Bapoxonae pirapaeyo Jesús pia xainya betaitorobiyatsi fariseomonae jiwana, iruru pomonae Herodes pia pepuna jinompaewichi jiwana tatsi, xua daxita barapomonae piraichi Jesús petsipaebinxatsi xua Jesús xuya abeya pejume notsinexa. 14 Bara barapomonae Jesús pia xantha tatsi tapatatsi, jeye Jesustha:

—Pon jiwi Necuidubim. Bara payaputan xua bara jume xainyeya tsipaebame jiwi, xua matautano jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi bara catsita najupa. Xam jume xainyeya cuidubeibame jiwi Nacom pia peitorobi coyenewa. Incane yabara pana netsipaebare xua nanta xeiname, xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacua werena pona? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

15 Daichitha Jesús yaputane, xua barapomonae itara mexeya xanepanaeya pepaebi jiwi ichitha abeya peexanae jiwi. Jesús jeye:

—¿Eta pocotsiwa metha painya daichi pana nejuntu coyene jutame? Moya painta xawena paratiyo, tha taetsi, jei Jesús.

16 Bapoxonae barapomonae barapo paratiyo Jesús tacapoinchi. Poxonae Jesús tane barapo paratiyo, bapoxonae Jesús yainyaba barapomonae, jeye:

—¿Jintam pejumopere? ¿Yawano jintam wɔn ducuaɾe? jei Jesús.

Barapomonae Jesús jume notatsi, jeye:

—Apara romanomonae itorobiya pia pepa pee-watsinchi, jei barapomonae.

17 Jesús barai barapomonae, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua irɔ piawaxae tatsi, jei Jesús.

Barapomonae yabara najɔntɔ cui coyene cabenaeca pocotsiwa xua Jesús xanepanaeya beta jume nota.

Meje yabara poxonae Jesús yabara yainyabatsi po coyene xua equeicha asɔ pomonae pewerapeibiwi

(Mt 22.23-33; Lc 20.27-40)

18 Bapoxonae saduceomonae jiwana pata Jesús pia xantha tatsi xua Jesús piraichi petsipaebinexatsi. Saduceomonae barompaya pia pecuidubi coyenewa xeina xua pinae pomonae pewerapeibiwi equeicha jopa asɔ tsaibiyo. Barapo pecuidubi coyenewa jopa jɔpaeyo po pecuidubiwa Jesús pia pecuidubiwa tatsi xua pinae jiwi equeicha asɔ jinompaena poxonae werapa. Daxota barapomonae Jesús tsipaebatsi, jeye:

19 —Pon jiwi Pecuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. 20 Barichi, matha iru cae pewei-cho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. 21 Pon cotacaya naexana xuya pentapin coseuri pita xua bapoxonae pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. 22 Daxita barapo siete poyobe cuenta nanapentapona barapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. Bapoxonae matapainya iru bapowa tupa. 23 Xam, Jesús, ba paebame, ba jam: ‘Matacabi jopaena po matacabitha Nacom asu exanaena, xua jiwi asu exanaeinchi mathun wetsina’, ba jam. Poxonae barapo matacabi jopaena xua daxita jiwi asu jujuinaena, barapo matacabitha jintam metha bapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe, caepi jiwi cuenta nanapentapona barapowa, jei saduceomonae.

24 Bapoxonae Jesús jume nota barapomonae, jeye:

—Paxam apara catsawiya pana nejume notame, tsipei jopa beta payayutaem xua

Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. ²⁵ Poxonae petupaewi asu jujuinaena jopa jitha eenaponae tsane. Yawa barapomonae pexantixi jopa jitha cuarebaponae tsane. Tsipei barapomonae barichi tsane icha be matatsunpiwimonae ichi, po matatsunpiwi Nacom pia nacuatheicha jinompa, xua po matatsunpiwi jopa jitha enaeyo. ²⁶ Paxam bequein bara bayatha payorobame pocotsiwa Nacom yabara namchi pejume diwesitha xua pomonae equeicha asu jujuina pomonae pewerapeibiwi. Barapo diwesitha Nacom cueicueije i chaxota xua poxonae po naewa taxuncua, Nacom jeye: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ²⁷ Baxua Nacom paeba, tsipei Abraham, iru Isaac, iru Jacob pewerapaewi anoxuae equeicha caewa asu jinompa, Nacom pia nacuatheicha tatsi. Pomonae pewerapaewi, pomonae caewa equeicha asu jopa pejinompaewi, barapomonae jopa pia Nacom tatsi, pon itabocotha eca. Saya jame meisa pomonae pewerapaewi caewa equeicha asu pejinompaewi, barapomonae jame pia Nacom tatsi, pon itabocotha eca. Daxota paxam catsawa papaebame, jei Jesús.

Meje yabara poxonae Jesús yabara cuiduba po peitorobi cui coyene pepa peainya cui coyenewa (Mt 22.34-40)

²⁸ Caein pon jiwanamonaepin pomonae jiwi pecuidubiwi Moisés pia peitorobi coyene tatsi,

bapon jume tane xua Jesús iru saduceomona na-jume matsontsonobiya paeba. Matautano bapon jume tane xua Jesús xanepanaeya betiya jume nota barapomonaetha. Daxota bapon yainyaba Jesustha, jeye:

—¿Eta po peitorobi coyene pepa peainya cui coyenewara, po peitorobi coyene beyacaincha icha peitorobi coyene? jei bapon.

²⁹ Jesús jume nota bapontha, jeye:

—Po peitorobi cui coyenewa pepa peainya cui coyenewa jeye: ‘Paxam Israel nacuamonaepiwi pam pajume taema xuaje meje: Pon jiwi Pecanamataxeinaein bara compa pepa Pata Nacom, icha Nacom ajibi. ³⁰ Antobeinde Jinya Necanamataxeinaein bapon Nacom xua daxita nejantu coyene wetsina, matautano xua daxita jinya nepopona coyenewatha, matautano xua daxita nenanta xeinaewatha nentasipatha, matautano daxita nedaunwei coyenewatham’, jei barapo peitorobi coyenewatha, po peitorobi coyenewa pepa peainya cui coyenewa. ³¹ Po peitorobi coyene cotacaya itoroba ichaxotaba ‘dos’ jei, barapo peitorobi coyene be jume jupa po peitorobi coyene copiya ducua. Iruu barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. Icha peitorobi coyenewa aibi po peitorobi coyene peainya cui coyenewa, po peitorobi coyenewa xua beyacaincha po peitorobi coyenewe, jei Jesús.

³² Bapoxonae caein jiwanamonaepin pomonae jiwi pecuidubiwi Moisés pia peitorobi coyene

tatsi, bapon jeye Jesustha:

—Bara beta paebame pocotsiwa aunxuae paebame ponxaem jiwi Necuidubim. Bara xainyeya paebame xua pinae pepa Nacom bara compa popona xua icha pepa Nacom ajibi. ³³ Matautano bara xainyeya paebame xua pinae bewa Nacom antobetsi xua daxita wajunt_u coyene wetsina, matautano xua daxita wajinompae coyenewatha, matautano xua daxita wananta xeinaewatha wantasipantha, matautano daxita wadaunwei coyenewantha. Matautano bara xainyeya paebame xua wanacatsicuarab_u enaewi bewa pinae antobe tsainchi icha ichichi xua wacoutha naantobetsi. Baraxua jame bichocono peainya cui coyenein pocotsiwa bewa exanaetsi, beyacaincha xua duwein ompin tautatsi yawa xua ichawan tautatsi xua watuxusi exanaenexa Nacom nexa, jei bapon. ³⁴ Poxonae Jesús jume tane xua bapon beta jume nota, Jesús jeye:

—Bara saya tsiwiyo cata seica xua jinya nejume cowantsinexa xua nenanta_utsinexa Nacom pon jiwi itorobiya pia pepa Peewatsinchi, jei Jesús.

Bapoxonae nama dapon ajibi xua pon Jesús peyainyabinexa tsainchi.

Meje yabara poxonae Jesús nayabara jei: “Mesías, ¿jintam pia pemomoxi susato jiwanapin tatsira?” jei

(Mt 22.41-46; Lc 20.41-44)

³⁵ Bapoxonae Jesús yabara cuiduba Nacom pin pia botha tatsi, xua pon Mesías baraichi xua nayabara paeba Jesús, jeye:

—¿Eta pocotsiwa metha pomonae jiwi pecuidubiwi Moisés pia peitorobi coyene tatsi paebe xua pinae Mesías bapon David pia pemomoxi susato jiwanapin tatsi? ³⁶ Nacom pia Pejumoŋe t̃nax̃ tatsi David cueicueijeŋi exanatsi. David jeye:

‘Nacom pon Pecanamataxeinaein jiwi, Tanecanamataxeinaein baraichi pon Mesías, jeichichi: Tacoxa werena ecare, beya ab̃ tsane poxonaŋe necaaitafaetabi jiwi pia pecanamataxeinaeinchi tatsi caexanaeinchi, jei Nacom pia Pejumoŋe t̃nax̃ tatsi’, jei David.

³⁷ Icha David Mesías yabara jei, ‘Bapon Mesías Tanecanamataxeinaein’, jei, ¿eta xua metha tsipae xua Mesías apara David pia pemomoxi susato jiwanapin tatsi? jei Jesús.

Barapo pin bicheito bichocono tsimuxu w̃naetsi pocotsiwa Jesús cueicueijeŋi.

Meje yabara poxonaŋe Jesús muxuweta jiwi xua pomonae jiwi pecuidubiwi Moisés pia peitorobi coyene tatsi barapomonae pecuiyainwa tatsi (Mt 23.1-36; Lc 11.37-54; 20.45-47)

³⁸ Poxonaŋe Jesús cuiduba jiwitha, jeye: “Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha bapomonae ichi xua barapomonae bichocono ichichipa xua penama xatabiwa po paparuwan apipiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtontha jacobebina barapomonaetha xua jiwi pebar̃ cui itura jineibinexa barapomonae.

³⁹ Barapomonae bichocono ichichipa xua nanta caeneiba judiomonae pia penacaetutsi bontha tatsi ichaxota ba enathopeiba pomonae peainya cui jiwi penaexanaewi. Matautano barapomonae bichocono ichichipa xua eneiba ichaxota ba eneiba pomonae peainya cui jiwimonae poxona pexaewan tsinacaetuteiba penabaneibinexa tsane. ⁴⁰ Matautano barapomonae powaxi pecuenta werapaewaxichi piseurixi barapowaxi cueranta enatsi pia bon. Barapomonae naemata jopa cuinaya najume copababeibiyo poxona tsipaibeiba Nacom. Barapomonae bichocono peraxa jabebinchi poxona po mataqueitha Nacom jiwi yabara paebina penatsicuentisiwa xua abe peexanaexae Nacomtha. Barapomonae atene tsane beyacaincha poxona ichamonae atene exanaeinchi xua jopa pejume cowantsixaetsi Nacom”, jei Jesús.

Meje yabara poxona Jesús yabara paeba xua petsiriwa paratiyobe cata Nacomtha, powa pecuenta tupaewatsi piseuri

(Lc 21.1-4)

⁴¹ Poxona Jesús eca Nacom pin pia botha tatsi xua peitabara weya, xua ichaxota jiwi jeyeiba paratixi Nacom nexa, bapoxona Jesús tane xua pinmonae pomonae copei pexeinaewi paratixi nawita jeya ichaxota jiwi jeyeiba paratixi Nacom nexa. ⁴² Barapoxonaeru yabayo patopa, powa pecuenta tupaewatsi piseuri. Barapowa bichocono peacopebiwayo. Bapowa jeca ainya pecacomocae paratiyobe Nacom nexa. Barapo

paratiyobe tsiqui paratiyobe. ⁴³ Bapoxonae Jesús pijimonae waba, yawa jeye barapomonaetha:

—Bara xainyeya paca tsipaebatsi. Barapo yabwyo, powa pecuenta tupaewatsi piseuri, bapowa peacopeibiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae xua jeya xua Nacom nexa. ⁴⁴ Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca pocotsiwa bequein canantawenona xua pepoponaewa tsane bequein bichocono peacopeibiwayo, jei Jesús pijimonaetha.

13

Meje yabara poxonae Jesús yabara paeba xua ichamonae abe cana exanaena Nacom pin pia bo tatsi

(Mt 24.1-2; Lc 21.5-6)

¹ Poxonae Jesús Nacom pin pia bo wejoniya, bapoxonae caein Jesús pijimonae jiwana tatsi, Jesús tsipaebatsi jeichi:

—¡Pon jiwi Necuidubim, taema maisa pexeinya iboton, yawa pexeinya ibo bo! jei bapon.

² Ichitha Jesús jume nota bapontha, jeye:

—Aunxuae pataebename barapo iboton yawa xua pexeinya bon. Apra jopa cae ibotiyo naco-patuncuae tsane icha iboto peumatha. Daxita abe tsane, jei Jesús.

*Meje yabara poxonaē Jesús yabara paeba xua
copiya matha pew̃naeya exanaena petsita it̃tsi
coyenewa poxonaē daxita weraweracaenaba
(Mt 24.3-28; Lc 21.7-24; 17.22-24)*

³ Bapoxonaē Jesús pijimonaē bar̃ pona demx-
uwatheicha, po demxuwa pew̃n demxu Olivowa
tsipei baxota umena olivo naein. Poxonaē Jesús
ecopiya demxuwatheicha, po demxuwa Nacom
pin pia bo itama tayecatsi, bapoxonaē Jesús pi-
jimonaē tatsi Pedro, ir̃ Santiago ir̃ Juan, ir̃
Andrés, barapoyobe Jesús namicha tsipaebatsi.

⁴ Barapoyobe jeye:

—Paichichipan xua xam tapata netsipaebiwam
tsane ¿eta poxonaē metha ichamonaē baxua ex-
anaena poxonaē abe cana exanaena Nacom pin
pia bo tatsi? ¿Eta pocotsiwa tsane metha xua
pew̃naeya tsita itapeinya xeinaena po coyene
xua poxonaē imoxoyo daxita weraweracaenaba?
jei Jesús pijimonaē tatsi.

⁵ Jesús jume nota barapomonaetha, jeye: “Dota
pam, b̃ ichamonaē naerabiya paca muxu tsi-
paeba, xua daxota abe paexanaetsipame. ⁶ Tsipei
tsana patsina ayei bicheito jiwi pomonaē nat-
sicotaena icha be xan ichin. Barapomonaē jei
tsane: ‘Apara xan Mesías’, jei tsane. Poxonaē
barapomonaē muxuitorobiya paebina, bapox-
onaē pinmonaē jume cow̃ntsina.

⁷ “Pajume taename xua jiwi juinya
nabenoutsina xote, yawa xua juinya ir̃r̃
nabenoutsina icha ira beya. Daichitha jopa
pajunuwinde, tsipei baxua pew̃naeya matha
copiya tsane. Daichitha cataunxuae dapo
matabi aichica tsane xua poxonaē daxita

weraweracaenaba yatsicaewa. ⁸ Cae nacuapiwi iru icha nacuapiwino, barapo ainya nacuapiwibe nabenoutsina. Matautano iru pon nacua peewatsin iru ichandu pon icha nacua peewatsin, baponbe iru nantiya nabenabe. Matautano ainya nacuantha ira jijiyatsina. Matautano ainya nacuantha jainbo nacua tsane tsipei pin mayayo tsane. Baxua copiya matha tsane xua jiwi atene tsoponae tsane bichocono xua beya jopa nama juniya tsane.

⁹ “Ichitha dota pam, tsipei poxonaе baxua pewunaeya tsane jiwi paca teiquebina painya nepaca caenaetsinexa pomonaetha pomonae tomaran pentacaponae. Matautano paca cuainchina judiomonae pia penacaetutsi bontha tatsi. Yawa paca caponaena nacua peewatsiwi peitabaratha tatsi, painya tana nejume cowuntsixaemxae. Yawa paca caponaena pentacaponae peitabaratha tatsi pomonae iru itoroba jiwitha xua pon nacua peewatsin nexa painya tana nejume cowuntsixaemxae. Barapoxonae bara paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. ¹⁰ Barapo pecapanenebiyae diwesi, tamonae bewa paebinoutsina daxita nacuanpiwitha xua poxonaе pewunaeya tsane xua daxita weraweracaenaba. ¹¹ Poxonae barapomonae paca caponaena pomonaetha pomonae tomara pecanamataxeinaewi xua pia painya nepaca cayabara paebinexa tsane xua painya nenatsicuentiwa xua abe painya neexanaexae bapoxonae jopa patsiwanaya

junuwiya najantũ coyene exabinde xua painya netsipaebiwa tsane barapomonae. Paxam jame papaebare pocotsiwa xua caena bapoxonae Nacom cueicueijei paca exanaena. Bapoxonae po jume pacueicueijam tsane apara jopa poxoru painya coya paichichipaem, apara jame Nacom pia Pejumope tũnaxũ tatsi baxua paca cueicueijei exanaena. ¹² Jiwi barompaya pia peweicho jiwi caenaetsina ichamonaetha xua pejutebinexa tsainchi. Irũrũ coxiyeiwi ichamonaetha caenaetsina pia pexui. Irũ pexui paxa jiwi caenaetsina ichamonaetha pejutebinexa tsainchi. ¹³ Daxita nacuanpiwi paca casebina painya tana nejume cowũntsixaemxae. Ichitha pomonae awiya antũyapũsũya nejume cowũntsiya jinompaena xua beya yacuiya werapaeya othopaena poxonae bequein abe taexanatsi ichamonaebare barapomonae jame Nacom napaeba cana exanaena.

¹⁴ “Daniel pon Nacom peitorobi jume pepaebin, bapon caena bayatha yabara tsiwanaya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichũn Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo matacabi jopaenaba poxonae daxita weraweracaenaba”, jei Jesús. (Xan Marcos paca baraichi: “Pon yorobina po jume diwesi tinan moya jume naitaewatsina pia peyaputaenexa tsane”, paca jeichi.) Equeicha Jesús jeye: “Poxonae barapocotsiwa pataename bapoxonae pomonae Judea

nacuatha jinompa, barapomonae bewa demx-
 uwan berucupiyaena. ¹⁵ Barapo matabitha pon
 bo matatupatha uncua, bapon jopa bewa botha
 jonyae tsane xua penotsiwa tsane pocotsiwa
 tabobeinchi bomuxu tututha. Saya jame bewa
 nainya benaetsiricuaena. ¹⁶ Iruru pon pabitha po-
 pona, bapon jopa bewa caibeya ponae tsane botha
 xua penotsiwa tsane pia paparuwan. Saya jame
 bewa nainya benaetsiricuaena. ¹⁷ ¡Pai yabuxi
 tsobenae powaxi pexui bupana taenatsi barapo
 matabitha! ¡Pai iru powaxi pexui isaina bara-
 powaxi tsobenaeru! Tsipei acabe tsobenae tsane
 pexui. ¹⁸ Poxonae pewunaeya tsane baxua Nacom
 pawucare xua jopa painya nerucupaewa tsane
 poxonae awubo peaquexae bichocono. ¹⁹ Tsipei
 barapo matabintha jiwi bichocono pin peraxa
 exanaeinchi. Atene tsane beyacaincha poxonae
 jiwi atene tsaibi poxonae Nacom aena nacua ex-
 ana, xua equeicha nama bichocono pin peraxa
 tsane. Equeicha bexa bapoxonae bapana jopa
 baxua exanae tsane poxonae bichocono jiwi pin
 peraxa. ²⁰ Icha Nacom jopa be caentacabiy-
 obe exanaetsipae metha dapomonae ajibi tsi-
 pae pomonae panenebiya barapo peatene coye-
 newa weya. Daichitha Nacom be caentacabiyobe
 exanaena peantobexae pijimonae, pomonae pia
 peitapetsiwixae tatsi.

²¹ “Bapoxonae icha ichun paca jei: ‘Pataema
 bapon apara Mesías uncue pon Nacom itorobica’,
 paca jei, iru icha ichun paca jei: ‘Pataema
 bapon Mesías xota uncuiye’, paca jei, barapo
 jumein jopa pajume cowantsinde. ²² Tsipei
 pomonae pemuxuitorobi jiwi tsana patsina.

Barapomonae natsicotaena icha be xan ichin ponxaein Mesías. Matautano barapomonae natsicotaena icha be pomonae Nacom peitorobi jume pepaebiwi ichi tsane. Barapomonae pexeinya petsita itatsi coyenewan exanaena peitabocotha, po irathe tsaneno xua jiwi pemuxuitorobinexa tsainchi xua jiwi pejume cowantsinexa pocotsiwa barapomonae paeba. Barichir̃u pomonaetha pomonae Nacom pia peitapetsiwi tatsi pemuxuitorobinexa tsainchi xua ir̃ur̃u icha metha barapomonae pejume cowantsinexa tsaner̃u pocotsiwa barapomonae paeba. Ichitha jopa itac̃upae tsainchi xua barapomonae pemuxuitorobiwa tsainchi. ²³ Tsaca pajinompare, tsipei baxua tsiwanaya yabara paca tsiw̃nae muxu dutatsi”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin

(Mt 24.29-35, 42, 44; Lc 21.25-36)

²⁴ Equeicha Jesús namchi, jeye: “Po matabintha poxonae nacui wetsina xua jiwi pin peraxa tsane, bapoxona xometo nainya naquitabina. Jomocoichato jopa pentha tsane. ²⁵ Opiteiton peitaboco weothopeicaena. Matauta napuna torobabiyaena Nacom xua xuan itabocotha dubena. Bapoxona jopa xapain dubenanaeyo tsane. ²⁶ Bapoxona daxita jiwi taena peitabocotha xua po coyene apara tapatopeicaewa tsaneba tsaquinaebowatha peitaboco wetsica ponxaein Nacom Tananeitapetsin. Nacom pia peayapus̃u

itorobi coyenewatha matautano bichocono pexeinya itupanae coichathano patopeicaein.

²⁷ Matautano itorobin tamatatsunpiwi xua inta pecaetutsinexa pomonae taitapetsiwi. Nacaetutsina daxita nacuanpiwi jiwana, iru ichamonae pomonae ichaxota xometo weecoinapiwi jiwana, iru ichamonae pomonae ichaxota xometo bejopiyapiwi, jiwana, iru ichamonae pomonae pocotsiwa werenepiwi jiwana, iru ichamonae pomonae pocotsiwa berequepiwi jiwana.

²⁸ “Payaputaema barapo pecayabara juta pepaebi diwesiyo xua higuera nae. Jeye: Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua pentono perubenaenexa.

²⁹ Barapocotsi juta coyeneya ichi tsane poxonae pataename daxita baxuan pocotsiwa aunxuae paca tsipaebatsi pocotsiwa bexa exanaena, bapoxonae payaputaename, xua bara imoxoyo tsane xua tapatopae wanae tsane.

³⁰ Bara xainyeya paca tsipaebatsi daxita judiomonae naitapataya naexanaponaena beya yacuiya othopaena poxonae Nacom exanaena daxita baxuan pocotsiwa xuaunxuae paca tsipaebatsi.

Bapoxonae barapo judiomonae weraweracaena pomonae poxonaeru barapo matabitha jinompa. ³¹ Peitaboco aichurucuae tsane. Matautano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³² “Po matabitha baxua exanaena, matautano

po horatha baxua exanaena jiwi jopa baxua yabara yaputaeyo. IrꞰ matatsunpiwi pomonae peitaboco beicha jinompa baxuan irꞰꞰ jopa yabara yaputaeyo. IrꞰ xan ponxaein Nacom Pexanton baxua jopa yabara yaputaeinyo. Meisa saya Nacom, pon Waxa yaputane poxonae po matakabitha baxua exanaena. Matautano yaputane poxonae po horatha daxita exanaena baxua xuaunxuae paca tsipaebatsi.

³³ “Tsaca pajinompeibare xua tapatopae wꞰnae tsane. Yawa Nacomtha patsipaeba dubenanaebiyama, tsipei jopa payaputaem po mataqueitha patopaein. ³⁴ Barapocotsi coyeneya jꞰta ichi poxonae xan patopeicaein taitorobinexa tsane jiwi, icha be poxonae pebin ichi poxonae warapaena icha nacua beya. Poxonae bapon pewꞰnaeya tsane xua warapaena pia bo weya, copiya matha waba pia petanacuichiwichi. Bapon daxita pia petanacuichiwichi barompaya cobenata petanacuichiwantsi tatsi. Matautano bapon itoroba pon bo coiboto eena xua xanepanaeya bo pe-eenaenexa. ³⁵ Paxam tsaca pajinompare, tsipei jopa payaputaem poxonae patopeicaein, icha be barapomonae ichi poxonae jopa yaputaeyo poxonae pepatopaewa tsane pia pecanamataxeinaeinchi pon bo pexeinainxae. Barapomonae jopa yaputaeyo icha barapon patopaena poxonae quirei tsanaicha, ichacuitha icha bapon patopaena papaetha, ichacuitha icha bapon patopaena mataqueiwꞰnaeyo, ichacuitha icha bapon patopaena baya tsane. ³⁶ Barapomonae jopa yaputaeyo xua pia pecanamataxeinaeinchi nainya patopaena xua

yaichamaicha mata taenabounaeinchi poxonae maitumena. ³⁷ Meje xuaje paca tsipaebatsi, xua paca jeichi: ‘Tsaca pajinompare’, paca jeichi, baxua iru daxita jiwitha tsipaeban”, jei Jesús.

14

Meje yabara poxonae fariseomonae iru sacerdotemonae pia pentacaponaei tatsi daxita barapomonae Jesús yabara nanta xeinatsi po coyeneya xua Jesús pewaetabiwa tsainchi

(Mt 26.1-5; Lc 22.1-2; Jn 11.45-53)

¹ Acoibi po matabiyobe cataunxuae seica poxonae jiwi nacaetutsina penabanaenexa pexaewa, peyabara nanta xeinaenexa barapo matabi xua poxonae caena bayatha matha judiomonae Egipto nacua weya panenebiya. Barapo matabi pewun Pascua matabi wun. Barapo Pascua matabi wuntha jiwi xane pan, po pan xua jopa cotowiyo. Sacerdotemonae pia pentacaponaei tatsi, iru pomonae jiwi pecuidubiwi Moisés pia peitorobi coyene tatsi, daxita barapomonae nabaru muxu jei xua bepa pinae eta bichi tsane poxonae Jesús nameicha waetabinchi pebexubinexatsi. ² Ichitha barapomonae najeye:

—Abu jopa waetabi tsainchi poxonae jiwi Pascua matabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonae anaepanaya najume cayayataxubichipa, najei daxita barapomonae xua Jesús yabara paebatsi.

Meje yabara poxonaē petsiriwa Jesús mata epatabatsi penasiwa, po penasiwa petuxueiwa (Mt 26.6-13; Jn 12.1-8)

³ Poxonaē Jesús Betania tomaratha popona, bapoxonaē Jesús Simón pia bo tatsi betajoniyatsi, pon peperu sawinchi. Poxonaē Jesús eca pexaethopaewatha, bapoxonaē patopa petsiriwa. Bapowa capatopa alabastro ibo bosibu atsato, xua bichocono wunca penasiwa xua petuxueiwa. Barapo petuxueiwa bichocono ainya matoma. Poxonaē wacataba barapo bosibu, bapoxonaē Jesús mata epatabatsi barapo petuxuei nasiwatha. ⁴ Pomonaē iru baxota ena, barapomonaē jiwana anaepana, yawa caemonaē najei:

—¿Eta pocotsiwa metha saya xuba jane barapo petuxuei nasiwa? ⁵ Barapo petuxuei nasiwa becaenaetsipatsi. Bapoxonaē bexeinaetsipatsi trescientos po paratiximonaēbe po paratiximon-aebe xua namatomata xua poxonaē trescientos matabibibe nexa xua poxonaē nacuita. Barapo paratixitha beyawenaetsipatsi peacopeibi jiw, najei barapomonaē.

Bapoxonaē barapomonaē barapowa casebatsi.

⁶ Ichitha Jesús jeye barapomonaetha:

—Moya pande, bara pacopare. ¿Eta pocotsiwa metha barapowa pabiataneme? Pocotsiwa barapowa inta exana apara seicayarū xua pexeinya coyene inta exana. ⁷ Barapo irathe peacopeibi jiw paca barū jinompeibina ataya tsalibi tsane. Paca itacupa xua beta pata exaname barapomonaē poxonaē paichichipame. Ichitha nama paxam jopa ataya paca barū poponaē tsainchi barapo

irathe poxonaē paca itacupa xua pana neyawename. ⁸ Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wunaeta xua matha tana neboyaenexa poxonaē tupaēin. ⁹ Bara xainyeya paca tsipaebatsi. Daxita nacuanthan poxonaē jiwi cueicueijei tsane Nacom pia peca-panenebiyae diwesi barapo jiwi yawa yabara pae-bina xua pocotsiwa poxonaē bapowa inta exana xua jiwi bapowa peyabara cui nanta xeinaenexatsi, jei Jesús.

*Meje yabara poxonaē Judas, Jesús caenaetaxotsi
(Mt 26.14-16; Lc 22.3-6)*

¹⁰ Barapoxonaē Judas Iscariote pon doce poyobe jiwana, pomonaē Jesús pijimonaexae tatsi, bapon sacerdotemonaē pia pentacaponae wi tatsi beya pona. Bapon pona xua petsipaebinexa xua Jesús caenaetaxubinchi barapomonaetha. ¹¹ Poxonaē barapomonaē baxua jume taerucupa bichocono ichichiparucupa baxua. Yawa barapomonaē Judas Iscariote muxu tsipaebatsi xua paratixi catsibapaebatsi. Bapoxonaē Judas tamropata pitaba xua jeita, xua po coyenetha Jesús pecaenaetaxubiwa tsainchi barapomonaetha poxonaē peyapu xanepanaewatha.

*Meje yabara poxonaē Jesús pijimonaē baru na-
bane Pascua wun matabitha
(Mt 26.17-29; Lc 22.7-23; Jn 13.21-30; 1 Co 11.23-26)*

¹² Nexata copiya matakabi jopa po matakabi tsiwana penanta carucuae matakabi xua po mat-acabintha poxonaе jiwi tsinacaetutsina, xua pen-abanaenexa pan, po pan jopa muxuna pentsiyo levadura mataw^{wn}, pocotsiwa xua cotowa exana pan. Barapo penanta carucuae matakabitha ba corderoxi pebtoxi xua oveja coxi jutebatsi xua jiwi pexaenexa. Bapoxonaе barapo jiwi cayabara nanta xeina xua caena bayatha pia pamo susato jiwi tatsi corderoxi juteba yawa xane beya poxonaе panenebiya Egipto nacia weya. Barapo matakabitha Jesús pijimonaе yainyabatsi, jeye:

—¿Exota ichichipame xua xota pexaewa paca tsiw^{wn}naetsinchi wanabanaenexa tsane xua Pascua w^{wn} matakabi nexa? jei barapomonaе.

¹³ Bapoxonaе Jesús itoroba nacueyatabe poyobe ponbe xua doce poyobe jiwana, pomonaе Jesús pijimonaе tatsi. Jesús jeye:

—Tomara beya paponarebe. Barapo tomarathiya pantenta ponaenamebe pebin pon mera yantana ponaena juruwatotha. Bara bapon papuna pondebe. ¹⁴ Bo beya paponarebe ichaxota bapon joniyaena. Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwimonae bar^u nabanaein pexaewa Pascua w^{wn} matakabi nexa?’ jei bapon, pajandebe. ¹⁵ Bapoxonaе bapon paca tsita itacayopichinabe po tutu pin tutu po tutu xua asiyeicha po tutu xua bayatha tutu xaneba. Barapo tututha pexaewa pana cui w^{wn}naetajebare xua wanabanaenexa pexaewa barapo Pascua w^{wn} matakabi nexa, jei Jesús.

¹⁶ Bara bapoxonae baponbe ponatababe. Bara patopabe tomaratha. Bara tanebe daxita be po coyeneya bayatha Jesús paeba. Bapoxonae pexaewa nacui wunaetajebabe Pascua wun matakabi nexa xua penabanaenexa.

¹⁷ Poxonae quirei tsanaicha bapoxonae Jesús pijimonae baru patopa barapo tututha.

¹⁸ Poxonae Jesús pijimonae cataunxuae baru xunaboca pexaethopaewatha, bapoxonae Jesús pijimonae barai, jeye:

—Bara xainyeya paca tsipaebatsi caein pon paxam jiwana pam pon nebaru xaeuncua bapon necanaetaxubina ichamonaetha, jei Jesús.

¹⁹ Nexata bapoxonae Jesús pijimonae tatsi unthuthu wecoyei tsurucupae, nexata daxita tsana jei tsoponae Jesustha:

—¿Apara xan cacaenaetaxubinchi? jei daxita barapomonae xua Jesús tsana yainyabaponatsi.

²⁰ Jesús jume nota barapomonaetha, jeye:

—Pon paxam jiwana pam xua doce poyobe jiwana xua cae paratotha pana nabaru jajaucuncuaponanbe pan apara bapon necaenaetaxubina ichamonaetha. ²¹ Xan ponxaein Nacom Tananeitapetsin bewa tupaen, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wunae tsipae icha bapon bayatha jopa naexanaetsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

²² Poxonae Jesús pijimonae baru xaeuncua, bapoxonae Jesús pecobetha pita pan. Yawa Paxatha tsipaeba, jeye: “Axa, maisa juntu coyene

weiweinan xua pan pata tanecatsiwam”, jei. Bapoxonae Jesús pecobetha pan epa janaca, yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitapaewatsi tsainchi, jei Jesús.

²³ Bapoxonae Jesús equeicha pecobetha pita corotiyó, yawa Nacomtha tsipaeba, jeye: “Axa, maisa juntu coyene weiweinan xua corotiyótha ecareca pepa uva mera xua pata tanecatsiwam”, jei. Bapoxonae Jesús pijimonae cata corotiyó xua pejiwana aapaponaenexa. Daxita barapomonae bara jiwana aapapona. ²⁴ Bapoxonae Jesús jeye pijimonaetha:

—Pena petsiwanae muxu dutsi coyenewa paca tsipaebatsi. Barapo uva mera po mera xua corotiyótha tsijuntu eca yabara caunuta tajana barapo uva mera xua jana othoparenaein poxonae tapaein. Barapo jana tsita itapeinya xeinaena xua jiwi pinmonae yabara jಂತemainaein abe pia peexanae cuiru coyenein tatsi. ²⁵ Bara xainyeya paca tsipaebatsi, barapo uva mera jopa equeicha paca baru apae tsainchi anoxuae. Meisa abu bexa tsane pena coyenewatha paca baru apaeinchi barapo uva mera poxonae Nacom neexanaena xua itorobiya ewatsin jiwi, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeinyo”, pinae yabara jei tsainchi Jesús (Mt 26.30-35; Lc 22.31-34; Jn 13.36-38)

²⁶ Poxonae Jesús pijimonae baru najume weta xua naxuna Nacom nexa, bapoxonae Jesús pijimonae baru pona demxuwā beya. Barapo demxuwā pewun demxu Olivowa, olivo naein peume-naexae baxota. ²⁷ Nexata Jesús pijimonae barai, jeye:

—Anoxuae barapo merawithe daxita pam pana necuentarucupaename tapaca urapentsixaetsi tsainchi. Baxua paexanaename, tsipei Nacom Pejume Diwesitha paca yabara cui tsiwunaeya jeye: ‘Poxonae ovejamonae peewatsin bexubin, bapoxonae ovejamonae tsanarucupaena’, jei Nacom. Penamchixae poxonae ichamonae newaetabina tanebexubinexa pana necuentarucupaename. ²⁸ Ichitha taeyarapaeyo Nacom equeicha asu neexanaena. Bapoxonae paca tsiwana patopiyaeinchi Galilea nacua beya, poxonae bara beya paponaname, jei Jesús.

²⁹ Nexata Pedro Jesús jume notatsi, jeye:

—Bequein ichamonae cacuentarucupaena jinya neuraxubixae, nama xan bapana jopa cacuenta naetsiricuae tsainchi taneuraxubix-aemxae, jei Pedro.

³⁰ Nexata Jesús Pedro jume baraichi, jeye:

—Bara xainyeya catsipaebatsi, po merawithe pewunaeya poxonae ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane, jei Jesús.

³¹ Ichitha Pedro equeicha jume daunweya, jeye:

—Bara bequein capuna tupaeninchi ichitha baxua jopa cayabara paebi tsainchi, jei Pedro.

Irurũ daxita Jesús pijimonae tatsi bara jumichi, nanta jũpiya paeba.

Mejeyabara poxonae Jesús Paxa tsipaeba ichaxota tsica iriyo, po iriyo pewũn Getsemaní
(Mt 26.36-46; Lc 22.39-46)

³² Nexata Jesús pijimonae barũ patopa ichaxota tsica iriyo po iriyo pewũn Getsemaní. Baxota Jesús barai pijimonae, jeye:

—Xote abũ paenare tha matha Taxatha tsipae-bichi, jei Jesús.

³³ Jesús barũ pona Pedro irũ Santiago irũ Juan. Bapoxonae Jesús bichocono unthũthũ wecoyei, yawa bichocono unthũthũ deideije. ³⁴ Nexata barapo acoibi poyobetha Jesús barai, jeye:

—Bichocono jũntũ coyene natsepiya wecoyan, tsipei muxu tatũpae. Xote paenare, yawa payoy-ocare xua painya tanebarũ naitaewatsinexam, jei Jesús.

³⁵ Nexata Jesús tsiwiyo dabe natsixitabiya, irabe taeuncuareca, tsipei jopa juniya ajũntũtaneyo. Jesús yaputane xua bichocono tsiatene tsane xua daxita jiwi abe pia peexanae coyenein tatsi. Daxota Jesús Paxa wũca xua icha itacũpatsi xua jopa penantawenonaewa xua peatenewa.

³⁶ Bapoxonae Jesús Paxa tsipaeba, jeye: “Axa caitacũpa xua daxita exaname. Icha ichichipame xua taneyawenaewam tsane, newepire pocotsiwa neajũntũtane exana. Ichitha jopa necana exanaeinde xua pocotsiwa ichichipan. Saya jame necana exande xua pocotsiwa ichichipame”, jei.

³⁷ Nexata Jesús equeicha caibe iya ichaxota pijimonae jiwana tatsi taenatsi xua acoibi poyobe.

Ichitha barapomonae maita. Jesús Pedro baraichi, jeye:

—Simón, ¿maituncuame? ¿Jopa caitacupaeyo xua yoyocame xua jinya tanebaru naitaewatsinexam, matautano xua bara cae horathano? ³⁸ Maisa payoyocare. Nacom patsipaebare xua jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa, ichitha painya pepon bichocono paacoyenefaetabim xua painya netsipaebiwa Nacom.

³⁹ Equeicha Jesús bara nama caeto caibeya pona xua Paxa petsipaebinexa barapo jumetha, po jumetha copiya Paxa tsipaeba. ⁴⁰ Bapoxonae equeicha Jesús pijimonae beya pona xua acoibi poyobe. Daichitha barapo acoibi poyobe came maitumena, tsipei bichocono itata tsacatsaquei xua itamaipana. Barapomonae jopa yaputaeyo xua Jesús petsipaebiwatsi poxonae yaichamaicha mata taenanaboumeinchi. ⁴¹ Bara nexata equeicha Jesús saya cuenta pona pijimonae, xua Paxa equeicha petsipaebinexa. Equeicha pijimonaetha patopa acoibi po cuiyobetha. Jesús jeye pijimon-aetha:

—¡Moya bara painya nepu maitumenaende, aunxuae jopa Nacom patsipaebim xua painya necayawenaenexa! Bayatha tsuxubi po horatha xua xan ponxaein Nacom Tananeitapetsin, ichan necaenaetaxubina ichamonaetha, pomonaetha pomonae peantucoyenebe jiwi. ⁴² Panacosabapende, panonobapondeno.

Antha bu poinchi. Dota dawerena pon necaenaetaxubina ichamonaetha, jei Jesús.

*Meje yabara poxonae Jesús waetabatsi
(Mt 26.47-56; Lc 22.47-53; Jn 18.2-11)*

⁴³ Poxonae Jesús cataunxuae tsipaebuncua pijimona, bapoxonae Judas patopa. Bapon Judas doce poyobe jiwana caein pomonae Jesús pepa pijimonaexae tatsi. Judas pinmonae baru patopa Jestutha. Ichamona cusin cajinjinca. Ichamona iwabi cajinjinca. Daxota daxita barapomonae pata tsipei sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi, iru pomonae pitiri jiwiru daxita barapo pentacaponae itoroba barapomonaetha. ⁴⁴ Judas pon Jesús caenaetaxubinchi beya poxonae bapon patopa cou tsiwanaya paeba barapo pin bicheitha cou Jesús yabara paebatsi, cou jeye: “Pon tsutsubin bapon apara barapo pebin Jesús. Nexata moya bara pawaetabare. Pacaponde xua soldadomonae xainwaicha pecutsinexa tsane”, jei Judas.

⁴⁵ Nexata Judas Jesús imoxoyo caquita poinchi. Bapoxonae nainya Jesús jeichichi:

—Pon jiwi Necuidubim, ¿xamda? jei Judas.

Bapoxonae nainya Judas Jesús tsutsubatsi.

⁴⁶ Nexata barapomonae pomonae Judas pebaru patopaexae, Jesús imoxoyo caquita umenarucupatsi. Bapoxonae Jesús waetabatsi.

⁴⁷ Caein pon Jesús pijimona tatsi jiwana, bapon nainya cusi namara wejonta. Bapoxonae bapon muxuyoro catsoniba, pon sacerdotemonae pia pepa pentacaponaein tatsi tanacuitatsi bapon

muxuyoro catsonibatsi. ⁴⁸ Bapoxonae Jesús jeye jiwitha:

—Pacapatame cusin, yawa iwabi ichi be poxonae pacana ichim pontha pon jiwi pecaibin. ⁴⁹ Daxita matakabin Nacom pin pia botha tatsi paca bar_u poponeibatsi. Paca cuidubeibatsino. Daichitha bapoxonae jame jopa pana newaetabim. Ichitha daxita baxuan neyabara canacui jume weta exana, bayatha Nacom Pejume Diwesitha tana necui yabara w_unae tsiwanaya paebixae pomonae Nacom peitorobi jume pepaebiwi.

⁵⁰ Bapoxonae Jesús daxita pijimonae cuen-tar_ucupatsi.

⁵¹ Bapoxonae pewowin Jesús puna poinchi pon saya meisa paparuwatha naepa yaraba. Barapo pewowin waetabatsi pomonae Judas bar_u patopa.

⁵² Ichitha barapo pewowin nama xueta-cuta pia paparuwa epato. Tamasa naetsiricua.

Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Pomonae Jesús teicatsi, barapomonae Jesús capoinchi pon sacerdotemonae pia pepa pentacaponaein tatsi pia bo tatsi beya, pon yatsicaya peainya cuin. Baxota ir_u sacerdotemonae pia pentacaponaein tatsi nanacaetuta. Ir_u pitiri jiwino nanacaetuta. Baxota ir_u nanacaetuta pomonae jiwi pecuidubiwi Moisés pia peitorobi coyene tatsi. Daxita barapo penacaetutsi jiwi,

barapomonaetha jiwi w^{un}n duta “Pecanamata caitorobi jiwi bicheito”, jei. ⁵⁴ Ir^u Pedro Jesús tsiwiyo taj^u pu taetae tsiniyatsi beya poxonaе patopa panatha, po panatha ichaxota sacerdotemonae pia pepa pentacaponaein tatsi tauncuatsi bo. Poxonaе Pedro pana tututha joniya bapoxonaе naeca imoxoyo policiamonaetha pomonaе Nacom pin pia bo tatsi pe-eenaewi. Pedro cui tane po coyeneya xua Jesús cana exanatsi pomonaе nacaetuta. Pedro nonopeca isototha.

⁵⁵ Sacerdotemonae pia pentacaponaeawi tatsi, ir^u ichamonaeno pomonaе pecanamata caitorobi jiwi bicheito, daxita barapomonaе jeita ichamonaе pomonaе xua Jesús naerabiya peyabara paebinxatsi pocotsiwa xua Jesús paeba, xuano xua exana, pia barapo jumetha paebichi xua bara Jesús tupa peexanaewa tsainchi. Bara bequein pin bicheito pata xua Jesús abeya peyabara paebinxatsi, ichitha cataunxuae barapomonaе pomonaе pecanamata caitorobi jiwi bicheito came jopa xeinaeyo po diwesi xua daxota Jesús pebexubinxatsi. ⁵⁶ Pinmonae bequein Jesús yabara naerabiya paebatsi, ichitha tsanaya barompaya pia diwesi paeba. ⁵⁷ Ichamonaе asiya umena, yawa naerabiya Jesús yabara paebatsi.

⁵⁸ Barapomonaе jeye:

—Paxan pajume tan xua bapon Jesús paeba, jeye: ‘Xan abe exanaein barapo Nacom pin pia bo, po bo jiwi pia coutha acaba. Acoibi po matacabibe icha bo equeicha exanaein po bo jiwi jopa exanaeyo’, jei Jesús, jei barapomonaе.

⁵⁹ Daichitha barapomonaе awiya came cataunxuae tsanaya barompaya ichawan

paeba. Barapomonae pia pepaebiwan xua Jesús peyabara paebiwatsi jopa pebura nanta jupaya nanta xeinaeyo.

⁶⁰ Bapoxonae sacerdotemonae pia pepa pentacaponaein tatsi asiya uncuataba xua daxita peitabaratha tatsi. Bapoxonae bapon Jesús yainyabatsi, jeichichi:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei bapon.

⁶¹ Daichitha Jesús saya moya uncua. Jopa jume notsiyo bapontha. Daxota equeicha sacerdotemonae pia pepa pentacaponaein tatsi jeye Jestha:

—¿Bara yatsicaya xam Mesías pon Nacom necaitorobin, pon Nacom Pexantom, po Nacom wuna pajainteiban? jei bapon.

⁶² Bapoxonae Jesús jume nota bapontha jeye:

—Aa, bara xan tsocuaein apara, Nacom Pexanton apara. Paxam pana netaename xua xan ponxaein Nacom Tananeitapetsin ecaein Nacom pecoxa weya tatsi, pon peayapus itorobi coyenewa pexeinaein. Matautano pana netaename poxonae equeicha patopeicaein tsaguinaebowantha xua peitaboco wetsica, jei Jesús.

⁶³ Nexata bapoxonae sacerdotemonae pia pepa pentacaponaein tatsi, pin anaetha anaya pia paparuwa nata tsitsinaxuba, peyabara anaepanaexaetsi Jesús, jeye:

—¡Nama equeicha jopa wanantawenonaewa ichamonae xua wanaca tsipaebiwa tsane xua bapon peyabara paebiwatsi! Bapon natsiaenae

exana abe pepaebixae barapo jume poxonaе Nacom pexanto najainta. ⁶⁴ Bara paxam pajume taneme pocotsiwa bapon paeba pocotsiwa Nacom jopa ichipaeyo. ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo pecanamata caitorobi jiwi bicheito jeye:

—Bara xainyeya paebame. Jesús abe pia pepaebixae, Nacom tsitatsi xua bapon Nacom tsita nat-sicuentatsi. Daxota bapon bewa tupaena, jei barapo pecanamata caitorobi jiwi bicheito.

⁶⁵ Bapoxonaе barapomonaе jiwana, peonetha Jesús anaya itabara subabatsi. Poxonaе Jesús itacuere cutatsi, bapoxonaе Jesús itabara tsaquibacotatsi pecobetha. Barapomonaе jeye Jesustha:

—Incane pana netsipaebare: ¿Jintam caitabara tsaquibobara xua bequein paca itabara cutatsi? jei barapomonaе.

Bapoxonaе iru policiamonae pomonaе Nacom pin pia bo tatsi peenaewi Jesús itabara cuaintatsi.

Meje yabara poxonaе Pedro Jesús yabara pae-batsi xujeye: “Jopa dapon yaitaeinyo”, xua yabara jeichichi Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Poxonaе cataunxuae Jesús cana exanompatsi bapoxonaе iruru Pedro eca panatha tsica xua bo peuma werena. Bapoxonaе yabuyo patopa powa sacerdotemonaе pia pepa pentacaponaein tatsi tanacuitatsi. ⁶⁷ Poxonaе barapowa Pedro tainchi

xua nonopeca, Pedro came taeuncuatsi. Pedro jeichichi:

—Apara xam bayatha iruru napuna poneibame Jesús, pon Nazaret tomarapin, jei yabuyo.

⁶⁸ Ichitha Pedro jume matawenta bapowa, jeye:

—Jopa dapon yaitaeinyo, matautano jopa yaputaeyino pocotsiwa xua yabara paebame, jei Pedro.

Bapoxonae Pedro pona bomuxu coiboto beya. Bapoxonae wacara pebto fiba. ⁶⁹ Equeicha bapowa Pedro tainchi. Bapoxonae bapowa tamropata pitaba xua tsipaeba pomonaetha pomonae baxota iru umena. Bapowa Pedro yabara paebatsi, jeye:

—Apara bapon pomonae Jesús pijimonae tatsi jiwanapin, jei.

⁷⁰ Equeicha Pedro jume matawenta bapowa, jeye:

—Jopa dapon yaitaeinyo, jei Pedro.

Pirapaeyo pomonae umena baxota equeicha Pedro tsipaebatsi jeichichi:

—Bara xaniwaicha barapomonae jiwanam. Apara xam Galilea nacuapim, jei pomonae umena.

⁷¹ Nexata Pedro jume daunweya, jeye:

—Bara Nacom peitabaratha xainyeya paca tsipaebatsi pocotsiwa bara xainyeya tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi: ‘Jopa dapon yaitaeinyo’, xuaunxuae pon payabara paebame, jei Pedro.

⁷² Bapoxonae iruru caena nainya wacara pebto equeicha fiba. Nexata Pedro nanta xeinataba

xua bayatha Jesús Pedro tsipaebatsi poxonaе jeye: 'Xam barapo merawithe pewanaeya poxonaе ainya jume cuiyobetha wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo neyabara jam tsane. Bapoxonaе nainya iru wacara pebto fibina', je-ichichi Pedro xua Jesús paeba. Nexata bapoxonaе Pedro bichocono wecoyei peanthathatanexae xua Jesús peyabara paebiwatsi.

15

Meje yabara poxonaе Jesús uncua Pilato peitabaratha tatsi

(Mt 27.1-2, 11-14; Lc 23.1-5; Jn 18.28-38)

¹ Poxonaе pentha tsina sacerdotemonae pia pentacaponaewi tatsi, iruru judiomonaе pia pitiri jiwi tatsi, iru pomonaе jiwi pecuidubiwi Moisés pia peitorobi coyenein tatsi, iruru ichamonaе pomonaе pecanamata caitorobi bicheito jiwi jiwana, daxita barapomonaе yabara nacaetuta xua nanta jupaya peburaya penanta xeinaenexa po coyeneya xua Jesús pebexubiwa tsainchi. Bapoxonaе barapomonaе Jesús maxu cutatsi. Bapoxonaе capoinchi Pilato beya. ² Pilato Jesús yainyabatsi, jeye:

—¿Bara xam yatsicaya judiomonaе itorobiya pia pepa neewatsin? jei.

Jesús jume nota, jeye:

—Xuaunxuae paebame bara baxua apara, jei Jesús.

³ Sacerdotemonae pia pentacaponaewi tatsi namchi Pilatotha, jeye:

—Bapon Jesús bichocono exana pocotsiwa xua abe, jei barapomonaē. ⁴ Equeicha Pilato yainyaba Jesustha, jeye:

—¿Jopa jume notsim pocotsiwa barapomonaē abe cayabara paeba? Maisa barapomonaē bichocono abe cayabara paeba, jei Pilato.

⁵ Ichitha Jesús jopa equeicha jume notsiyo, Pilato jopa jume notichi. Daxota Pilato najuntũ coyene cabenaeca poxoru Jesús jopa nayabara paebiyo xua pia coya penayawenaenexa.

Meje yabara poxonaē Pilato jume barũ jejei xua Jesús bara pebexubiwa tsainchi ichamonaē (Mt 27.15-31; Lc 23.13-25; Jn 18.38–19.16)

⁶ Bara nama matakabi jopa poxonaē ba Pilato pia cui xeina poxonaē ba jiwi tsinacaetuta pexaewa penanabanaenexa. Barapo matakabitha Pilato ba pu sotaba pon ba jiwi itapeta cowai xua Pilato peisanaxubinexa pomonaē jiwi pecũbi botha peenaewi jiwanaēmonaēpin. ⁷ Barapo jiwi pecũbi botha irũrũ eca pon pewũn Barrabás. Bapon bichocono abe peexanaēin tsipei caena bayatha matakapona ichamonaē xua barapomonaē na-jume tsacaba cana exanatsi xuano xua jiwi jutebatsi. ⁸ Bapoxonaē pin bicheito jiwi pata Pilatotha, xua Pilato pewũcaenexa tsainchi xua bapon exanaena pia cui coyeneya poxonaē xua isanaxubina caēin pomonaē jiwi pecũbi botha peenaewi jiwanaēpin. ⁹ Bapoxonaē Pilato yainyaba barapomonaē Jesús yabara, jeye:

—¿Paichichipame xua tapu sotabiwa tsane pon judiomonaē itorobiya pia pepa peewatsinchi? jei.

¹⁰ Baxua Pilato paeba, tsipei bapon yaputane xua

sacerdotemonae pia pentacaponae wi tatsi Jesús uwatsi. Daxota barapomonae Jesús caenaetaxubatsi Pilatotha. ¹¹ Ichitha barapo sacerdotemonae pia pentacaponae wi tatsi jiwi jume cui tsacabatsi xua anaepana cana exanatsi, xua Pilato pecui itorobinexatsi xua Barrabás pepu sotabinexatsi, xua Jesús jopa pepu sotabinexatsi. ¹² Equeicha Pilato yainyaba barapo jiwi, jeye:

—¿Eta xua cana exanocuaein pon pawan dutame, xua pajam: ‘Judiomonae itorobiya pia pepa peewatsinchi?’ pajam, jei.

¹³ Barapomonae Pilato daunweya jume notatsi, jeye:

—¡Bewa maisa naetotha tɔparucua exanaem! jei.

¹⁴ Bapoxonae Pilato jeye barapomonaetha:

—¿Eta pocotsiwa xua metha jane, xua abe exana? jei.

Ichitha equeicha daumetha jume daunweya, jeye:

—¡Bewa maisa naetotha tɔparucua exanaem! jei.

¹⁵ Pilato ichichipa xua bapon jopa peita aenae-aeneiwatsi jiwi. Daxota Pilato Barrabás nama pu sotabatsi. Bapoxonae Pilato itoroba xua soldadomonae bara Jesús moya pecuainchinexatsi pocotsiwatha eewa xua bichocono amɔpiya xua xota jiwi cuainteibatsi poxonae abe exaneiba. Matautano itorobano xua moya bara Jesús tɔparucua exanaeinchi naetotha.

¹⁶ Bapoxonae soldadomonae Jesús capoinchi Pilato pia bo tatsi beya po soldadomonae yapu eena Pilato pia bo tatsi. Bapoxonae

barapo soldadomonae waba icha soldadomonae xua daxita barapo soldadomonae Jesús pematawacaicha umenaenexa tsainchi.

¹⁷ Bapoxonae Jesús pia paparuwa juma xuenatsi. Yawa juma xatatatsi icha paparuwa po paparuwa tsobia xua Jesús be pecana exanaenexatsi pon jiwi itorobiya pia pepa peewatsinchi. Yawa poxonae nacobe weta xua fata pee bapoxonae Jesús muxuna mata xatatatsi barapo pee tepa. ¹⁸ Bapoxonae barapomonae tamropata notarucupa xua Jesús cui caponaeya jeichichi:

—¿Xamda? ¡Apara xam barapom pon judiomonae itorobiya pepa Neewatsin! jei.

¹⁹ Po naewa xua Jesús cobenatatsi bayatha, barapo naewa Jesús cobe wepitatsi. Bapoxonae barapo naewatha Jesús mata cuaintatsi. Matautano Jesús yabara naone subabatsi. Bapoxonae barapomonae Jesús peitabaratha tatsi pentabocototha taumeinchi, xua Jesús naerabiya wuna pejainchinexa tsainchi. ²⁰ Poxonae Jesús cana cui wetatsi xua cui caponatsi equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tatsi. Bapoxonae Jesús capoinchi xua pecobe matabobinexatsi naetotha pebexubinexatsi.

Meje yabara poxonae Jesús tɔparucua exanatsi naetotha

(Mt 27.32-44; Lc 23.26-43; Jn 19.17-27)

²¹ Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin pon pewan

Simón. Bapon wexua werena pona. Bapon Alejandro paxa tatsi, iru xua Rufo paxa tatsi. Bapoxonae barapo soldadomonae Simón itorobatsi xua pecaponaenexa Jesús pia naeto tatsi, po naetotha tɔparucua peexanaenexatsi Jesús.

²² Bapoxonae Jesús capoinchi uruto beya, po uruto be jiton matasipa piwa, daxota barapo uruto jiwi wɔn unuta “Gólgota”, jei. ²³ Baraxotiya Jesús apatatsi vino mera, po vino mera equeicha muxuna epareca mirra mera matawɔn po mera bichocono atsu. Ichitha Jesús jopa apaeyo.

²⁴ Matautano bapoxonae Jesús tɔparucua exanatsi. Bapoxonae barapo soldadomonae nata tsaba Jesús pia paparuwan tatsi. Barapomonae bebeya ibotixi penacueranta notsinexa Jesús pia paparuwan tatsi.

²⁵ Poxonae baya a las nueve tsuxubi, bapoxonae Jesús tɔparucua exanatsi naetotha. ²⁶ Jesús pentutu wetsica tadutatsi napaewa xua barapo napaewatha tina. Barapo petinae dutsiwa Jesús yabara jeichichi: “Baponje apara judiomonae itorobiya pia pepa peewatsinchi”, jei barapo petinae dutsiwa. ²⁷ Irurɔ ponbe jiwi pecaibinbe tɔparucua exanatsi naetotha imoxoyo ichaxota Jesús ducua. Ichɔn Jesús petsocona wetarucuiyatsi, ichɔn pecoxa wetarucueinatsi. ²⁸ Poxonae barapomonae baxua exana, bara barapomonae yabara jume cui weta pocotsiwa xua bayatha Nacom Pejume Diwesitha Mesías yabara paebatsi xua jiwi paeba, xua jeye: “Bapon pomonae abe peexanaewi jiwana”, jei.

²⁹ Pomonae Jesús xenta poinchi barapomonae

Jesús cui capoinchi. Yawa Jesús yabara itata naichaquebatsi. Barapomonae jeye Jesustha:

—¡Xam bayatha jam: ‘Nacom pin pia bo abe exanaein, bapoxonae equeicha acoibi po matacabibe xanebin’, jam! ³⁰ ¡Moya bara jinya coutha nacapanepare naeto wetsica icha bara metha Nacom Pexantom tsipaem! jei barapomonae.

³¹ Ir_u sacerdotemonae pia pentacaponae wi tatsi, ir_u pomonae jiwi pecuidubiwi Moisés pia peitorobi coyene tatsi, barapomonae Jesús cui capoinchi, yawa najei Jesús yabara:

—Bapon cain capanepeibabei ichamonae, came jopa nacapanepaeyo. ³² ¡Icha bara bapon Mesías, pon israelmonae itorobiya pia pepa peewatsinchi, b_u bapon bara pia coutha naeto wetsica ecoinca! ¡Xainya bapoxonae jume cowantatsi xua wataexae tsane! najei barapomonae.

Barichir_u baxua paebabe ponbe jiwi pecaibinbe, ponbe xua ir_u_u cobe matatabadutatsibe naetotha. Baponbe ir_u_u Jesús cui caponatsi.

*Meje yabara poxonae Jesús t_upa
(Mt 27.45-56; Lc 23.44-49; Jn 19.28-30)*

³³ Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mateinyaxae weya, beya yatabopiya. Tres po horabe quirei tsuncuae.

³⁴ Bapoxonae Jesús jume daunweya wawai jeye: “Eloi, Eloi, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

³⁵ Ichamonae pomonae baxota Jesús jume taeumeinchi, barapomonae jeye:

—Pajume taema, bapon waba, Elías wabatsi, pon Elías Nacom peitorobi jume pepaebin pon caena bayatha tupa, jei.

³⁶ Bapoxonae caein bapomonae jiwana nainya cuinaepoinya yawa pitaba esponja xua baxota pemene capichinexa vino mera xua po mera mene atsu. Poxonae bapon baxota mene capita, naewatha duta xua Jesús petayoichaenexatsi xua petsutsubinexa. Bapon jeye:

—Abu, abu jopa apatsinde. Waxainchi abu matha taeinchi icha Elías patopeicaena xua bapon pepichinexatsi naeto wetsica, jei.

³⁷ Bapoxonae Jesús jume daunweya wawai. Bapoxonae nama tupa naicha Jesús. ³⁸ Bapoxonae paparuwa, po paparuwa Nacom pin pia botha tatsi ducua, barapo paparuwa nainya bopiya epa matonta tsitsiqueica ainya epatobe naexanabe.

³⁹ Soldadomonae pia pentacaponaein tatsi, pon romanomonaepin pon Jesús peitabaratha tauncuatsi, poxonae bapon tane xua Jesús tupa ruca, bapon jeye:

—Apara bara yatsicaya bapon Nacom pepa Pexanto tatsi, jei.

⁴⁰ Barichi iru ainyawaxi yabuxi barapowaxi Jesús tsiwiyo tajū wetaeumeinyatsi. Barapowaxi jiwana, ichowayo pewan María Magdalena, powa Magdala tomarapiwayo. Ichowayo iru pewan María, Santiago pon xuyapin, iru José matapin, baponbe penabe tatsi. Ichowayo iru pewan Salomé. ⁴¹ Barapowaxi Jesús bayatha matha puna jinompatsi xua Jesús peyawenaenexatsi

xua poxonaē Galilea nacuatha popona. Irū ichowaxi yabūxi pinmonae powaxi Jesús barū patopa Jerusalén tomaratha.

Meje yabara poxonaē Jesús petūpaein ibo mūthūtha yauxatatabobotatsi

(Mt 27.57-61; Lc 23.50-56; Jn 19.38-42)

⁴² Po mataqueitha pewūn penacui xaxainchi matabi poxonaē judiomonae ba weta daxita xua penacuichiwa pewūnaeya poxonaē jopaena pentaquei seicaē matabi, poxonaē quirei tsanaicha barapo penacui xaxainchi matabitha bapoxonaē patopa pebin Pilatotha. ⁴³ Bapon pon pepatopaexae bapon pewūn José, pon Arimatea tomarapin. Bapon pomonae pecanamata caitorobi jiwi bicheito jiwanapin. Bapon barū cui itura jineibatsi jiwi. Bapon yabara jume cowūntsiya wūnaē ewateiba po coyenewa xua poxonaē Mesías patopaetsica pon jiwi itorobiya peewetsinexatsi. José ajūntūcoyenetsaquiya patopa Pilato pia xantha tatsi pewūcaenexa Jesús petūpaein. ⁴⁴ Bapoxonaē Pilato yabara najūntū coyene cabenaecataba xua bayatha Jesús tūpa. Daxota bapon itoroba soldadomonaē pia pentacaponaein tatsi pia yaputaetsi po coyene xua eta poxonaē bayatha tūpa. ⁴⁵ Poxonaē barapo soldadomonaē pia pentacaponaein tatsi paeba xua pinaē bayatha Jesús tūpa, bapoxonaē Pilato copata xua José bara pichina Jesús petūpaein. ⁴⁶ Bapoxonaē José pexeinya paparuwa comota. José naeto wepichica Jesús petūpaein. Yawa mata quiyontabareca barapo pexeinya paparuwatha. Bapoxonaē José ibo mūthū iya

boya Jesús petupaein. Yawa torenababapoinya pin ibo panawa. Yawa barapo ibo panawatha yauxatatabanota. ⁴⁷ María Magdalena, powa Magdala tomarapiwayo iru icha María powa José pena tatsi, barapowabe tanebe ichaxota Jesús petupaein boyatsi.

16

Meje yabara poxonaе Jesús equeicha asu juina exanatsi petupae cuiru coyene weya (Mt 28.1-10; Lc 24.1-12; Jn 20.1-10)

¹ Nexata barapo judiomonaе pia pentaquei seicaе matabi tatsi yapucaewaba poxonaе quirei tsanaicha xua icha matabi jopa. Bapoxonaе María Magdalena, powa Magdala tomarapiwayo, iru icha María powa Santiago pena tatsi, iru ichowayoru powa pewun Salomé, daxita barapowaxi comoca petuxueiwan peponaenexa xua Jesús peperu epababinexatsi petupaein. ² Bapoxonaе baya caemumbotha, po matabitha xua nanta carucua cae semanatha, barapowaxi capata petuxueiwan ichaxota Jesús ibo muthu iya boyatsi. Bapoxonaе xometo pichatabina.

³ Barapowaxi caewaxi natsipaebenapona, najei: —¿Jintam metha nacata pataxubina barapo ibo panawa xua yauxatatabotatsi? najei.

⁴ Daichitha poxonaе barapowaxi taerucupa xua po pin ibo panawatha yauxatatababota barapo ibo muthu bayatha cou yaupataxubanota.

⁵ Barapowaxi jojoniya barapo ibo muthu iya. Barapo ibo muthu tutu iya pewowin eca po muxunene pecoxa weya. Bapon nama xatata

paparuwa, po paparuwa bichocono apiya yawa bichocono inyapana. Barapo yabuxi bichocono junuwa, pewowin cunuwatsi. ⁶ Ichitha barapo pewowin jeye barapo yabuxitha:

—Jopa pajunuwinde. Paxam pajeitame Jesús Nazaret tomarapin, pon bayatha naetotha tupa. Ichitha bapon anoxuae xote jopa bocaeyo. Bayatha asu petupae cuiru coyene weya. Pataema ichaxota Jesús bayatha botatsi petupaein. ⁷ Bara paponare, yawano patsipaebare Pedro iru ichamona pomona Jesús pijimona tatsiru. Nexta pajande: ‘Bepa Jesús paca tsiwana patopiyaei Galilea nacua beya poxona bara bepaiyiae-name. Bapoxona baxotiya pataename bapon icha be pocotsi coyeneya paca tsipaeba bayatha’, pajande, jei pewowin barapo yabuxitha.

⁸ Barapo yabuxi ibo muthu wejojondena. Yawa bara weya ducupa tsipei bichocono pijunuwi jijiyei. Barapo yabuxi jopa paebiyo ichamonaetha poxoru bichocono junuwa.

*Meje yabara poxona Jesús María tsita naitatsi powayo Magdala tomarapiwayo
(Jn 20.11-18)*

⁹ Poxona Jesús asu exanatsiba petupaewa weya po mataqueitha opi carucua xua cae semanatha poxona aena pentha, bapoxona Jesús tsita naitata María Magdalena, powa Magdala tomarapiwayo. Barapowa caena bayatha Jesús taitaweta cauri siete poyobe xua bapowa xeina barapo cauri, xua equeicha bapowa jopa pexeinaenexa. ¹⁰ Poxona Jesús tainchi bapowa pona pemuxu tsipaebinexa pomonaetha

pomonaē anoxuae anthuthutane yawa wecoyei xua Jesús petupaexae. Barapomonaē bayatha Jesús pepuna jinompaewichi. ¹¹ Poxonaē barapomonaē jume tane xua juinya Jesús asu popona, yawa xua bapowa bayatha Jesús tainchi, barapomonaē baxua jopa yabara jume cowantsiyo.

Meje yabara poxonaē Jesús pebinbe tsita naituta namtotha poxonaē Emaús tomara beya ponabe (Lc 24.13-35)

¹² Pirapae bapoxonaē equeicha Jesús tsita naituta pijimonaē tatsi jiwanabetha icha cui coyeneyatha xua poxonaē jopa xapain yaitaetsi poxonaē namtotha pipatotha ecaponabe aisawatha. ¹³ Bapoxonaē baponbe caibe nawiyabe. Yawa tsipaebabe ichamonaetha xua Jesús pijimonaetha tatsi xua po coyene bayatha Jesús baponbe tsita naitutatsibe. Ichitha barapomonaē barichiru iru jopa jume cowantsiyoru barapo diwesi pocotsiwa baponbe paebabe.

Meje yabara poxonaē Jesús cui itoroba pijimonaē xua pia diwesi tatsi daxita nacuantha petapaebiwa tsainchi

(Mt 28.16-20; Lc 24.36-49; Jn 20.19-23)

¹⁴ Pirapae Jesús tsita naituta pijimonaē pomonaē once poyobe poxonaē barapomonaē pexaethopaewatha iratha ena. Jesús pin jumetha muxutaenaquiya exana xua jopa pejume cowantsixaetsi matautano peyabara muxusipanaexaetsi matauta xua jopa peyabara jume cowantsixaetsi pocotsiwa paeba pomonaē

tane xua Jesús equeicha bayatha asu popona petapae cuiru coyene weya. ¹⁵ Jesús jeye pijimonaetha: “Paponare, daxita nacuantha beya. Patsipaebare daxita jiwitha barapo pecapanenebiyae diwesi jume. ¹⁶ Pomonae neyabara jume cowantsina xua xan apara Nacom Pexanton tatsi, matautano xua bautisabatsi, barapomonae capanenebiyaeinchi xua jopa peweraweracaenexa. Ichitha pomonae jopa neyabara jume cowantsiyo xua xan Nacom Pexanton tatsi, barapomonae peraxa jubebinchi xua Nacom peyabara paebixae xua pinae barapomonae jopa jume cowantsiyo. ¹⁷⁻¹⁸ Pomonae neyabara jume cowantsina xua xan Nacom Pexanton tatsin muxuna exanaein xuaje pocotsiwe: Barapomonae taitawetsina ichamonae cauri poxonaе tawantha wuqueibina; matautano barapomonae pena jumeintha cueicueijeі tsane; icha barapomonae jomon notsina pecobetha, jopa barapomonae tupa exanae tsainchi jomon; matautano icha barapomonae apaena po mera jiwi tupa exanatsi barapo mera jopa abe exanae tsainchi barapomonae; matautano barapomonae itacupaeinchi xua jayabina pecobetha pomonae peatenewi, xua bapoxonaе barapo peatenewi peaxaibinexa tsaibi tsane”, jei Jesús.

*Meje yabara poxonaе Jesús athabe juinya Nacom pia peitorobi nacua beicha tatsi
(Lc 24.50-53)*

¹⁹ Jesús pon jiwi Pecanamataxeinaeinchi, poxonaе bapon najume weta xua cueicueijeі pijimonaetha, bapoxonaе Jesús asiya peitaboco

beicha juinya exanatsi, xua Nacom exana. Bara xoteicha Jesús Paxa cuaretatsi pecoxa weya ainya cui peexanaenexatsi. ²⁰ Bara barapomonae Jesús pijimonae tatsi ponarucupa. Yawano barapomonae cueicueijei tsurubenanaebiya jiwitha barapo pecapanenebiyae diwesi jumein daxita nacuantha. Bapon Jesús pon jiwi pepa Pecanamataxeinaeinchi yawena barapomonaetha. Matautano Jesús cana exana barapomonaetha xua barapomonae muxuna exana pexeinya petsita itatsi coyenewan xua daxota pocotsiwa barapomonae cueicueijei jiwitha bara pexainyei jumein. Je, bara ichi tsane. Baja Marcos.

**Nacom Pejume Diwesi po diwesi pena jume
diwesi xua Jesucristo yabara tinatsi
New Testament in Cuiba**

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
e9c4c3a0-6dec-54a4-aaba-fb395e5eddc7